


## DITÈÈKIIBWA <sup>4</sup>

 Mwanèètù Neville, mwoyi wènù awu mu mapingaja emu, to, mu dilòòlò emu's wè, nwènù balunda bèètù bàà mushinga mukolè, tudi ne disànkà bwà kwikala baalùkile mu èkèleeziyà emu dilòòlò edi. Kùdi ndambù wa luuya, ne pa nàнку netùteètè bwà kulwijakaja ne lukasa ne mwètù mwònsò, bwà kubwela buludi mu Diyiiisha.

Dyàmbedi, tudikù ne ndambù wa mamanyisha à kufila, ne dilòmba dyà disambila dyà—dyà pabwàdi. Ndi mupete mikàndà yènù mimfùndila lwà paanyimà pàapa, yivwà mifidiibwe ayi, ne bwà mwanèètù wa bakàjì ùdi udyùmvwa ne ùdi ne cyùjà cyà kansèrè mu bwongò awu. Ne kùvwa mukwàbò mu Louisville; ne mwanààbò ne mwambi mukwàbò, tatwèndè ùdi ne disaamà dyà mwoyi wimàna; ne kùdi babèedi bààbùngì, bààbùngì menemene pa buloba leelù ewu. Bààbùngì bàdi bàbiikila ku telefone ne ncyà bushùwà ne twètù tudi tubàsambidila ne mwoyi wètù wònsò, bwà Nzambi wàmònakù mwà kutùkwàcisha.

Pa ciibidilu pàmwè ne byà pa lukama makumi citèemà ne bitaanu byà mudimu wànyì wà bwambi bitu misangu yònsò ànu cyòci aci, kusambidila kwà babèedi, nudi numòna's, kàdi ndi—ndi bu mupete—bu mupete mmwènenu mukesè wa ne . . . pààbì, ndi ànu ntùngunuka ne kusambidila kwà babèedi, aci nwavùlukaayi. Aci cidi citùngunuka ànu naawu. Kàdi, kaa, twìkalapù mwà kufikisha è—èkèleeziyà kaaba kàà yèyè mwà kutèèkiibwa bilondèshile myaba, dîbà adi, ne kubwela mu bulongame mu mùshindù wà ne tudikù mwà kuditwa mu mudimu, nudi numòna's. Bikèngela twikalèku badilongòlòle, nwamònu's, kusangisha byònsò kaaba kàmwè.

Cikwàbò cintu cyàfumu ku dintuuta ku mwoyi, kwènji katanci. Piine apu mpàvwà nkolomù mukesè wa kale, dimwè dyà ku mabòkò èndè dyambè kutùuka ku màzajì, mukolò mwambè kutùuka ku màzajì. Yèyè kèna kaaba aka to bwà kuntèelejaye mpindyewu mene. Kàdi mwànà mulelèlè wa mfùmù awu, dyèndè n'Roy Roberson, ne umwe wa ku balubuludi bèètù mu èkèleeziyà emu, ne mwena Kilistò wa maalu malenga ne wa bukàlàngà. Yèyè mmulwè ànu kaaba aku e kwambaye ne: "Mwanèètù Branham, kwikadi wàpwa Mfùmù wa ditùnga mwoyi's." Yèyè ne: "Bivwa bingenze luse be pätùulukuyè mwaba wàwa," mumumwene ku televiziyò, "pàvwàye ùtùuluka ku ndèkè, ne binsonji bimupwekela pa matàma, ne mbàngà mikònyangaja luseke." Nudi bamanye's, yèyè ùvwa ànu kuntwaku mene pàmwà ne Roy ne bakwàbò abu, mu mvità ayi—ayi.

Nànsha kùyì upetangana nendè pa bìdi bitàngila maalu à cididi to, yèyè ùdi ànu Mfùmù wetù wa ditùnga. Èyowà's, mukalenge. Bwànyì mèmè, ncyèna—ncyèna ní n'Démocrate ní

n'Républicain to. Mémè ndi mwena Kilistò. Kàdi ndi—ndi nnwàmbila, mvwa bulelèlè ngumvwa kaneemu kààbúngì bwà—bwà Mfùmù wa ditúnga Dwight Eisenhower. Mukalenge, ncyà bushùwà ne yéyè ùvwa muntu munène, mu wanyì pàànyì ngeelèlù wa—wa meeji. Bu yéyè mwa kufila kàbìdì mpàla, ne mémè ngeelelangana tukàndà twà masungulangana, mvwa mwà kumwelela cyàkàbìdì kakàndà. Ncyà bushùwà. Nànsha bu yéyè mwà kwikala—nànsha bu yéyè mwà kwikala ne bidimu lukàrà, mvwa ànu mwà kumwelela kakàndà, bwalu ndi mumuswè. Nànku tumuvùlùkaayiku mu masambila ètù dilòòlò edi.

J. T., ncyà bushùwà ne ndi ngàànyisha disangisha dilenga adi, dinùvwa nwènù bònsò benze, wèwè ne Mwanèètù Willard mu lumingu elu adi. Bu ne mvwakù mubwelemu mfùmina pambèlu, nwènù's nuvwa mwà kwamba ne: "Èyo, mpindyewu Mwanèètù Branham, udi mumanye's, *bikampànda-bikansanga*." Kàdi's mbitàmbekù bwímpè bwà kushààlakù ànu mwimànyine pambèlu mwikàle nnùtèèjeja, kanwèna numòna nànku anyi? Èyo. Nànku, mbímpè be.

Ndi ne maèkèleeziyà kampànda adi mangambile ne àdi dijinga ne bampaasàtà, panwikalà baàswe, panwikalà badilongòlòle bwà kuya kenza bumpaasàtà mpindyewu, panwikalà bapete dilongeshiibwa. Ne, dyòdì diine, ndi ngeela meeji ne nudi badipete, ne nudi bashìndamija bilenga. Ndi ne umwe mu Oregon, mikwàbò mu Washington, mu Californie, ne mu Arizona, mu myaba mishiilèshiiàngàne. Nènku wèwè muswè bwà kwangata èkèleeziyà anyi cintu kampànda, mòna's, mwab'ewu mene ki mwaba mwímpè wà ditwadijila, mwab'ewu mene. Nènku kùdi misùuka munkacì mwà kudila myadi mu myaba yònsò, nànsha mene too ne mu bitùpà byà malaba bilamina ba-Indiens abi ne kwònsò kunùdì baswè kuya aku. Nùtwàmbilaayi ànu cyanààna, bwalu mémè ndi ngiitabuuja ne nwènù balùmyàna nudi bashìndàminemu patùdì twakulangana apa. Ncyà bushùwà. Mémè ndi munange ànu kubàmòna benza nànku.

Kùdi Mwanèètù Ruddell mu njila kuntu kwàka. Nényekù bwà kamwenzela disangisha, mu matùkù makesè aa. Yéyè neènzè disangisha dyà ditabuluja, Mwanèètù Ruddell awu. Ne ndi—ndi mvùluka ne kale wàwa bìvwa bìkèngela bwà mémè kwikala nsàka nsongààlùmè awu myaba yònsò eku ne eku, nteeta bwà kumusàka bwà kukòpokaye mu cikùnyì ne kuyiishayè. Ùvwa yéyè ànu ùdìciina be. Ùvwa wàmba ne: "Ncyèna ànu mumanye mwà kwakula to." Bikèngela nùmutèlèlèjàku mpindyewu's. Amen. Nwamònu anyi? Kwèna umanya cyùdì mwà kwenza to ànu paùdì ulekela Nyumà Mwímpè ùkupyà. Ncyà bushùwà.

Ne Mwanèètù Graham Snelling mu Utica, ne Mwanèètù Junior Jackson kuntu kwàka. Tudi—tudi tuyibala yònsò ayi bu èkèleeziyà myakùnyì yetù, miikàle ànu mitwè ku cyètù.

Tudi bônso pâmwe. Katwenaku bapangakane pa bidì bitàngila malongesha ètù à nshindameenu, anyi matèkemena ètù ne tulumbilà twètù, malongesha ètù a nshindameenu to, tudi cintu cìmwè. Tudi wa taàwù wa màawù, bintu byônso ànu pâmwe. Tudi èkèleeziyà ànu umwe. Kàdi ncyà bushùwà ne tudi tujinga bwà kwikalabò batangàlake myaba yônso; tudi naabò mu Afrike, bakwàbò mu Inde, ne mu nyungulukilu mwônso, mu ditunga dijimà. Kwòkù aku ki kutùdi tujinga bwà kwikalabò, bàtangalaja Luumù.

Ne ndi mmòna nsongàalùmè yà bitende yidì yènda yibànda eyi, bu mùdi Mwanèètù J. T. Parnell ewu, ne—ne Mwanèètù Willard ne bakwàbò, pàdìbò bènda bàbànda apa, nsongàalùmè yà bitende, pàndì mèmè ngenda ngeela bidimu apa. Bu màalaba mwà kwikalaku, bóbò's ke bìikalà balùme bàà màalaba abu. Ncyèna muswè bwà Mukenji ewu wùfwèku to. KaWèna ànu mwà kufwàku to. Wùdi ne cyà kutungunuka ne kwikala ne mwoyi. Ne mèmè ncyèna ngeela meeji ne tucidi ànu kàbidì ne cikondo cyàbùngi bwà kuWùtwàla to.

Mwànà mukesè wa mu dibòko uvwabò bàmba ne neàfwè awu, s'nyewu mmòna wèwè nendè mu èkèleeziyà ditùkù dijimà dyà leelù ewu edi, mwanèètù wa bakàji. Abi's mbilenga byà dikèma. Tudi twela Mukalenge twasàkidila bwà bwalu abu, bwà mùdi Mukalenge mwikàle wa ngàsà, mùle tètè ne luse. Tungunuka wèwè ànu ne kwitabuuja civwàbo bakwambile kaaba aka mene aci, wamònu's, yèyè neùmvwè bimpè.

Mpindyewu, dilongesha didi dinùsànkisha anyi? Nudi banange dilongesha anyi? [Disangisha didi dyàmba ne: "Amen."—Muf.] Kaa, ndi—ndi—ndi cyà bushùwà ngeela meeji ne didi ditwenzela bimpè. Didi ditùpèeshakù ndambù wa diikisha ku disambidila dyà babèèdi, ne bikèènà-kumòna, ne dyondopa dyà kùdi Nzambi. Mu bushùwà bwà bwalu, mpindyewu, dilòòlò edi tudi. . . Paanyimà pàà disangisha, netùsambidile cyàkàbidì babèèdi, dilòòlò edi. Tutu misangu yônso ànu baswè kwenza nàнку, kubatiiza muntu kanà yônso pa dîbà kanà dyônso.

Mbanganyì bàdiku bàvùluka pâmvwà kale wàwa ngenda nkòntonona nshinga yà nzembu? Èè, mèmè's nkààdiku mwendènde ngenda nkòntonona nshinga yà nzembu, misangu ne misangu, mwikàle ne cyà kwenda kilòmèètà makumi anaayi ne mwandamukùlu lwà makàsà mpicila mu cipèèlà. Mvwa ne kilòmèètà nkàmà yinaayi ne makumi anaayi ne mwandamukùlu yà dyenda lwà makàsà bwà kulonda nshinga yà nzembu. Mvwa ngendela muntwamu, ne mutèèlu mukwàta ku byanza, ne, kaa, mucyòke bibi be, ngenda mpicila mu bisuku ne meetu abi, ne mèbà mabishi byènda bintàpa. Mvwa ntwilangana ne cidime mukulumpe kampànda ne nsòmbela panshi mwìnshì mwà mucì ne nyiikilangana nendè pa bidì bitàngilà dibàtijiibwa mu Dîna dyà Mukalenge Yesù. Yèyè ùvwa mwà kwamba ne: "Èè, mèmè's ntu misangu yônso ànu mujingèjinge kubatiijiibwa."

Mémè ne: “Apa kî nkule menemene ne kasulu to.” Ne yêyè ùvwa mwà kwamba ne . . .

Nènku nkàadi muyààyaàye ne bààbùngì kuntwaku ne mubàbàtiize mu Dìnà dyà Yesù. Ntùùluka ànu ku dikunji dyà nzembu aku, nya lubilu ne mwànyì mwônso. Ncyà bushùwà. Misangu yàbùngì mwikàle muvwale bilàmbà byànyì byà kale byà mudimu abi, mbàtiiza muntu, mutuuluke buludi ku dikunji dyà nzembu. Muzàngame kuulu ku dikunji aku munkaci mwà kwenza mudimu; mvwa kàbidì mulongolodi wa nshinga yà nzembu’s, mémè, munkaci mwà kwenza mudimu ku dikunji aku, ne muntu kampànda, nyiikilangana nendè pa bìdì bitàngilà Mukalenge. Ùvwa mwà kwamba ne: “Mòna’s, Billy, òmwè dyà ku matùkù àdì panshì aa nèndwe ku èkèleeziyà webè aku bwà mbàtijiibwè.”

<sup>2</sup> Mvwa mwà kwamba ne: “Bwà cinyì udi muswè kushààla mwindile too ne dîbà adi? S’nyewu tudi ànu pabwìpì ne musulu mene, s’mùdi màyi bùngì cyanààna.” Kubàbàkula ànu mpindyewu mene. Ncyà bushùwà. Ki dîbà ndyòdì adi. Filipò wàkamba ne . . .

<sup>3</sup> Mutungu wàkambila Filipò ne: “Màyi’s ngòwò aa, ncinganyì cìdì cìtùpangishà?” Ncyà bushùwà. Cintu nànsha cìmwè. Wèwè mudilongòlòle, s’ki dîbà ndyòdì adi. Kùshùidikù dyabùlu pàa kubwelela bwà kufunykaye cintu kampànda muntwamu to. Kulaadikiji bwa mààlabà bintu byùdì mufwànyine kwenza leelù to. Mbifwànyine kwenzeka ne mààlabà mwine awu kubèngayè kulwa bwèbè wèwè. Ndi muvùlùke musangu kampànda wùngààkenzà nànkù, mémè kuyiila, kumpèeshaci dìleesònà. Ngàkalààdikiji cintu cìvwà cìkèngelà mémè kwikala mwenze ditùkù kampànda, kàdi ditùkù dyà pàakacyàbu ke dîbà kwikaladi dimanè kupita.

<sup>4</sup> Mpindyewu, ncyà bushùwà ne ncyèna muswè kunùlama dîbà dyònsò edi to. Kàdi ndi ànu ndwa mwàngaciibwe bikolè—bikolè, nènku, ncyèna mumanye to, ndi ndyùm vwa ànu bimpè mu mùshindù wà ne ndi ngamba kwikala ncìcìyi mu mémè to. Ndi ndyùm vwa ànu bimpè menemene.

<sup>5</sup> Mpindyewu twìnyikààyaaku mitù yètù ànu bwà katanci kakesè cyanààna kumpàla kwà twètù kulenga Díyi.

<sup>6</sup> Taatù wetù wa mu Dyulu, Wèwè ngudi Nzambi udi ne mwoyi, mwikàle ne mwoyi kashidi. Dîbà didì difùma ku dibwela edi, dîbà òmwè òmwè adi, Danyèlè wàkaditàngila pàvwàdi dibwela, Yelèmiyà wàkaditàngila dibwela, Adàmà wàkaditàngila dibwela, Yesù wàkaditàngila dibwela. Ne mbuloba bùm wè bùm wè ebu bùvwàbo basòmbèle ne bèndelemù, ne Wèwè ucìdi ushààla ànu Nzambi umwèumwè awu.

<sup>7</sup> Dilòlò edi nyèwù kùdi malòmba àbùngì. Muntu mulùme mwikàle ne cyùjà cyà kansèrè mu bwongò, mwanèètù wa bakàji kampànda mwikàle ùcìina cintu cìmwècìmwè aci. Wèwè,

Mukalenge, ki ditèkemeni dimwèpelè didiku bwà cyôci aci. Cyûja aci cikaadi cilwè kansère kàà lufu, kakûyi cintu nànsha cimwè cidi mwà kwimanyikiibwa nànsha. Cikaadi cintu cyà cipite ngàngabukà mutù kule ne kule. Kàdi dilòlò edi nyèwù tuya ne ndundu wetù mukesè wa nyuunyi, twenda tulonda mwànà wa mùkòòkò awu, bwà kumwaluja mu lupangu lwà mikòòkò lwà Taatù. Mu Dìna dyà Mukalenge Yesù nyèwù tuludikila disambila dyètù bwà kushebeya nyamà wa ntambwe awu, cyûja aci, kansère kàà lufu aku, bwà kubàaluja mu dikubiibwa dyònsò mu lupangu lwà mikòòkò.

<sup>8</sup> Nènku twètù, Nzambì, tudi cyà bushùwà tuvùluka dilòlò edi Mfùmù wetù wa ditunga munanga, mwanèètù, Dwight Eisenhower wetù ewu. Yèyè mmulombole ditunga, Mukalenge, mmutèète bwà kutwepula ku mvità. Ûvwa mulaye ne mvità yà Corée yivwa mwà kujika bu ne yèyè ùvwakù ne mùshindù kampànda wà kuyjikija. Ûvwa mulaye baamaamù abu ne ùvwa mwà kwaluja nsongàalùmè ayi. Kàdi kwambaye ne: “Bwà mèmè kucyènza, ncyèna ne bukolè bwà kucyènza to. Ndi mèmè mwà kwenza ne bwànyi bukolè, kàdi bikèngela ànu Nzambi nkààyèndè àcyènzè.” Ne Wèwè uvwa nendè, Mukalenge, ne patùdi twakulangana apa bwalu abu mbumanè kutuuka bwònsò. Bwà cinyi kabàvwakù mwà kwikala bamòne ciine aci kwine kwònsò aku? Nzambì, ndi ndòmba bwà Wèwè kumwambulwishaku. Bèneshaku musùukà wà bukitù awu, Mukalenge. Ne tudi tulòmba bwà Watùsungwilakù mulombodi wìkala mwà kulonda awu. Diswa Dyèbè didyànjlila kulongolola adi dyènzeikiibwèku, Mukalenge.

<sup>9</sup> Kàdi Ewu utùdi tusankila dilòlò edi, pa kuumusha maalu à ditungà dyètù, ng’Ewu munène ne wa butumbi ulwàlwa bwà kushikika Bukalenge bwikalà kabûyi ne ndekeelu, Mukalenge Yesù, Mwan’Èbè awu. Dìbà adi bôbò nebùngwije bingoma mishiki, tungonga twà diimanyika dyà mvità netùdile twamba ne kakwàkwikala kàbidi mvità to. Nebàkune madimi à mvinyò ne nebàdye tumuma twàmù. Nebiibakè nzùbu, e kusòmbelamù. Ne kakwàkwikalakù ndululu dìbà adi paanyimà pàà cyôci aci to.

<sup>10</sup> Tùbènèshaakù mpindyewu patùdi tulenga Dìyi apa. Nènku, Taatù, Wèwè ngudi mumanye kabingilà kàdi kènza ne ndengele Dìyi pa Mufundu ewu mene. Mbwalu ndi—ndi ndyùmvywa ne Wèwè udi muswè bwà mèmè kucyènza mùshindù ewu, bwà ne ndiswà Dyèbè dyà Bunzambi, cidi nDìyi Dyèbè ditùma, cidi mu... ndilondangana dyà maalu dyà ditùkù, bwà kwenza ne bantu bàpetè kaaba kààbò ne bìikalè badìlongòlòle bwà dìbà dyà mvità. Ànu mwàmbi mwanèètù wa balùme mu disambila dyèndè Kùdi katanci kakesè aka ne: “Kaa, Wèwè wàtùlongèshì ntàntà mule be, Mukalenge.” Mpindyewu, Taatù, twàsàaku mpètà. Tùtèèkaaku mwaba awu bwà citùdi ne cyà kwenza, bwà twamòna mwà kwikala badìfile ku maalu à Taatù. Bwalu tudi tulòmba nùnku mu Dìna dyà Yesù, Mwan’Èbè. Amen.

<sup>11</sup> Ndi mupicile mu mapingaja malenga à dikèma mu mapingaja emu, nyiikilangana ne ngàngàbukà mwendè luumu mu Louisville, mungàngà wendè mukàji. Bàvwa búmvwe tulonda maalu à butùmbi à Mukalenge. Ne tatwèndè wa mungàngà-mukàji awu ùvwa ngàngàbukà. Nènku mungàngà-mukàji awu kulwayè ne kusòmbayè mu cibambalu cyànyì ntàntà mule menemene mu mapingaja amu, kubwelayè ànu cyanàànà, mulwe kunkumbula. Muntu mulenga wa dikèma; cibi wa ùshidisha maalu ndambù, nudi bamanye's, mwikàle mu mùshindù kampànda wa lulamatu, cyà kumpàla, Presbytérien wa menemene, kàdi kuumukaye ne binsonji bimupwekela pa matàma's. Kaa, mèmè. . . Nzambì ùdi naabò kacya ànu bàalamata mu myaba yònsò, mu maabirò à bangàngàbukà, mu baamingàngà. Ncyèna ngeela meeji ne kùdikù mungàngà-mukàji mu Lùpitàadi Iwà Norton's Infirmary ùndi nciyiku mwambile bujaadiki bwà dipeta dyà Nyumà Mwimpè to, ne mumukonkeku ní ùvwa mubàtìijìbwe mu Dìna dyà Yesù. Kakwèna ngàngàbukà ùndiku mutwilàngàne nendè, nànsha penyì, anyì cintu nànsha cimw- . . . Nwamònu anyì?

<sup>12</sup> Ikàlaayi nubàmbilaCi. Katwèna ne dībà dyàbùngì to, mwanèètù wa balùme. Nànsha cyòci cimwèka cikolè bishi kaaba aka, indila wèwè ànu too ne pawàpità e kuya dyàmwàmwà dyà mweyelu wà ndekeelu awu ne wèwè kumòna, dībà adi neùjinge ne bìvwa bikèngela bwà wèwè kwikala mucyènzè. Èyowà's, mukalenge. Kwindidi too ne dībà adi to, tucyènzàayi mpindyewu mene. Dībà ndyòdi edi. Kaa, mbafwànyine kubènga kuciitaba, ne bàfiika munda bikolè ne bàjuudilapù makokyanganyi ndambù, kàdi kabèena bàcyènza ku bukolè to. Ncyà bushùwà ne kabèena bàcyènza ku bukolè to. Bòbò—bòbò—bòbò bàdi bimpè. Pàdìbo bàjuula neebè makòkyanganyi, ùvùlukè ànu—ànu ne, kabèena—kabèena cyà bushùwà bàcyènza ku bukolè to. Kabèena bàcyènza ku bukolè to. Pàmwàpa mbabalongeshe ànu cintu kampànda ne bòbò mbashàale bakwàtekù, pa nàнку udi—udi mwà kumòna mmwènu wabò. Kùkòkyanganyi naabò to, kùkòkyanganyi ne muntu nànsha umwe to, kàdi bàbweja ànu buludi mu Cyòci aci ku dibànanga. Pashishe ùbàsambidilè.

<sup>13</sup> Èè, ngeela meeji ne tuvwa bapweke too ne ku mvensa wa 9, ncyèna mutwìshìbwe to. Aku's nkule bikolè ne nshapità mwi3, kì mmwòmò anyì, balùmyànà? Kàdi kaa, s'Ciidi mbwìci mu lubwebwe's, bwànyì mèmè! Tuvwa twakula mpindyewu, nwavùlukaayi, mbwà tùpetèku pàa kushindamijila cyàkàbìdi ndambù. Nènku mpindyewu, Mwanèètù Neville, wèwè—wèwè ùnkokeku ndambù mpindyewu bu mèmè mwà kupanga kumòna pàdì dībà dipità, bwà ngaamòna mwà kwenza disambila bwà babèèdi. Tudi baswè kwangata kasùnsukilà kònsò katùdikù mwà kwangata aku. Ne dilòlò edi ndi muswè kwenza dibìikila dyà ku cyoshelu. Ndi . . . Ndi ngooya ne eci bwà bìdi bishàala ebi ngiikala mwà kubibala ànu cyanàànà.

14 Kàdi kiipàcilà kàà cyôci eci, nkàà ne, kumòna kaaba kèbè mu Kilistò, kumòna ne kí ncintu kampànda cyùdi mukabwelemu ànu ku mpuukapuuka, anyi cintu kampànda cidì cifwànyine kwikala ne. . . cyùdi mukumbànyine mwaba kampànda to, kàdi ncidì Nzambi mukwenzèle, Yèyè mwine. Kí nne mpaùvwà mwîmpè menemene mu mûshindù wà wêwè mukabwele mu èkèleeziyà dilòlò kampànda, ne mwanèètù wa balùme mukwàte ne byà luse mukulombole ku cyoshelu to. Kàdi kacivwa ng'aci to. Úvwà n'Nzambi, kumpàla kwà difùka dyà dyulu ne buloba, úvwà mudyànjàle kukulongolola ku Mwoyi wà Cyendèlèlè. Pawàyà kafikaku ditùkù adi, kabyena bikèmesha to pàvwà bakulu makumi anaayi. . . makumi àbìdì ne banaayi beebe bifulu byàbò byà butùmbi panshì, umwe ne umwe mwele cifulu cyèndè cyà butùmbi panshì, umwe ne umwe mupòne mutwè mpàla panshì, kabàyi ne cintu cyà dyamba nànsha címwè, muiishi nànsha umwe, mukùlù nànsha umwe, cintu nànsha címwè. Butùmbi bwònsò kùdì Mwànà wa mùkòòkò! Nzambi neàkungwije bintu byònsò munda Mwèndè ditùkù adi. Kaa, twìkalapù nànsha mwà kumanya ne kujingulula ne Yèyè uvwabò bapoopèlè pa nkùruse awu úvwà Nganyi's wè. Mpindyewu ku. . .

15 Tudi tubangila ku mvensa wa 8, bwà kupetaku pàà kushindamijila ndambù.

*Udiyè mutùvudijìle twètù lungenyi lwònsò ne ditàlama;*

*Mutumanyishe twètù bwalu-busokoka bwà diswa dyèndè, . . .*

16 “Maalu-masokoka à diswa Dyèndè.” Nènku nudi bavùlùke mutùvwà banengepù anyi? Mbanganyi bàvwàpù mu dindà emu, tumònàayibi. Mûshindù tutùvwà basuminyine pa cyôci aci, “bwalu-busokoka bwà diswa Dyèndè.” Mpindyewu, kacyèna ànu kantu kakesè cyanàànà to, dìbà adi mbwalu-busokoka. Diswa dyà Nzambi didi bwalu-busokoka. Nènku bidi bikèngela bwà muntu yònsò mulùme anyi mukàjì yònsò kudikebelaye diswa dyà Nzambi bwèndè yèyè mwine, bwalu-busokoka bwà Nzambi.

17 Tudi tubujandula munyi? Pòlò, bwàkamanyishiibwa kùdiyè. Mmwambe ne yèyè kààkakonka muntu nànsha umwe to, musunya anyi mashi. Kàakaya ku cilongelu nànsha címwè, ku seminèrè nànsha umwe to. Kàvwa ne bwalu nànsha bùmwe bwà kuya kakebaku to. Kàdi yèyè. . . Bwàkabuuludiibwa kùdiyè kùdì Yesù Kilistò, Wàkatuutakeena nendè mu njila wa ku Damàsèkè awu, mu—mu Bukènkè bufwànàngàne ne Dikunji dyà Kapyà, ki kumubiikilaBu. Ki kuyaye mu Arabie, ne kushààlayè bidimu bisàtù kuntwaku. Kaa, kwènàku udìfwànyìkijila ne civwa ncikondo cyà pabwàci anyi, Mwanèètù Egan? Bidimu bisàtù bivwà Pòlò úsanganyiibwa mu Arabie mwàmwa, úfucila kazùbu kakesè mu mwaba kampànda, ùbànda úpweka, ne

mikàndà mivùnga yònsò yà kale ayi. Kabàvwa ne mipyamipya eyi to; Pòlò ngwàkayifùnda, yàbùngi yà ku yòyi. Ànu mu miine mikàndà mivùnga yà kale eyi, mùvwà Nzambi, ku cibangidilu, mudyànjlile kutulongolola ku Mwoyi wà Cyendèlèlè amu. MùvwàYe mwà kutùma Yesù, bwà ku Mulambu ewu twamòna bwònsò mwà kwikala ne bukenji ku Muci wa Mwoyi. “Aba bàakadyànjlilàYe kumanya, Wàkabàbiikila; aba bàakabiikilàYe, Ùkaadi mumane kubàtùmbisha.” Nzambi, kacya ku cibangidilu cyà dyulu ne buloba, wàkadyànjlila kutulongolola ku ditèekiibwa dyà bânà. Mpindyewu bufùki bujimà bùdi bùtwa mikèmu, bwindile dimwèneshiibwa dyà bânà bàà Nzambi. Kaa, mèmè’s ndi mufwànyine kudifwànyikijila Pòlò ùpicila mu cikondo cilenga be. Mvw’a kujingaku bwà ngíkala nendè kuntwaku’s. Kàdi wèwè?

<sup>18</sup> Mpindyewu mmwambe ne: “Yèyè mmutùmanyishe bwalu-busokoka.” Wèwè anji peta ànu Nyumà Mwîmpè pambidi pèèbè apu musangu kampànda, nènku ùbangè ànu kulondesha Aci kàdi ùmonè mùdìCi ciya. Mu mapingaja emu, kaa, ndi mwangate tusunsa tutwè ku makumi àsàtù bwà kulonga, ànu bwà kukenketa dileesòna adi cyanàànà; pàmwàpa kaciyi aci to, ndi mwà kwamba ne ncyàbìbìdì cimwè cyà cyòci aci, tusunsa dikumi ne tutaanu munkàcìnkacì amu. Ki mèmè kuditwa mu dibipicisha ku cimwè ku cimwè, ki mèmè kudyambidila ne: “Bwalu-busokoka abu, mùshindù mwine wùdibu busokoka’s wè!” Ki Mifùndu kungaaluja ku Dipungila Dikùlukulu, pashiishe kungaaluja cyàkàbìdì mu Dipungila Dipyadìpyà; yìswìkakaja cintu kampànda pàmwè, mmòna bwalu-busokoka bwà Dilwa Dyèndè, bwalu-busokoka bwà diswà Dyèndè, bwalu-busokoka bwà mutùdi basòmbe pàmwè. Vùlukàayi ne, kabyènakù mwà kulongeshiibwa mu seminèrè nànsha umwe to. Mbwalu-busokoka. Kwèna mwà kubimanyinaku ku dilonga dyà tulaasà, ku tèoloji to. Mbwalu-busokoka bùvwà busokoka kacya ku difùka dyà dyulu ne buloba, bwindile dimwèneshiibwa dyà bânà bàà Nzambi.

<sup>19</sup> Anji ngambilàku tǔng, mwanèètù wa balùme, anji ngambilàku tǔng, mwanèètù wa bakàji, ndìbà kaayi dìvwàku bânà bàà Nzambi ne cyà kumwèneshiibwa pa kuumusha dîbà ditùdi mpindyewu edi? Ndìbà kaayi dikaadiku cikondo mu maalu-malonda, mùvwàbìkù bikèngèla bwà kumwèneshabò cikondo cyà kusungila bufùki bujimà? Bufùki, bufùki bwòbù bwine bùdi munkacì mwà kutwà mikèmu, bwindile cikondo cyà dimwèneshiibwa. Mòna’s, kumpàla kwà difuta dyà cibawu kwenjiibwadi, kumpàla mene kwà Nyumà Mwîmpè kupongolodiibwaYe, kumpàla kwà Dipungila Dikùlukulu dyònsò—dyònsò, too ne kwine kwònsò aku, kakùvwakù mwà kwikala mamwèneshiibwa to. Bìvwa bikèngèla kwindiladi too ne cikondo eci. Mpindyewu bintu byònsò bikaadi bitwàdiibwe, munkacì mwà kulwa, byènda byàngata mbùngakeenu bitàngile



ku dibwe dyà mùsongà, ku mamwèneshiibwa à bânà bàà Nzambi bàdi munkaci mwà kwalukila, ne Nyumà wa Nzambi ùbwela mu bóbò bantu aba, mu bupwàngàne bwònsò, mu mùshindù wà ne mudimu wàbò wà bwambi newikalè mufwànàngane ànu menemene ne wà Kilistò too ne mwikalàwu mwà kuMusangisha ne Èkèleeziyà Wendè pàmwè.

<sup>20</sup> Mbanganyi bàkaadiku balongè bwalu-bulonda bwà bipaapu byà misàkà? Ngeela meeji ne inábànza ùmwèpelè kaaba aka ngwedi cyanza muulu. Èyo.

<sup>21</sup> Nzambi ùtu mufunde Bibles yisàtù. Umwe wa ku yôyi ùvwa n’Cidiminzaji mu maulu, ki Bible wa kumpàla. Bivwa bikèngela bwà muntu kwikalaye ùtàngila muulu bwà kumanyaye ne Nzambi ngwa kuulu. Londàayi Cidiminzaji, kacya nukàadikù bacìlongè anyi? Cidi mene cifila cikondo ne cikondo cyònsò, nànsha mene ne cikondo cya kansêrè. Cidi cifila ntwadijilu, cyà kumpàl-. . .dilediibwa dyà Kilistò. Cimfwànyì cyà kumpàla mu Cidiminzaji ncinyi? Virgo. Cimfwànyì cyà ndekeelu ncinyi? Leo nyamà wa ntambwe. Dilwa dyà kumpàla ne Dilwa diibìdi dyà Kilistò, byònsò abi mbifundamù.

<sup>22</sup> Pashìshe Bible udi ulonda wàkafundiibwa, ùvwa mmu dibwe, bàmubiikila ne m’“bipaapu byà misàkà.” Nzambi wàkamufunda mu bipaapu byà misàkà. Nwènù babilongè, nùtangilàayi maalu-malonda à kale awu ne mvità, mùvwàbi biibàkiibwe kumpàla kwà kabùtu kàà musangu wà mvula yà Noa.

<sup>23</sup> Mwisàtù wàkafundiibwa pa mabèji, Bible, bwà bantu banène, bàà meeji matwè ne maalu à mamanya bàvwà bàlwa. Mpindyewu, bu mùdibi ne Nzambi mmwendè mupicile mu bikondo, tudi ku Leo nyama wa ntambwe. Tudi ku dyasa dyà mùsongà wa cipaapu cyà musàkà. Tudi mu Mukàndà wà Bwàkabuulwibwà, ku nshapità wa ndekeelu. Maalu à mamanya àdi àmba ne tudi pa dîbà mundankulù kushàadile tusunsa túsàtù. Kaa, elayibi meeji mwaba wutùkaadi.

<sup>24</sup> Nènku mònaayi, twàngatàayi cipaapu cyà musàkà, mbipeepèle. Ncyenze ànu mùdi cipaapu cyà matumba àsàtù amu.

<sup>25</sup> Patùvwà kaaba aka biikàle tubanga ne cikondo cyà ku ntwàdijilu cyà èkèleeziyà, paanyimà pàà Dilongolola mu cikondo cyà Luther, muntu yéyè mudidinge ànu mwambe mùdiye mwena Kilistò, s’cìvwa bwèndè yéyè cilumbu cyà mwoyi anyi cyà lufù. Bàvwa bàmushebeya nànsha bwà kwamba mene kwà ne yéyè mmwena Kilistò aku. Ki bwà cinyi bwà kupicila mu dikèngeshiibwa. . .Cikondo ne cikondo cyònsò, dîbà dyònsò, kùvwa ànu dikèngeshiibwa. “Aba bònsò bàdi ne nsòmbelu wa difwànà dyà Nzambi mu Kilistò Yesù nebàpicile mu dikèngeshiibwa.” Mu cikondo cyà Luther, cìvwa ncintu cibì be bwà kwamba ne “Luthérien.” Bàvwa

bàkwangata bu mukoleshi wa maalu, ne wêwè mufwànyine kushipiibwa. Misangu yàbúngi bàvwa bàbàshebeela ku dikunji dyà kwoshelanganaku, bàbòòsha, ne bikwàbò byònsò, ne bwalu mba-Luthériens.

<sup>26</sup> Pashiishe èkèleeziyà kubùmbakanayè, mwenzè mùdi cipaapu cyà musàkà. Wàkabwela mu citupà cikwàbò cyà ngàsà, cìvwà dijidiibwa. Mu cikondo cyà Wesley, pàakatontolòlaye èkèleeziyà wa ba-Anglicans, wàkalongesha dijidiibwa. KulwaYe cyàkàbìdì wa banyàabanyà, dìbà adi kubàbìkilabo ne mmusùmbà wà bakoleshi bàà maalu.

<sup>27</sup> Mbanganyi kaaba aka bàvwàku ba-Méthodistes, anyi bàvwàku kale wàwa, anyi bàvwàku musangu kampànda baswikàkàne ne èkèleeziyà wa ba-Méthodistes? Cyàbìbìdì cìmwè cyènù. Nudikù bamanyè ne èkèleeziyà wa ba-Méthodistes musangu kampànda ùvwa ciibwìpì ne kwikala ne Nyumà Mwìmpè anyi? Mémè nkààdikù muyè mu èkèleeziyà yà ba-Méthodistes ne mubàmòne bàdìshinda panshi, ne bàbèèla màyi kwìsù eku ne bàbèèla lupeepèlè ne cipeepudi, bwà kupangisha Nyumà Mwìmpè bwà kulwaYe pambidi pààbò. Ncyà bushùwà's. Mpindyewu, aci's mbulelèlè, mu tukùnà twà mu Kentucky mutùvwà ne ba-Méthodistes mwàmwa. Nwènù balùmyànà's nudi bakashàadi bàà mu èkèleeziyà kaaba aka. Tuvwa ne ba-Méthodistes kuntwaku, ne ba-Baptistes. Tuvwa tuya katwà binù ku cyoshelu ne tutuutangana tuumapi paanyimà muntu ne mukwèndè too ne patùvwà tupeta cintu kampànda. Patùkaadi bamanè koobeka kaaba aku, tuvwa ne nsòmbelu mushiilàngàne paanyimà pàà cyòci aci.

<sup>28</sup> Kàdi nwènù nulwàlwa ànu cyanààna nufùnda dìnà mu mukàndà nwamba ne: "Ndi Méthodiste." Ne bàngata kandundu kàà kumyamina naaku mukele ne bàkumyamina tuumàyi ndambù, pààkù kumba kùjika. Nupàtuka nuya kavwàla tuputulu, nudilaaba bilaabu kwìsù, nwenza manayi à mbilu yà dipiiyangana à pa tubalu, nudyà mpiku, nunaya manayi a mfranga, nunaya ku mashinyi a binjànjà byà mfranga ne bikwàbò byònsò, cibì biikàle ànu ba-Méthodistes bimpè, nwamònu's. Abu kì mba-Méthodistes to. Abu's bàdi ànu bakashàadi bàà ku èkèleeziyà. S'ncyà bushùwà. Ba-Baptistes, byà mwomùmwe, ba-Presbytériens, ànu byà mwomùmwe.

<sup>29</sup> Mùvwà David duPlessis wàmba ne: "Biikùlù, Nzambì kàtu ne biikùlù to." Kacya Nzambì kàtukù ne mwikùlù to. Yèyè ùtu ne bàna, kàdi kàtu ne biikùlù to. Ncyà bushùwà. Nwènù... ne bantu bàtu bàbwela mu èkèleeziyà wa ba-Méthodistes abu, anyi mu èkèleeziyà wa beena Mpenta, anyi mu èkèleeziyà wa ba-Baptistes, ne bwalu tatwèbè anyi mamwèbè ùvwa mwena Mpenta anyi Baptiste, dìbà adi wèwè's udi mwikùlù. Bòbò mbàvwà bàna. Wèwè udi mwikùlù, wamònu's. Kàdi Nzambì kàtu ne cintu bu nàнку nànsha. Èkèleeziyà ngudi ne byà nàнку búngi

cyanààna, kàdi kî—kàdi kî—kî—kî. . . Nzambi kàtu Yéyè naabi nànsha.

<sup>30</sup> Mpindyewu, mònaayi aba, ànu nàнку too ne mùdibi byènda biya mpindyewu, pàdiye ùkafika ku banyaàbanya, èkèleeziyà's. Cikondo cyà beena Mpenta cyàkalwa. Ncyà bushùwà ne aci cyàkakòsa bikùnàkùnà bùngì cyanààna. Pashiishe cyàkenza cinyi? Cyàkashiya ànu ba-Méthodistes ne ba-Luthériens bônso paanyimà.

<sup>31</sup> Mpindyewu Nyumà Mwîmpè mmushiye cikondo cyà Mpenta kule kutàmbe. Cyàkenzàbo ncinyi? Bààkadyènta bulongolodi, bôbò biine ne: “Twètù tudi Assemblées de Dieu.” “Twètù tudi ba-Unitaires.” “Twètù tudi ba-Binitaires.” “Twètù tudi Église de Dieu.” “Twètù tudi *cikampànda*, anyi *cikansanga*. Wèwè kùyi aku to, kwèna mwà kubwela mu Dyulu pawikalà kùyi ne dîna dyèbè kifùnda mu mukànda wètù twètù to.” Kaa, macimbu's wè! Nànsha wèwè mwikàle Baptiste, Méthodiste, Presbytérien, fùnda dîna dyèbè mu Mukànda wà Mwoyi pàdi Nzambi ùdìfùndamù apu. Piikalàbi ne wèwè ukààvwa mudyànjila kulongolola ku Mwoyi wà Cyendèlèlèlè, Nzambi neàkubiikile mu mùshindù kampànda, nànsha bìshi, mu mùshindù kampànda—kampànda anyi mùshindù mukwàbò. Ncyà bushùwà ne Yéyè neàkubiikile. “Bwònsò bàdi Taatù muMpèeshe nebàlwe kùNdì.” Nànsha wèwè mwikàle wa mu èkèleeziyà kaayi, aci kaciyèna ne bwalu to. Kàdi dîngumba kadyàkukwenzelakù cintu nànsha cîmwè to, kàdi ndifwànyine kukupangisha bikolè bwà wèwè kutùngùnuka ne Nzambi, kàdi kadyà—kadyàkwenzakù cîngà cintu nànsha cîmwè to. Didì dyòdì dikusanga ne musumbà wà beena kwitabuuja ne beena bupidyà. Mu bushùwà bwà bwalu, udi utwilangana ne cyòci aci kwònsò kùyaaya, ne bàvwa ne cyà nàнку nànsha mu Dyulu mwine. Pa nàнку, bidì ànu bîmpè, kàdi wèwè udi weyemena dîngumba dyènù. Ikàlà mweyèmene Yesù, Yéyè ngudi ukèngela kweyemena.

<sup>32</sup> Mpindyewu patùdi munkaci mwà kupweka buludi batàngile ku. . . bàvwa. . . Mbanganyi. . . Ngeela meeji ne mukàji ewu ùvwa mwelè cyanza muulu ne, wèwè udi mulonge bipaapu byà misàkà. Nudi bamanye's, cipaapu cyà musàkà aci kacya kacyaakaashiibwakù mùsongà nànsha, mmwòmò anyi? Kacya kacyaakatèèkiibwakù dibwe dyà ku mùsongà pòpù to. Kacya, dyòdì diine kabàvwa mene mwà kudipetakù to. Kî mbamanye ne cidì cidyènzèkèle ncinyi to. Bwà cinyi? Dibwe dyà mùsongà adi kadyàkatèèkiibwapù bwà cinyi, dibwe dyà mùsongà adi, ku lusongo kwàci aku? Bwalu Yeyè wàkabèngiibwa pàakalwàYe. Yéyè nguvwa Dibwe dibèngiibwe adi. Ncyà bushùwà. Kàdi necyàshiibwe mùsongà. Ncyà bushùwà. Ne pashiishe mabwe àdi àkumbananganà ku nyungulukilu wa Dibwe dyà mùsongà adi awu, nebikengelè bwà kwikalawu mabwe ikàlà mafwànàngàne ànu menemene ne Dibwe adi, diikalà mwà kukumbanangana naaci adi, àtwàngana mu mwaba wònsò—wònsò. Cipaapu cyà

musàkà aci ncipwàngàne ànu menemene mu mùshindù wà kùyiku mwà kupicisha kapaaya kèètù aka munkaci mwà mabwe awu to, mwaba wùdi mabwe awu matwàngàne awu. Ngiibàkilù mulenga wa dikèma bu awu's. Àmwè à ku wòwò àwwa mafwànyine kwikala ne bujitu bwà nkàmà ya binunu byà kilò muulu mu lupeepèlè amu, kàdi mashikika matwàngàne mu mùshindù mupwàngàne menemene.

<sup>33</sup> Mùshindù awu ngùdi Nzambi ùfikisha Èkèleeziyà Wendè. Twètù tudi batwàngaja bakùmbànàngàne ànu menemene, ne mwoyi wùmwè ne diyè òmwè. Mpindyewu muntu kampànda ùjuuka wàmba ne: “Èè, ba-Luthériens kale wàwa kabàwva ne kantu nànsha kàmwè to.” Kanwítabuujikù aci to. Ba-Luthériens nebàlwe mu dibìika dyà ku lufù ànu mwàlwà bakwàbò bwònsò mu dibìika dyà ku lufù amu. Ba-Baptistes, ba-Presbytériens, ne bàna bàà Nzambi bònsò, nebàlwe mu dibìika dyà ku lufù adi. Nènku ki bwà cinyi leelù ewu bantu bàdi bàmba ne: “Kaa, èè, nekùpatukè ditabuluja dikolè mwab'ewu dyàsùngilà beena Mpenta miliyò lukàmà. Bònsò nebàsùngidiibwè ne Dyambwibwa nedyènzekè.” Udi mutùpàkàne. Dyambwibwa adi nedìikalè dyà bantu binunu nkàmà, ncyà bushùwà, kàdi's nebìikalè cipeta cyà bidimu binunu bisambòmbò byà lupàndu bisanga, bidimu binunu bisambòmbò bikaadi bipite abi. Muntu ùdi wèndela mu Bukènkè pàdi Bukènkè bulwa kùdiye, ùdi ùsabuka bilamba pàdiye ùfikapù. Mpindyewu, yèyè muBùbènge, dîbà adi ùdi ùshààla mu mîdimà. Kàdi yèyè mutùngùnuke ne kwenda kuya!

<sup>34</sup> Mpindyewu, mònaayi, nènku Dilwà dyà Mukalenge Yesù dìdi pabwîpi menemene mu mùshindù wà ne Nyumà udi mufùmine lwà mwinshi emu awu. . . ànu ndambù cyanààna wa dibingishiibwa, dijidiibwa, dibàtiiza dyà Nyumà Mwimpè, ne mpindyewu kubwela buludi mu cikondo cyà dilwa dyà Dibwe dyà mùsongà. Èkèleeziyà ùdi ne cyà kwikala mufwànàngàne menemene ne Kilistò mu mùshindù wà ne Kilistò ne Èkèleeziyà bàdi mwà kudisanga, Nyumà ùmwèumwè awu. Ne Nyumà wa Kilistò Yèyè munda mwèbè, Ùdi ùkufikisha ku diikala ne nsòmbelu wa Kilistò, ku dyenza maalu à nsòmbelu wa Kilistò, ku dyenza dyà byenzedi byà Kilistò. “Ewu udi uNgiitabuujà, byenzedi bîNdi ngènta yèyè neàbyènzè pèndè.” Yesù ngwàkamba nàнку. Nwamònu anyi? Mpindyewu netwikalè mwà kupeta, tudi ne mudimu wà bwambi wùlwalwà wùdi mufwànàngàne ànu menemene ne nsòmbelu wa Kilistò. Mudimu wà bwambi awu wùdi wùmanyisha cinyi? Dilwa dyà Mukalenge.

<sup>35</sup> Cìtàngilaayi pa buloba leelù ewu, ne tàngilàayi cidi Khrouchtchev munkaci mwà kwamba, bikwàbò bintu binène ebi, ne ndululu minène yà buloba bujimà yidi pabwîpi menemene eyi, pa dîbà kanà dyònsò, s'mbifwànyine kutudika mu kasunsukila kàà kasunsa kanà kònsò. Ncyà bushùwà's. Ne byòbi nàнку, tudi tumanya ne cikaadi pabwîpi. Muntu kanà yònsò

wa luumvu ewu's ùdi mwà kubala mu cibejibeji anyi kuteeleja ku cisanji, ne kumanya ne cikaadi pabwipi. Èè, nwavùlukaayi ne, Kilistò ùdi ùlwa bwà kwangata Èkèleeziyà Wendè kumpàla kwà cyôci aci kwenzekaci. Pa nàнку Dilwa dyà Mukalenge Yesù dikaadi pabwipi pàà mùshindù kaaayi's? Pàmwàpa kumpàla kwà disangisha edi kujikadi dilòlò edi's. Tudi ku cikondo cyà nshìikidilu. S'ncyà bushùwà ànu cyètù cyà menemene eci.

<sup>36</sup> Tàngilàayi numòne èkèleeziyà mùdiye mulwè, mùdiye muyè kumpàla. Anjì cyàngàtaayi ànu cyanààna mu meeji ènù amu, nwènù balongi bàà maalu-malonda bàtù balongà maalu-malonda abu. Tàngilàayi èkèleeziyà wa ba-Luthériens mu dibingishiibwa, muçikàle upàtukilakù mu cyena Kàtòlikè, mutàngilaayi mùdiye muyè kumpàla. Pashiishe tàngilàayi mùdi Wesley wènda útamba kusemena ndambù, ùbwela mu dijidiibwa, útùkina mu Mifundu. Tàngilàayi buludi lwà pankaci apu, cikondo cyà Wesley aci. Pashiishe cintu cyàkalondà cyàkalwà civwa ncikondo cyà Mpenta. Nènku cikondo cyà Mpenta ne dyalujulula dyà mapà, mapà à Nyumà. Mpindyewu, tàngilàayi cikondo cidi munkaci mwà kubànda mpindyewu too ne ku Dibwe dyà mùsongà. Nudi bamòne cindi njinga kwamba aci anyi? Dilwa dyà Mukalenge, cidi cimanyìshìibwe. Nzambi ne bifukiibwà byònsò mbindile bwà èkèleeziyà àpetè kaaba kèndè.

<sup>37</sup> Lutatu leelù, mèmè...pàmwè ne bantu bònsò bándiku mutwilàngane naabò. Bààkampàtula, tuvwa twangata...Bidi bikèngela bwà mèmè kupicila ku diteeta dyà mubidi, nudi bamanye's, piikalàbi ne tuyààya dyàmwàmwà dyà mbù, nwènù bampandanjila ne bakwàbò nudi bamanye aci. Pàmvwà mpicila ku diteeta adi bàvwa bapàtùke naanyi mu cibambalu amu kuntwaku, mvwa nnwa bintakanyi byà kale abi...bimwèka kùndi bu musabusabu, anyi bukula, anyi cintu kampànda nàнку awu, nènku mvwa—mvwa munkaci mwà kubinwa. Ki mèmè kupàtuka pambèlu apu, kusòmbela panshì, kushààla mwindile tusunsa makumi àsàtù bwà kumòna ní bìvwa mwà kupàtuka munda mwanyi anyi to. Mèmè kutangila luseke lukwàbò lwàlwa, nyawu kùvwa mukàji kampànda mukesè, ùmwèka ànu bu ne ùvwa pabwipi ne kufwà. Ùvwa bu...tukolo tukesè ne tuboko tukesè. Nènku mèmè kutungunuka ngenda mpweka nguumuka kùdi ewu muntu mulùme nya kùdi wàwa, kùdi ewu muntu mulùme kuya kùdi wàwa, ntàmba kuya ngenda nsemena mutàngile kùdi mukàji awu, too ne mungààlu kufika mwaba wùvwàye ùsanganyibwa awu. Ùvwa ne mmwènekelu wa muntu mukesè mukwàte ne byà luse mwikàle wamba kufwà. Ki mèmè kufika pabwipi nendè apu, kwamba ne: “Ùmfwilèku luse, mwàbàna.”

Yèyè ne: “Wetwàwu!” Kaa, ùvwa ùsaama byà bibi be!

Ki mèmè ne: “Udi umvwa cinyi?”

38 Yèyè ne: “Mvwa muyè ku Tucson bwà kuya kasamba mwanàanyi wa bakàji. Mémè kusaama, kî mbafike ku dyangula disaamà to.”

39 Mémè ne: “Cintu címwèpelè cîndi njinga kukukonka.” Mémè ne: “Mémè ndi muyiishi wa Èvànjeeliyò. Wèwè udi mwena Kilistò anyi? Udi mudilongolole bwà kuya bu dîbà adi mwà kulwa anyi?”

Ki yèyè ne: “Mémè ntu wa mu èkèleeziyà *kampànda*.”

40 Mémè ne: “Aci kî ndukonko lúndi mukwele to. Wèwè udi mwena Kilistò mùle tètè ne Nyumà wa Nzambi mwikàle mudilongolole bwà kuya pààkubiikilàYe anyi?” Mukàji awu kàvwa nànsha mumanyè ne címvwà ngamba ciine aci ncinganyi to. Nwamònu anyi? Kaa, mu mmwènekèlu mwine wa úkwàta ne byà luse mùdì bàà pa buloba bàsanganyiibwa's wè!

41 Mpindyewu, “mutùmanyshe maalu-masokoka à diswa Dyèndè,” dilwa . . . Ngànji nnuবাদileku cintu kampànda. Mvwa munkaci mwà kubala mu . . . Tùbuululàayi mpindyewu mwaba wa “bwalu-busokoka bwà diswa Dyèndè awu.” Twánjàayi kubuulula mu Ebèlu emu bwà katanci kakesè cyanààna, nshapità wa 7 wa Ebèlu, ngeela meeji ne nyèyè awu. Nènkú ndi muswè kunùbadilaku cintu kampànda cìdì cifwànyine kunufikisha ku didyùmvwakù bilenga be patùdì twela meeji ku diikala basòmbe pàmwè mu myaba yà mu Dyulu apa. Ebèlu, nshapità wa 7.

*Bwalu Melekisedekè ewu, (Tàngilàayi mpindyewu.)  
mfùmù wa Salemà, mwakwidi wa Nzambi mutàmbe  
bunène wa mu dyulu, . . .*

42 Bwalu-busokoka bùdì cinyi mpindyewu? Bwalu-busokoka mbwòbù ebu, tàngilàayi eci. Muntu ewu nganyi, “mwikàle wènzà, ùmanyisha, bwalu-busokoka bwà diswa Dyèndè,” Melekisedekè ewu? Ndi mwindile bantu bònso kaaba aka, bàcìdì munkaci mwà kubuulula Bibles. Ebèlu, nshapità wa 7, Pòlò ngudi wakula ewu, mufùndì umwèumwè wa Galàtiyà awu.

*Bwalu Melekisedekè ewu, mfùmù wa Salemà,  
mwakwidi wa Nzambi mutàmbe bunène wa mu  
dyulu, . . . yèyè wàkatwilangana ne Abraham pàrwàye  
ùfùma ku dishebeya dyà bamfùmù, ne wàkamubènesha;*

*Yèyè kàbìdì ngwàkapèèshabò citùpà kùdì Abraham,  
citùpà címwè pa dikumì cyà byònsò awu; dyàmbedi  
mwikàle dyumvwija, ku dyumvwija Mfùmù wa  
bwakàne, . . . paanyimà pàà aci. . . Mfùmù wa Salemà,  
(Ewu Muntu nganyi?) mbwena kwamba ne, Mfùmù wa  
ditalala;*

*Kàyi taatù, kàyi maamù, kàyi bankambwà, kàyi ne  
mbangilu wa matùkù, anyi ne ndekeelu wa mwoyi ; . . .*

43 Ewu Muntu ùvwa nganyi? Ùvwa nganyi? Kacya Yèyè kàvwakù ne taatù, kacya Yèyè kàvwakù ne maamù, kacya Yèyè kàvwakù ne dībà dyàkabangàYe, anyi kàvwakù ne cikondo cyà ne Yèyè wàdyàkufwàku to. Wàkatwilangana ne Abraham pàvwàye ùfuma ku dishebeya dyà bamfùmù. Cìvwàye wènza aci ncinyi? Ùvwa muyè bwà kwangata Lota, mwanààbo mujimine, bwà yèyè kumwaluja. Ki kushebeyaye bamfùmù abu; bàà bwalu, bamfùmù abu's bàvwa bàshebeya; ngeela meeji ne bamfùmù dikumi anyi dikumi ne bataanu, ne makalenge àbò. Kàdi Abraham yèyè wàkapèèsha basadidi bèndè byà mvità ne kuyabò bènda bàkèbangana nendè, kudìtapululaye bufùku, nwamònu's, pààkamukwàtaye mu mèbà à bufùku. Kaa, mwanèètù, twètù's tudi tukwàta mudimu mu mídima patùdi twakulangana apa, Bukènkè bùmwèpelè butùdiku naabu bùdi ànu Bukènkè bwà Èvànjeelìyò. Kàdi yèyè wàkaditapulula, ne wàkamukwàta ne wàkamwaluja. Kàdi mmu njila wa dyalukila amu, paanyimà pàà mvità mimane kujika!

44 Tuyaayi ku Genèsè 14, bwà katanci kakesè cyanààna, bwà kutàmba kutòkeshaku bwalu abu. Tuyaayi mu Genèsè emu, mu mwinây-. . .ngeela meeji ne ngwa dikumi ne mwi4, Genèsè 14. Èyowà, twàngatàayi Genèsè 14.18, bwà kubangilapu. Tùbangilàayi ànu kumpàla kwà cyòci aci ndambù. Tùbangilàayi, èyowà, ku mvensa wa 18, Genèsè 14.18: “Nènku Melekisedekè. . .” Mpindyewu, awu ng'Abraham mpindyewu mwikàle wàlukila ùfùmina ku dishebeya dyà bamfùmù. Mwikàle wàlukila, mu njila wa dyalukila amu, mwikàle wàluja Lota, ne bantu bònsò bàvwàbo bakwàte bayè naabò abu. Bònsò!

45 Byenze mùvwà Davidì, wàkaya ne kukwàta. . .Cyàkenza Davidì ncinyi? Wàkangata ndundu mukese wa nyuunyi, kuyaye ne kunyengaye mwànà mukese wa mùkòòkò ewu mukana mwà nyamà wa ntambwe. Elààyibi meeji ku ndundu wa nyuunyi, ùlonda mwànà wa mùkòòkò. Nganyi ku bàfwà ne ku bàbolà udikù mufwànyine kwenza cyòci aci? Ngambilaayi muntu wetù wa maci ne mèsù ewu kaaba aka udi mwà kucyenza, èlè cyanza muulu tǔng. Mémè's nènkwambile ne lukasa lwònsò ne udi mutupakane. S'nwamònu ne mémè ncyèna mwelè cyànyi cyanza muulu to. Bwàlà, mémè ncyènakù mufwànyine kumulonda ne cingoma cya 30-0-6 to, mbikolè. Kàdi yèyè wàkamulonda ne ndundu wa nyuunyi, cyenze bu kapese kakesè kàà ciseba kèètù aka, ne tuumilemu túbidi tuswikilakù, ùkànyungulula. Bwalu. . .Kàdi pààkalwà dībà dyà Golìyààtà bwà kudìtambishaye, yèyè kàdi kuyiilaye Golìyààtà awu, kwambaye ne: “Nzambi wa mu Dyulu wàkampà mwà kusungila mwànà wa mùkòòkò mukana mwà nyamà wa ntambwe, mukana mwà nyamà wa ours.” Ùvwa mumanye ne kacìvwa ndundu wa nyuunyi to. Cìvwa mbukolè bwà Nzambi bùvwà bukamufile. Ùvwa n'Yèyè wàkaaluja mwànà wa mùkòòkò awu.

46 Ne cyôci aci ki citùdi twétù twamba leelù ewu. Nzambi ùdi ne ba-Davìdi biimàne mánzàlànzála eku ne eku, èyowà's, mukalenge, munkaci mwà kudiisha mìkòòkò yà Taatù. Ne ku musangu ne ku musangu cyûjà cyà kansèrè necilwe, anyi kansèrè nekàlwe, anyi cintu kampànda, ne cibàfuka ngàngàbukà mu byanza. Aci kacýàkwimanyikakù Davìdi awu to, yèyè neàtùngùnuke ùpàtuka kwaka ùlondangana ne mukwètù awu, mwambule ndundu mukesè wa nyuunyi, wa ne: "Lombaayi cintu kanà cyònsò mu Dìna Dyànyi, necifidiibwe." Nànsha byôbì ne, bangàngàbukà bàdi mwà kuseka, ne bantu bakwàbò bònsò bàdi mwà kumwelulwila, yèyè neàmulonde nànsha byà kumòna lufù, wàluja mwànà wa mùkòòkò awu mu lupangu lwà mìkòòkò. Èyowà's, mukalenge. "Yèyè mmwànà wa Nzambi, umùshà cyanza cyèbè pambidi pèndè!" Kubyankulaye nyama wa ntambwe ewu panshì, pashìshe nyama wa ntambwe awu ùjuuka, kumukwàtaye ku mweði ne kumushebeyayè; kànà kàà balùme kakesèè kàà mubidi mukunzubile, kàà bujitu pàmwàpa bwà kilò makumi àsàtù ne yìsambòmbò anyi makumi anaayi.

47 Tàngilàayi. Melekisedekè, Mfùmù wa Salemà udi Mfùmù wa Ditalala awu, bu mùdibi mu bushùwà bwà bwalu ne Salemà ùdi ùsanganyibwa ku luseke lukwàbò lwà kakùnà alu. Yèyè m'Mfùmù wa Yelusàlèmà, ki cìvwàYe. Ki cìvwàYe menemene, Mfùmù wa Yelusàlèmà. Bu mùdibi ne, Yelusàlèmà ùvwa ùbiikidiibwa kumpàla ne n'Salemà, cìvwà ditalala; cìvwà n'Yelusàlèmà kumpàla, kumpàla kwà kubiikidiibwaci ne n'Yelusàlèmà. Yèyè ùvwa Mfùmù wa Yelusàlèmà. Ùvwa Mfùmù wa bwakàne, Mfùmù wa ditalala, Mfùmù wa Salemà. Kàvwa ne taatù, Kàvwa ne maamù, Kàvwa ne mbangilu wa matùkù, Kàvwa ne ndekeelu wa mwoyi, Kàvwa ne bankambwà nànsha. Kaa, kaa, kaa! Ewu Muntu nganyi's? Mukenkètaayi numòne. Paanyimà pàà mvità mimane kujika, paanyimà pàà bucimunyi bumana kwangata, tàngilàayi numòne cyàkambàYe. "Nènku Melekisedekè," mvensa wa 18, nshapità wa 14, wa Genèsè.

*Nènku Melekisedekè mfùmù wa Salemà wàkalwa ne dyàmpà ne mvinyò: ne yèyè ùvwa mvakwidi wa Nzambi mutàmbe bunène wa mu Dyulu.*

*Nènku yèyè wàkamubènesha, e kwambaye ne: Abram àbeneshiibwè kùdi Nzambi mutàmbe bunène wa mu Dyulu, mvena maulu ne buloba:*

*Ne Nzambi mutàmbe bunène wa mu Dyulu àbeneshiibwè, yèyè udi mufile beena lukuna bèbè mu cyanza cyèbè awu. Nènku kumupèeshayè cyàdiikumi cyà byònsò.*

48 Tuyaayibi kule ndambù ne dibala.

*Nènku mfùmù wa Sodomà wàkambila Abraham ne: Mpèeshè mèmè bantu, wàngatè bintu bwèbè wèwè.*



*Kàdi Abram wàkambila mfùmù wa Sodomà ne: Nyewu ndi mujuule cyanza cyanyi muulu kùdi MUKALENGE, Nzambi mutàmbe bunène wa mu Dyulu, mwena mauulu ne buloba ne, (Tèèlejàayi mùdiye mucikosoloje, hum, mùdiye mumwambileci!)*

*Ncyàkwangatakù kantu to kubangila ànu ku kanshinga kàà bwàndà too ne ku nshinga wa cisàbaata, ne ncyàkwangatakù kantu nànsha kàmwè to, kantu nànsha kàmwè kàdi. . . ne udi mufwànyine kwamba, ne kàdi kèèbè wèwè to, bwà kwikadi wàlwa kwamba ne: Mémè ngudi muwije Abram mubanji:*

*Pa kuumusha ànu bìdi nsongààlùmè yìdya, . . .*

<sup>49</sup> Mònaayi Melekisedekè ewu pàdiYe ànu ùtwilangana ne Abraham pàvwàye ùfuma ku dishebeya dyà bamfùmù apu. Bwalu-busokoka bwà Nzambi abu mpindyewu munkaci mwà kumanyishiibwa's! Yèyè ùvwa nganyi? Muntu nànsha umwe. . . Kabèenaku mwà kupeta bwalu-bulonda Bwèndè Yèyè nànsha bùmwè to, bwalu Yèyè kàvwakù ne taatù, Kàvwakù ne maamù, kacya Kàvwakù ne cikondo cyà ne Yèyè mmubange, kacya Kàvwakù ne cikondo cyà ne Yèyè ùvwa mwà kufwà to, ní Ùvwa nganyi Yèyè ùcidi ànu ne mwoyi. Kacya Yèyè kàvwakù ne mbangilu to, pa nànkù Yèyè kàvwakù mwà kwikala mùngà muntu to ànu El, Elah, Elohim; udi wikalaku nkàâyendè, udi musòmbèlè pàà nkàâyendè, Nzambi Wa bukòlè bwònsò awu!

<sup>50</sup> Yesù ùvwa ne Taatù, Yesù ùvwa ne maamù; Yesù ùvwa ne mbangilu wa matùkù, Yesù ùvwa ne ndekeelu wa mwoyi wa pa buloba. Kàdi ewu Muntu Yèyè kàvwakù ní nne taatù ní nne maamù to, amen, ní nne taatù ní nne maamù to. Yesù ùvwa naabo bònsò bàbìdi Taatù ne maamù. Ewu Muntu Yèyè kàvwakù ní nne taatù ní nne maamù to. Amen. Kàdi cyàkenzàYe ncinyi, paanyimà pàà mvità mimane kujika, paanyimà pàà Abraham mumane kwangata kaaba kèndè?

<sup>51</sup> Paanyimà pàà èkèleeziyà mumane kwangata kaaba Kèndè, tudi babiikidibwe ku ditèèkiibwa dyà bânà, ku Nyumà Mwimpè. Ne pàdi muntu yònsò wàngata kaaba kèndè, cidi Nzambi mumubiikidile bwà kwenzaye aci, ne kwimana kundekeelu kwà njila, kuya kalonda bajimine.

<sup>52</sup> Dyàmbedi, Pòlò ùdi wànji kuumusha bwòwà bwàci bwònsò, nànkù mpindyewu: “Wèwè mubiikidibwe, wèwè kùyi ànu musaluke cyanàànà mu meeji èbè ku tèdloji wa mùshindù kampànda to, wèwè mulediibwe bulelèlè kùdi Nyumà, díbà adi Nzambi ùkaavwa mudyànjlè kukulongolola kumpàla kwà difùka dyà dyulu ne buloba, mufunde dìnà dyèbè mu Mukàndà wà Mwoyi wà Mwànà wa mùkòòkò, nènku mpindyewu tudi tudisanga pàmwè bwà kusòmba mu myaba yà mu Dyulu mu Kilistò Yesù. Cisàmbà cyà cijila, ditùngà dyà cijila, cisàmbà cyà pawàci, bwakwidi bwà bukalenge, biikàle tulàmbula milàmbù

yà nyumà kùdì Nzambi, mbwena kwamba ne, mamuma à mishiku yètù yìdì yifila butùmbi ku Dìná Dyèndè.”

53 Bantu bàdi bàlwa apa bàmba ne: “Bantu abu bàdi ne mukupa.” Ncyà bushùwà ne bàdi naawu; lungenyi lwà Nzambi ndukùtākane bwà muntu, ne lungenyi lwà muntu ndukùtākane bwà Nzambi. Mmibèngàngane, elu ne elu.

54 Kàdi èkèleeziyà mulelèlè mûle tètè ne Nyumà, mûle tètè ne bukolé bwà Nzambi, basòmbe pàmwè mu myaba yà mu Dyulu, biikàle bàlambula milàmbù yà nyumà, disààmuna dyà Nzambi, Nyumà Mwîmpè ùkwàta mudimu munkaci mwàbò, ùjingulula mpèkaatù ne ùtândisha patòoke maalu àdì mabì munkaci mwàbò, ùàlongolola ne ùàlàndakaja ne ùòlola. Bwà cinyi? Misangu yònsò mu Bwikadi bwà Nzambi mùdi mùsanganyilbwa Mulàmù wà wùmata mashi awu.

55 Mpindyewu vùlukàayi ne, tudi bacikenkète mu dindà emu. Kwèna musùngìdìibwe ku Mashi to, udi *mulama* musùngìdìibwe kùdì Mashi. Kàdi udi musùngìdìibwe ku ngàsà, ku diitabuuja, mwikàle uCìitabuuja. Nzambi mmukookòle ku mwoyi wèbè bwalu Wàkadyànjlila kukulongolola. Wèwè kubàndùluka ne kuciitabuuja, kuciitaba. Mpindyewu Mashi àdì ènza difuta dyà cibawu bwà mpèkaatù yèbè. Vùlukàayi, mwawa mwambe ne: “Nzambi kèna ùpiisha ngènzàmpèkàatù bwà dyenza dyà mpèkaatù to.” Yèyè nngènzàmpèkàatù ànu kwine kwònsò aku. Yèyè ùdi ùpiisha mwena Kilistò bwà dyenza dyà mpèkaatù. Nènku bwalu Yèyè mmumupiishe, Kilistò wàkangata dipiila dyètù. Pa nànkù kakwèna dipiila bwà aba bàdi mu Kilistò Yesù, bàdi kabàyi bènda bilondèshìle musunya to, kàdi bilondèshìle Nyumà. Nènku wèwè mwenze cintu cibì, kì nku bukolé to. Kwèna wenza mpèkaatù ku bukolé to. Muntu udi wenza mpèkaatù ku bukolé, ùpàtuka ùya kenza mpèkaatù ku bukolé, awu kacya kàtukù mwanjì kubwela mu Mubidi awu to. Kàdi muntu ukàadiku mumùbwelè, yèyè mmufwè, ne mwoyi wèndè mmusokoka mu Nzambi, kupicila ku Kilistò, mutwà citampì kùdì Nyumà Mwîmpè, ne dyabùlù kèna mene mwà kumupetaku to, yèyè ùdi kule menemene muntwamu. Nebikèngelè bwà Yèyè kupàtukamu kumpàla kwà dyabùlù kupetaye mùshindù wa kumupeta. “Bwalu nudi bafwè!”

56 Ambila muntu mufwè mùdiye cyena lubombo kàdi ùmonè cìdì cyènzekà. Anjìbi kumutwa museba mu lubavu amu wàmbè ne: “wèwè cyena lubombo eci, wèwè,” yèyè kààkwambakù díyì to. Nènku ncyà bushùwà, yèyè neikalè ànu kacya wàdyòlola mwaba awu.

57 Nènku muntu udi mufwè mu Kilistò, wèwè udi mwà kumubiikila ne ncyena lubombo, kumutwà mènà ònsò aùdiku muswè kumutwa awu, yèyè kààdyàkujuukilakù kuulu bwà bwalu abu to. Yèyè muswè kwenza cintu, ncyà kudifinda kuya mwaba kampànda bwà kakusambidila. Ncyà bushùwà. Kàdi, kaa, bàmwè bàà kùdìbò's bàdi ne mwoyi ànu wètù wà menemene

ewu. Ki cîndi mêmè ngeela meeji's, twètù tudi ne cyà kwikala tujiika bantu bafwè. Aba bàdi bafwè mu Kilistò, tudi tubàjiika mu mâyi. Mîngà misangu tutu tujiika bantu bapitepite bûngì bacîkàle ne mwoyi, budimu ne makokyanganyi ne tûyaayi, ne biine abi bidi bûngì cyanààna mu èkèleeziyà. Kàdi kî ntwètù bàdi mwà kutàpulula abi to, kàdi Nzambi ngudi ubitàpulula. Yèyè mmumanye bantu Bèndè. Yèyè mmumanye mikòòkò Yèndè. Yèyè mmumanye díyì ne díyì dyònsò. Yèyè mmumanye bânà Bèndè. Yèyè mmumanye udiYè mwà kubiikidila ku luseke, Yèyè mmumanye udiYè mudyànjlile kulongolola. Yèyè mmumanye udiYè mupèeshe bintu ebi, kùdiYè ùDimwèneshila. Mùshindù wùdiYe . . . Nzambi ùdi mwà kutèeka dyeyemena mu bânà Bèndè, pa cìdi cikèngela kwenza, mumanye ne bôbò nebàcyènzè ànu mu cyôci.

58 Nudi nwitabuuja ne Nzambi ùdi wènza nàнку anyi? Mòna's, Sàtaanà wà—wàkambila Yobò dîngà ditùkù . . . wàkambila Nzambi dîngà ditùkù ne: “Èyowà's, Wèwè udi ne musadidi.”

59 Nzambi kwambaYè ne: “Kakwèna pa buloba apa udi bu yèyè to. Yèyè mmuntu mupwàngàne.” Ùvwa mumweyèmène.

60 Sàtaanà wàkamba ne: “Kaa, èyowà's, yèyè's ùdi ne byònsò ànu bipeepèle. Lekela mêmè mmutwè ànu byanza katanci kakesè nènku nèmufikishe ku diKwela dyà mulawu muKutàngile mumpàla.”

61 Yèyè kwamba ne: “Nyèyè awu mu byanza byèbè, kàdi kwangaci mwoyi wèndè to.” Nwamònu anyi? Ne kwenzaye byònsò pa kuumusha kwangata kwà mwoyi wèndè.

62 Kàdi, kaa, Yobò, pamutù pàà . . . cyàkenzàye ncinyi? Yèyè wàkeela Nzambi mulawu pàakangatà Nzambi bânà bèndè, pàakamwenzelàye bintu byònsò bibì ebi, ne bikwàbò byònsò anyi? Yobò kààkeelakù nkonko nànsha. Yèyè wàkatwà mpàla panshì ne wàkakuukwila. Àlèluuyàh! Kwambaye ne: “Mukalenge nguvwa mufile ne Mukalenge ngwǎngàci, Dîna dyà Mukalenge dibèneshiibwè!” S'ki bwalu mbwòbù abu.

63 Nzambi ùvwa mumanye dyeyemena divwàYe naadi kùdi Yobò. Nzambi mmumanye mùshindù wùdiYe mwà kukweyemena wèwè awu. Yèyè mmumanye mùshindù wùdiYe mwà kungeyemena mêmè ewu. Kàdi citùdi twamba mpindyewu ndishikika dyà mwine mwànà ewu.

64 Mpindyewu, pàdi Bible . . . Pàdi mvità yijika yònsò, pàdi byònsò bijika, dibà adi cintu cidì cilondà citùdi twenza ncinyi? Cintu citùdi twenza ncinyi paanyimà pàà mvità mimane kujika? Nukààvwakù bamanye citùdi twenza anyi? Tudi tutwilangana ne Melekisedekè. Tùbuululàayi mu Maatàayi 16.16, lukasàlukasà, bwà tumòne ne mmwòmò anyi kî mmwòmò. Maatàayi Munsantu, nshapità wa 16 ku mvensa wa 16. Ndi mutwishiiibwe menemene ne mmwòmò, Maatàayi 16.16. Maatàayi dikumi ne isambò . . . To, kî mmwòmò to, kî ncifwànyine kwikala pabwipi mùshindù

awu to. 26.26. Kaa, 16 kaaba aka, mpàdìYe wàkula ne Simonà Peetèlò; mfwilaayiku luse, ncivwa ne meeji à kwamba aci to. 26.26 awu, bwalu ànu ku didyà dyà dilòlò dyà ndekeelu aku, ki kúndi nteeta bwà kuya kafika. Maatàayi, nshapità wa 26 ku mvensa wa 26. Mpindyewu twàmupeci, mpòpò apa, ku didyà dyà dilòlò dyà ndekeelu adi.

*Nènku pàvwàbo munkaci mwà kudyà apu, Yesù wàkangata dyàmpà, ne wàkadibènesha, ne wàkadìcibula, ne wàkadipèesha bayiidi Bèndè, ne wàkamba ne: Angàtaayi, dyàyi; eci mmubidi wànyì.*

*Ne yèyè wàkangata lupànza, ne wàkasàkidila Nzambi, ne wàkabàpèeshalù, wàmba ne: Lùnwaayi bònso;*

*Bwalu eci mmashi ànyì a dipungila dipyadipyà, àdì meediibwe panshi bwà bàabungi bwà dilekelediibwa dyà mpèkaatù (m-p-è-k-a-a-t-ù, mpèkaatù, beena Kilistò bàdì bènza maalu mabì).*

65 Èyo: “Kàdi—kàdi . . .” Tèèlejàayi, mvensa wa 29.

*. . . Ndi nzwambila ne, kubangila ku leelù ncyàkunwà maluwu à tumuma twà mvinyò to, too ne ku ditùkù adi dngàànwà neenù mpyamàpyà mu bukalenge bwà Taatù wanyì.*

66 Cinyi? Cintu cìmwècìmwè cyàkenzà Melekisedekè aci paanyimà pàà Abraham mumane kwangata kaaba kèndè. Mutèèke bantu bèndè mu bulongame, ne mucimune mvità ayi, ne mwalukile kwèndè kumbèlu, ki Melekisedekè kulwa ne dyàmpà ne mvinyò. Paanyimà pàà mvità mimane kujika, dîbà adi netùdye Didyà dyà Dibanji pàmwè ne Mukalenge Yesù mu buloba bupyabùpyà. Kaa, Dîna dyà Mukalenge dibèneshiibwè's wè. Èyo.

67 “Maalu-masokoka à diswa Dyèndè, bilondèshile disànka Dyèndè dîmpè,” twàlukilàayi mpindyewu kàbìdì mu Efèsò, 9, “dìdiye mudipàngàdikile munda Mwèndè Yèyè mwine.”

*Bwà mu cipungu cyà kaabujimà kàà cikondo . . .*

68 Nènku vùlukàayi ne, twàfumu ku dicishiya katùyì bacitàngile to. Efèsò, nshapità 1, mvensa wa 10.

*Bwà mu cipungu cyà kaabujimà kàà cikondo . . .*

69 Mpindyewu, tudi bayiilè ne kaabujimà kàà cikondo nkindile cinyi? Kaabujimà kàà cikondo cyònsò nkòong, cikondo cyàjikà mpèkaatù, cikondo cyàjikà lufù, cikondo cyàjikà mabèèdì, cikondo cyàjikà mpèkaatù, cikondo ciikalà dinyangakaja dyònsò (dìdì dinyangàkàje bintu adi, bìdì dyabùlù munyangakaje abi), cyàjikabi, pàajikà cikondo cyòci ciine. Tàngilàayi.

*Bwà mu cipungu cyà kaabujimà kàà cikondo bwà yèyè wàmòna mwà kusanga . . . mu cintu cìmwè bintu byònsò mu Kilistò, byònsò ne bìdì mu dyulu, ne bìdì pa buloba apa; munda mwèndè mene:*

70 “Kusanga bintu byônsò pàmwè mu Kilistò.” Múngãmbì mu dindà emu amu, tuubimpòkòtò tukesè twônsò tutùdi tusangana, tuntu tukesè twà butùmbi etu, udi mwà kutupela mu Genèsè, udi mwà kutùnnonena mu Ekèsòòdè, udi mwà kutùnnonena mu Lewitikì, ne kuya naatu nàнку too ne ku ndekeelu, ne mu Bwàkabuulwibwà nebikajikile ànu ku diikala Yesù. Angàtaayi Yözefù, angàtaayi Abraham, angàtaayi Izàkà, angàtaayi Yakòbò, angàtaayi Davìdì, angàtaayi cyônsò cyà ku bimpòkòtò abi, balùme bàà Nzambì abu, kàdi numòne ní kanwèna numòna Yesù Kilistò muleejìbwe patòòke mu yônsò wa kùdìbo. “Bwà Yèyè wàmòna mwà kusanga bintu byônsò mu Umwèpelè, Kilistò Yesù.”

71 Mpindyewu, patùdi tutàmba kuya kule ndambù mpindyewu, mpindyewu mvensa wa 11.

*Mu yèyè kàbidì tudi bapete bumpyànyì, . . .*

72 Kaa, “bumpyànyì.” Bikèngela bwà muntu ikalè mukushìile cintu kampànda, bwà wèwè kucipyàna. Mmwómò anyì? Bumpyànyì’s! Mbumpyànyì kaayi butùdi naabu? Mbumpyànyì kaayi búmvwà naabu? Ncìvwa naabu nànsha búmwè to. Kàdi Nzambì wàkanshìila bumpyànyì pàakafùndàYe dínà dyànyì mu Mukàndà wà Mwoyi wà Mwànà wa Mùkòòkò kumpàla kwà difùka dyà dyulu ne buloba.

73 Kaa, wèwè udi wamba ne: “Mpindyewu, anjì indilabi kakesè tũng, mwanèètù, Yesù’s wàkenza aci pàakakufwilàYe apu.” To, kacya Yèyè kààkenzakù aci to. Yesù wàkalwa bwà kumpetela bumpyànyì abu. Balààyi mvensa udi ulond- . . .mulongo mene wùdi wùlondà awu.

*Mu yèyè twètù pèètù tudi bapete bu . . .bapete bumpyànyì, biikàle badyànjila kulongolola bilondèshìle kiiipàcilà kàà ewu udi wenzeja bintu byônsò bilondèshìle mubelu wà diswa dyèndè dimpè yèyè mwine,*

74 Nzambì, kumpàla kwà difùka dyà dyulu ne buloba, mutùdi bacyàkùle mu kulonga kwà dìleesònà adi, nwènù bakwètù, mutwàmònu ne Nzambì ùvwa wikalakù nkààyèndè, mùvwàbi ne mu Yèyè mùvwa dinanga. Mu Yèyè mùvwa ne cyà kwikala Nzambì; kakùvwa cintu nànsha cìmwè bwà kuMukuukwilaci to. Mu Yèyè mùvwa ne cyà kwikala Taatù; mùvwa . . .Yèyè ùvwa Nkààyèndè. Mu Yèyè mùvwa ne cyà kwikala Musùngidi; cintu nànsha cìmwè kacìvwa cijimìne to. Mu Yèyè mùvwa ne cyà kwikala Mwondopi. Ki byambùibwà Byèndè mbyòbì abi. Kakùvwakù cintu nànsha cìmwè mwaba awu to. Pa nàнку Yèyè Mwine, mubelu Wèndè Yèyè mwine mwimpè awu kupàtulawu bintu ebi, bwà ku Muntu ùmwèpelè ewu, Kilistò Yesù, Yèyè wàmòna mwà kubisangisha byônsò cyàkàbidì. Kaa! “Cìdì dísù kadìyì dimòne, cìdì dicì kadìyì . . .” Kabyèna bikèmesha to mùdici cintu cyà kacìyì cyumvwika’s!

<sup>75</sup> Tàngilàayi ne: “mudyànjile kutulongolola ku bumpyànyì ebu.” Mémè mwikàle mupyànyì wa cyà bushùwà wa cintu kampànda, Nzambi Yéyè ùkookola ku mwoyi wànyì wàmba ne: “William Branham, Ndi mukubiikile kùkaadi ntántà mule, kumpàla kwà difùka dyà dyulu ne buloba, bwà wèwè kuyiisha Èvànjeeliyò,” ndi ne bumpyànyì, bumpyànyì bwà Mwoyi wà Cyendèlèlè. Mpindyewu, Nzambi wàkatùma Yesù bwà kuvwijaYe bumpyànyì abu bwà cyà bushùwà bwànyì mémè, bwalu kakùvwakù cintu nànsha cimwè cìmvwà mémè mwà kwenza bwà—bwà kubùpyàna to. Bùvwa bujimà, bùvwa bwà cyà bushùwà, kakwena cintu nànsha cimwè cìmvwà mémè mufwànyine kwenza to. Kàdi mu kaabujimà kàà cikondo Nzambi kutùmaYè, pa dībà Dyèndè Yéyè mwine dīmpè, kutùmayè Yesù Mwànà wa mùkòòkò, mushebeya kacya ku difùka dyà dyulu ne buloba. Mashi Èndè àkeediibwa panshi bwà ngaamòna mwà kuya ku bumpyànyì bwànyì. Bwà kwikala cinyi? Bumpyànyì kaayi? Buumwànà, bwà kwikala mwànà wa balùme wa Nzambi.

<sup>76</sup> Kàdi mpindyewu Eci cidi ànu mwà kunufudisha mipùuyà yà munda byà bafwànyine ne kufwà. Kàdi nukààvwakù bamanye ne bantu bàdi bânà bàà Nzambi bàdi banzambi bàà twànàtwànà anyi? Mbanganyi bàkaadiku bamanye nànkù? Mbanganyi bàdiku bamanye ne Yesù wàkamba nànkù? Mu Bible, Yesù wàkamba ne: “Mikenji yènù, yôyi miine, kayitukù myambe ne nudi ‘banzambi’ anyi? Nènku panwikalà nubàbiikila ne mbanzambi...” Byôbi biine, Nzambi’s mmwambe mu Genèsè 2 ne bàvwa banzambi, bwalu ki cìvwàbo, bàvwa ne bukòòkeshi mu kaabujimà mu mwaba wà bukòòkeshi bwà buloba awu. Yéyè wàkamupèèsha bukòòkeshi pa bintu byònsò. Kàdi yéyè kujimija bunzambi bwèndè abu, yéyè kujimija buumwànà bwèndè, yéyè kujimija bukòòkeshi bwèndè, ne Sàtaanà kubwàngataye bwònsò. Kàdi, mwanèètù, twètù’s tуди bindile dimwèneshiibwa dyà bânà bàà Nzambi biikalà mwà kwalukila ne kubwàngatulula bwònsò. Bindile kaabujimà kàà cikondo, piikalà cipaapu cyà musàkà cibànde too ne ku lusongo, pààmwèneshiibwà bânà bàà Nzambi mu kaabujimà kààbò, pààpàtukà bukòlè bwà Nzambi bwènda bwènda tamàkatamàka (aleluuyah) ne kunyenga Sàtaanà bukòlè ne bukòlè bwònsò bùvwàye mumunyenge abu. Èyowà’s, mukalenge, mbwèndè yéyè.

<sup>77</sup> Yéyè ki Logos wàkapàtuka munda mwà Nzambi awu, aci’s ncilelèlè, ùvwa m’Mwànà wa Nzambi awu. Pashiishe kwenzaYe muntu nzambi mukesè awu. Nènku Yéyè wàkamba ne: “Piikalàbi ne bàdi bàbiikila aba bàvwà Dìyì dyà Nzambi dilwa kùdìbo, bapròfetà abu, piikalàbi ne bàdi bàbiikila aba bàvwà Dìyì dyà Nzambi dilwa kùdìbo ne ‘mbanzambi’...” Ne Nzambi nguvwa mwambe nànkù awu, Yéyè mwine, ne bàvwa banzambi. Wàkambila Mòsà ne: “Ndi mukuvwije wèwè nzambi, ne muvwijè Aalònà mupròfetà webè.” Amen. Yoyòyò!

Ndi mwà kwikala ngenza maalu bu mwena katombùtombù wa mu ntèndeleeu's, kàdi kî ncindî to. Kaa, pàdi mèsù ènù mwà kutabala bwà kumòna bintu abi. Èyo. Yèyè wàkenza muntu nzambî, nzambî mu mwaba wèndè wà bukòokeshi. Ne mwaba wèndè wà bukòokeshi wùyààya kuumukila ku mbû too ne ku mbû mukwàbò, kuumukila ku mwelelu wà mâyi too ne ku mwelelu mukwàbò wà mâyi; yèyè ùdimù ne bukòntononyi.

<sup>78</sup> Ne pàakalwà Yesù, mwikàle Nzambî Umwèpelè wa kàyi mpèkaatù, Yèyè wàkacîjaadika. Pàakatuutà mpeepèlè, Yèyè wàkamba ne: “Ditalala, puwaayi!” Amen. Kàdi bwà mucî, Yèyè wàkamba ne: “Muntu nànsha umwe kàdikù cimuma cyèbè to.”

<sup>79</sup> “Bulelèlâ, Ndi nzwambila, nwènu bàdi banzambî bakesè aba ne, wèwè mwambile mukùnâ ewu ne: ‘Tentèmùkâ,’ ne kùyî wela mpatà mu mwoyi wèbè to, kàdi witabuuja ne ciwàmbî aci necyènzekè, udi mwà kupeta ciwàmbî aci.”

<sup>80</sup> Alùkilaayi buludi ku Genèsè, ku cyà ku cibangidilu, cìdi ncinyî? Patùdi twakulangana apa buloba ne bufùki bidi munkaci mwà kutwà mikèmu, byèla mbila, bintu byònsò bidi munkaci mwà kusubakana. Bwà cinyî? Bwà dimwèneshiibwa dyà bânâ bàà Nzambî, piikalâ bânâ balelèlâ, bânâ balela, bânâ buujiiibwe tèntè mwà kwakula ne díyi dyàbò ditwibwa nyama ku mikòlò. Ndi mémè ngiitabuuja ne tukaàdi ku mwelelu waci mpindyewu mene. Èyowà's, mukalenge. Ambila mukùnâ ewu díyi, biikalè nànkù.

<sup>81</sup> “Mwanèètù, ndi—ndi njinga bwà *cikampànda*, bwà cintu kampànda cyènzekè. Mémè's ndi mwena kwitabuuja mu Yesù Kilistò.”

<sup>82</sup> “Ndi nkupèeshaci mu Dîna dyà Mukalenge Yesù Kilistò.” Amen. Ki dimwèneshiibwa ndyòdi adi.

<sup>83</sup> “Kaa, mwanèètù, byà pa madimi byànyî's ki kuuminyinabi eku kuntu kwàka. Ncyèna mupeteku mvula nànsha mukèsè to.”

<sup>84</sup> “Nènkutùmìnè mvula, mu Dîna dyà Mukalenge.” Apu ki mvula wâlwa awu. Kaa, bwindile, bûtwa mikèmu, bufùki bujimâ bwindile dimwèneshiibwa dyà bânâ bàà Nzambî. Nzambî wàkatuma díyi bwà bwalu abu ku cibangidilu. Yèyè wàkapèesha muntu mwaba wà bukòokeshi.

<sup>85</sup> Yèyè wàkabùpèesha Yesù Kilistò, ne Yesù wàkabùfila mu Dîna Dyèndè, ne ditwishiiibwa edi ne: “Nùlombàayi Taatù cintu kanâ cyònsò mu Dîna Dyànyî ne Mémè nèncyènzè.” Kaa, Mwanèètù Palmer! Bwindile dimwèneshiibwa dyà bânâ bàà Nzambî, kaaba, Èkèleeziyâ!

<sup>86</sup> Mûngâmbî ne, Mukàndâ wà Efèsò m'Mukàndâ wà Yoshùwâ, ne Yoshùwâ mwikàle ùshikika bantu mu kaaba kàdi kààbò. Mpindyewu, bôbò kabâyi baswè kushààla bapùwe to, ne yèyè mutèèke Efâlâyimâ *apa*, ne pa mwaba wa Maanàsè, ne ewu nùnkù mufwànyîne kwalukila ne kubanga makokyanganyi ne dibinduluka, mwaba awu nebâpetanganekù bishi? pàdi umwe

wàmba ne: “Mémè ndi Baptiste, mémè ndi Méthodiste, mémè ndi mwena Mpenta, mémè ndi Unitaire, mémè ndi Binitaire, mémè ndi mwena *Cikampànda*.”

<sup>87</sup> Nenùpitè ne bwalu abu bìshi? Puwayi! Nzambi mmuswè kushikika Èkèleeziyà Wendè, bânà bàà balùme ne bàà bakàjì bàà Nzambi. Nzambi, itàbàku bwà nshaale ne mwoyi too ne ku dimòna dyà ciine aci, ki dyànyì disambila ndyòdi adi. Cidi pabwìpì mu mùshindù wà ngamba ànu kucilenga ne byanza, mùdibi bìmwèka’s. Cidi ànu pabwìpì apa. Ki cìntù mujingèjinge bwà kumòna, mwindile cikondo cyà twenda tupweka ne mùsèèsù nunku, ki muntu mucìbukile panshì udi mulàadika pàapa wàwa, kacya ànu mu difù dyà mamwëndè: “Nì ng’argent nì nngòlò ncyèna naabi to.” Kaa, bindile dimwèneshiibwa dyà bânà bàà Nzambi, àlèluuyàh, pààDimanyishà Nzambi, pìimanyikàbo mabèèdi, pìimanyikàbo kansèrè, pìimanyikàbo màsaamà.

<sup>88</sup> Nudi nwela meeji ne kansèrè ncintu anyi? Bible mmwambe ne kùlwalwa cikondo cyàbolelà bantu ànu mu mibidi yàbò mene, ne tubangu-nyuunyi netùdye bitalu byàbò kumpàla kwà kabàyi nànsha banji kufwà to. Kansèrè kàdi ànu bu dìnù dísàama patùdi tukàfwànyikija ne bilwalwà abi. Kàdi, vùlukàayi ne, cintu cyà cìkwàcisha bwòwà aci cìvwa cikàndika bwà kulengaci aba bàvwà ne Cìtampì cyà Nzambi. Ki citùdi tudyènzeja bwà kwenza ncyòci aci mpindyewu, kubwela ne kushikikiibwa mu Bukalenge bwà Nzambi bilondèshile myaba kumpàla kwà bipùpù byà màsaamà bìdi bìkwàcishà bwòwà ebi kudikumabi. Kaa, bilenga kaayipu’s wè! Cipungu cyà cikondo, kaabujimà kàà cikondo, bumpyànyì.

*Mu yèyè twètù pèètù. . .bapetè. . .bumpyànyì, bìikàlè badyànjila kulongolola. . .*

<sup>89</sup> Bumpyànyì bwètù bwàkafidiibwa kutùdi munyì, ku cinyi? Didyànjila-kulongolola. Didyànjila-kulongolola didi ndidyànjila-kumanya. Mmunyì mwàkamanyà Nzambi ne Yèyè ùvwa mwà kukweyemena bwà wèwè kwikala muiishi? Didyànjila-kumanya Dyèndè. “Kí ng’ewu udi muswè anyi ewu udi unyeema, anyi ewu. . .Nzambi ngudi uleeja luse.” Ncyà bushùwà, didyànjila-kulongolola. Yèyè ùvwa mumanye cìvwa munda mwèbè. Yèyè ùvwa mumanye cìvwa munda mwèbè kumpàla mene kwà wèwè kulwa pa buloba. Yèyè ùvwa mumanye cìvwa munda mwèbè kumpàla kwà kwikalaku buloba bwà wèwè kulwapù. Ki—ki Yèyè awu’s. Ki Nzambi wa kàyi mikàlù awu, wa kàyi mikàlù. Twètù tudi ne mikàlù, tudi mwà kwela meeji ànu ne mikàlù.

<sup>90</sup> Bìdi byà musinga wàbùngì be bwànyì mémè, kacya ànu cìvwa cingenzèkèlè aci. Ncyèna mumanye to. Pàndi nkwèlèlè meeji, pàmvwà mwimane mwaba mwine awu bwà bikondo bikesè byà disànka abi, ndyambidila ne: “Kamwena maalaba to.” Kamùvwa makèèlèlè to, kamwèna bubèèdi to, kamwèna tunynganyinga nànsha. Kamwèna byà ndambù wa disànka,



pashiishe disànka bûngi cyanaànà to; byònsò bìdi ànu disànka dyangàtàngàne. Kaa, ekèlekèle! Kaa, pâmvwà mwimane mwaba awu mêmè kwamba ne: “Ncinyi eci?”

91 Dìyì adi kwambadi ne: “Eci ki dinanga dipwàngàne adi, ne cyònsò cyûkaadiku munange ne cyònsò cikaadiku cikunange bìdi neebè mwab’ewu mpindyewu.”

92 “Ne wêwè neütuleeje kùdi Mukalenge Yesù pààlwàYe, bu bivùlukilu byà mudimu wèbè wà bwambi.” Mêmè kumòna bantu bakàji balenga abu biimàne mwaba awu, bònsò banguupukila ne bèèla lubila lukolè ne: “Mwanèètù munanga, wa mushinga mukolè!” Mêmè kumòna bantu balùme abu ne nsukì mishitákàne ayi kunshingu kwònsò eku, bàlwa lubilu, banguupukila bàmba ne: “Mwanèètù munanga!”

Ki mêmè kudyàmbidila ne: “Eci cidi cyùmvwija cinyi?”

Yèyè ne: “Mbàà kwènù.”

93 Mêmè ne: “Bàà kwètù? Kî nkufwànyine kwikala ba-Branhams bûngi nàka to, s’nyawu bàdi miliyò.”

94 Yèyè ne: “Mbaùdi wêwè mukùdimwishe mucìma!” Àlèluuyàh! “Mbaùdi wêwè mukùdimwishe mucìma. Ng’aba bàdi...” Yèyè ne: “Udi umòna udi mwimane pààpa wàwa anyi?” Mukàji mutàmbe bulenga ûntù nciyikù mwanji kumòna to. Yèyè ne: “Ûvwa ne bidimu bipite pa makumi citèemà pawàkamulombolà kùdi Nzambi. Kabyèna bikèmesha to pàdiye wèla lubila ne: ‘Mwanèètù munanga apu.’” Yèyè ne: “Yèyè kàadyàkukùlakajakù kàbìdi to. Yèyè ùkaadi mushiye aci paanyimà. Udi pa bulenga bwà bunsòngà. Nyewu mwimane apa. Yèyè kèna mwà kunwà mâyi à mashika to, kèna naawu bwalu nànsha. Kèna mwà kudyòlola panshi bwà kulàalayè tulù to, bwalu kèna ùcyòka to. Kakwèna ní mmàalaba, ní mmakèlèlè, anyi ní ncinyi cyònsò to. Tudi mu Cyendèlèlè mpindyewu. Kàdi ditùkù kampànda dyà butùmbi Mwànà wa Nzambi nealwe, ne wêwè neùlumbulwishiibwe bilondèshile Dìyì dyùdi mubàyiishe.” Kaa, mwanèètù!

Mêmè ne: “Nebikèngelè bwà Pòlò kulwaye ne kèndè kasùmbù anyi?”

“Èyowà’s, mukalenge.”

95 Mêmè ne: “Ndi muDiyiishe menemene ànu mwàkaDyàmbà Pòlò. Kacya ncitukù museesùke to, kacya ncitukù mwelemu twitabàayi yà èkèleeziyà anyi ní ncinyi cikwàbò to. Ntu mêmè mushàale ànu mwànyì ne kale.”

96 Ki bôbò bònsò ne dìyì dimwè kwelabò lubila lukolè ne: “Aci tudi bamanye! Tudi biimànyìnepu ne ditwishiibwa dyònsò.” Bôbò ne: “Wêwè neütuleeje kùdiYe, ne pashiishe netùye bònsò cyàkàbìdi pa buloba, bwà twètù kusòmbelapù kashidi.” Kaa, ekèlekèle!

97 Ànu dîbà adi mêmè kubanga kwalukila mu mêmè. Mêmè kutangila, pa bulààlu apu, mêmè kumòna cibidibidi cyànyì cyà kale cikaavwà cyènda cikùlakaja ne cyèla minyengu aci cilààle kwaka, ne ciditùnye ne—ne cineka kùdì màsaamà ne ntàtu, ne mêmè kumòna byanza byànyì paanyimà pàà mutù wànyì, ki mêmè kudyambidila ne: “Kaa, nebikèngelè bwà mêmè kwalukila cyàkàbìdì mu cintàkanyì cyàcya anyì?”

98 Nènku mêmè kutùngùnuka ne kuumvwa Dìyì adi ne: “Tùngùnukà ne kukolesha! Tùngùnukà ne kukolesha!”

99 Mêmè kwamba ne: “Mukalenge, mêmè ntu misangu yònsò ànu mwitabuue dyondopa dyà kùdì Nzambi, nèntungunukè àu ne kudìtabuuja. Kàdì nènkoleshè bwà kupeta misùukà ayi, ndi ngambilamu. Nènyìbwejè yàbùngì muntwamu ne nèngìikalè mwà... Enzaku bwà ngìikalè ne mwoyi, Mukalenge, nènku nèmbwejèmu mùlìyò mukwàbò, bu Wèwè ànu mwà kwenza bwà ngìikalè ne mwoyi.”

100 Nànsha bóbò biikàle bàà dikòbà kaayi, bàà twitabàayi kaayi, bàà ditùnga kaayi, nànsha biikàle cinyi, bàdì bónsò ànu cintu cìmwè pàdìbò bàkafika mwàmwa, ne mikàlù ayi yìkaadi mishààle paanyimà. Kaa, mêmè's ndi mwà kumòna bakàjì abu, balenga bàà dikèma; bàndì nciyi mwanjì kumònaku to... mipweke, nsukì yàbò mile mipwèke too ne paanyimà. Jipè mile mipwèke too ne kwinshì. Bàvwa ku makàsà kutupù. Mmòna bantu balùme abu ne nsukì mishitákàne ku nyungulukilu kwà nshìngù kwònsò, nsukì mikúnze, nsukì mifìike, ne yà meekala mashìlèshìlàngàne ónsò. Nènku bàvwa bangeela mabòko ku nshìngù. Mvwa mwà kuumvwa mabòko àbò awu. Mvwa ngumvwa byanza byàbò. Nzambi ngudi Mulumbulwishi wànyì, ne Mukàndà munsantu ewu mubuulula. Mvwa mwà kubùumvwa ànu mùndì ngumvwa byanza byànyì kwìsù kwànyì emu. Bàvwa bangeela mabòko ku nshìngù, kakùyìkù masansakata à bakàjì mùdìwu mafwànyìne kwikalaku mpindyewu emu to. Nànsha wèwè wa cijila wa bishi, nànsha wèwè nganyì, nànsha wèwè muyiishi wa mùshìndù kaayi, nsaserdose anyì nì ncinyì cyùdì mufwànyìne kwikala aci, kakwenaku muntu mulùme nànsha umwe udi mufwànyìne kulekela muntu mukàjì ùmwela mabòko kunshìngù, kàyìkù ùmvwa masansakata à bulùme to. Aci's mbulelèlè bwà menemene. Kàdì, mwanèètù, paùdì ùmuka apa uya dyàmwàmwa, kabyèna mùshìndù awu mwàmwa to. Kaa, ekèlekèle! Bìdì mu mùshìndù wà ne... Kaa, mùdì... Kabyèna mwà kwenzekaku to. Byònsò bìdì ànu dinanga. Byònsò bìdì ànu mwanèètù wa balùme wa cyà bushùwà ne byònsò bìdì ànu mwanèètù wa bakìjì wa cyà bushùwà. Kamwena nì ndufù, nì ntunyinganyinga, nì mmukawu, cintu nànsha cìmwè, cintu nànsha cìmwè kacýènakù mwà kubwelamu to. Cìdì ànu bupwàngàne. Ki cìndì mêmè nditacishila. Ki mwaba wùndì ngìipacila ngwòwù awu.

101 Mémè kwamba ne: “Éyì Mukalenge, mbwà cyôci aci bündi nsanganyibwa mu èkèleeziyà emu, nteeta bwà kutèeka èkèleeziyà mu bulongame.” Nnwàmbila ne, wèwè mwanètù wa balùme ne wèwè mwanètù wa bakàji, kùdi cintu ànu cìmwèpelè cìdi mwà kubwela muntwamu, ndinanga dipwàngàne. Kí mbwalu udi ne lulamatu kùdi Branham Tabernacle, anyì kùdi èkèleeziyà wa ba-Méthodistes anyì èkèleeziyà wa ba-Baptistes to. Abi’s bìdi ànu bímpè, bìvwa bìkèngela bwà wèwè kwikala nàнку. Kàdi, kaa, nwènù balunda bàanyi, bìdi bìkèngela bwà nwènù. . . Kí mbwalu udi mwakule mu myakulu to, muje maja mu Nyumà to, kí mbwalu udi mwipàte baadémons anyì mutentemune mikùnà ku diitabuuja nànsha. Byònsò abi bìdi ànu bímpè, bwalu bìdi bímpè, kàdi nànsha nàнку, ànu dinanga dipwàngàne menemene adi diikàle munda amu’s. Mwòmù amu ki mùvwà dinanga dipwàngàne. Nènku ki cintu cìmwèpelè cyàkubwejamu ncyôci aci. Kí cintu cìmwèpelè ncyôci aci cìdi mwà kushàalamù, ki cintu cìmwèpelè cìvwàku, mwòmù amu. Kaa, ekèlekèle! Nditèèkiibwa. Nzambì, kumpàla kwà difùka dyà dyulu ne buloba!

102 Mpindyewu, tùlwijakajàayi, tùjikijàayi nshapità umwèpelè ewu, nànsha bishi, kwòkù mùshindù, mu tusunsa dikumi tùdi tùlondà etu.

*Kùdiye yéye tudi pèètù bapetè bumpyànyì. . . (Citùdi tupyàna ncinyì? Mwoyi wà Cyendèlèèlè). . . biikàle badyànjlila kulongolola. . .*

Munyi? Bantu bònsò mbumvwe aci anyì? Wèwè nguvwa mubiikile Nzambì anyì? To, Nzambì ngwàkakubiikila. Bàmwè bantu bàtu bàmba ne: “Kaa, ndi mukèbe Nzambì, mukèbe Nzambì.”

To. Muntu nànsha umwe kàtukù mukèbe Nzambì to. Nzambì ngudi wenda ukèbangana ne muntu. Yesù wàkamba ne: “Muntu nànsha umwe kèna mwà kulwa kùNdi to pàdi Taatù Wanyì kàyì mumukòke dyàmbedi.” Nwamònu’s, bìdi mu ngiikàdilù wa muntu bwà kunyeema Nzambì. Kàdi wèwè udi wamba mpindyewu ne. . .

103 Aci, aci’s ke cìdi cìntàcishà mémè, nànsha nàнку, bwà kunùyiisha nwènù aba; kùtùngunuku ne kushààla mu ngiikàdilù umweumwe útù awu to, shintuluka mpindyewu! Ntèelejaayi pàndi ncyàmba apa: EMU MMÙDÌ MÙKALENGÈ WÀMBA. Kacya ncitukù mudibiikile mémè mwine cyôci eci to, kí ncìndi to. Kàdi nwènù nudi numbiikila bu mupròfetà wenù, anyì mupròfetà. Bàà pa buloba bàdi biitabuuja nàнку, mu nyungulukilu wa buloba bujimà, mìliyô ne mìliyô ne mìliyô yà bantu. Ntu nkàadi mwakule byà ku cyàbwàshi ne byà mwikàle mbubika ngàmbara bantu mìliyô dikumi anyì—dikumi anyì dikumi ne yìbìdi, anyì bapite apu, ngàakula byà ku cyàbwàshi. Nkàadi mumòne binunu makumi byà bikhèenà-kumòna ne bimanyinu ne maalu à kukèma, ne nànsha cimwè

cyà ku byôbi kacitukù cipangile nànsha. Ne aci ncyà bushùwà. Yèyè ùkaadikù mudyànjile kungambila maalu àtu kaàyikù manjì kupanga kukumbana to ànu menemene. Mèmè nêmpicishè muntu ku cilumbù pa bwalu abu nànsha bàmwamba ne yèyè ùdi nganyi. Ncyà bushùwà. Ncitu ndyamba mùndi muprôfetà to, kàdi nwènu ntèlèjaayi.

<sup>104</sup> EMU MMÛDÌ MUKALENGE WÀMBA, nebikèngelè dinanga dipwàngàne bwà kukufikisha mu wòwò mwaba awu, bwalu ki cyònsò civwà mwòmò amu. Nànsha wèwè ne mfranga ya bishi, dileeja dyà patòòke búngì munyi dyà maalu à ntèdeleelu, búngì bwà byenzedi bilenga byúkaadi mwenze anyi ní ncinyi ní ncinyi cyúkaadi mwenze, abi kabyákubadiibwakù ne mushinga nànsha wà kànà mu ditùkù adi to. Nebikèngelè dinanga dipwàngàne. Pa nànkù cyònsò cyùdi wenza, tèeka bintu bikwàbò byònsò ku luseke ànu too ne paùjiibwà tètè ne dinanga dyà Nzambì mu mùshindù wà ne udi mwà kunanga aba bàdi bakukìne.

<sup>105</sup> Mèmè ndi menemene ànu, bu mûngàmbì mu dindà emu amu ne, mèmè ntu mwenjiibwe, cyànyi cìndi mwenjiibwe naaci mu kaabujimà cìdi nngàsà. Bantu bààbúngì bàtu bàmba ne: “Mpindyewu, ùnkoonyè paanyimà nènku mèmè nènkuoonyè pèbè. Eyowà's, ùngenzèlè cintu kampànda nènku mèmè nènkwenzèlè pàanyi cintu kampànda.” Aci kí nngàsà to. Ngàsà ùdi ne, wèwè muumvwe paanyimà pàkusansakana, mèmè nènkuoonyèpu nànsha bishi, nànsha wèwè munkoonye pàanyi paanyimà anyi kùyì munkoonye; udi mwà kumbàngula dipì mwísù, wamba ne “paanyimà pàanyi pàdi pàkèngela kunsansakan-... , anyi, pàdi pàkèngela kunkoonya,” mèmè nènkuoonyèpu. Nwamònu anyi? Ki mùdìbi nànkù, enza cintu kampànda. Mèmè ncitu ngiitabuuja byenzedi to. Ntu mèmè ngiitabuuja ne byenzedi ndinanga. Byenzedi bìdi—byenzedi ndimwènesha dyà ne ngàsà ùkaadi mwenzeke. Ncitu ne nsòmbelu wa lulamatu kùdi mukàjàànyi ne bwalu ndi ngeela meeji ne mmufwànyine kushipa naanyi dibàka bu mèmè nciyi nendè ne nsòmbelu awu to, ndi ne nsòmbelu wa lulamatu kùdiye mbwalu ndi mumunange.

<sup>106</sup> Ncitu nyiisha Èvànjeeliyò ne bwalu ndi ngeela meeji ne ndi mufwànyine kuya mu iferno bu mèmè mwà kubenga kumuyiisha to, ndi nyiisha Èvànjeeliyò bwalu ndi muMunange Yèyè. Bushùwà. Nudi nwela meeji ne ndi mufwànyine kukosolola mbù mituuta kùdi bipeepèlè bikolè yàya, ne ndèkè yìdi yìpwekelela bu yà kupona mu diya ne mu dyalukila ayi, ne mikenyi yèla eku ne eku, ne—ne bikwàbò byònsò, ne mu kasunsa kanà kònsò... ne bantu bònsò bèèla mbila mikolè, masambila à “Mwoyo Mariyà” ùmvwika mu ndèkè mujimà amu, ne bikwàbò byònsò abi anyi? Bantu abu munkaci mwà kukupiibwa eku ne eku mu mikàbà yàbò yà dikùbiibwa ayi, ne mwendeshi wa ndèkè wàmba ne: “Nkushààle ndambù wa kasoloonyi ànu bwà tusunsa

dikumi ne tutaanu cyaààà, ncyèna mumanye ne tudi penyì to.” Nudi nwela meeji ne ndi mufwànyine kwenza aci ànu— ànu bwà disànkà dyà kucyenza anyi? Huh! Nudi nwela meeji ne mvwa mufwànyine kwalukila mu bisuku ne meetu mùvwàbi bikèngela bwà bàsàlaayi bàà beena Allemagne abu kwikalabo batèèke mabòko abo mannyùngùlùkile mùshindù ewu dilòòlò ne dilòòlò dyònsò bwà kubwela ne kupàtuka naanyi mu disangisha, too ne pàvwà Nyumà Mwîmpè mwà kubanga kwenza bishimà apu anyi? Ba-Communistes basòmbè ne byamwà byà mmwènu mikenkeci byà bufùku, bwà kungaashilabo cingoma mu ntàntà wa kilòmèètà mujimà ne citùpà. Nudi nwela meeji ne ndi mufwànyine kucyènta ànu bwà disànkà dyà kucyenza anyi? Mbwalu cintu kampànda munda mwànyì ncinangè; bóbò abu’s mbantu bàdi Kilistò mufwile. Pòlò wàkamba ne: “Ncyèna muswè kuya ku Yelusàlèmà ànu bwà kuya to, kàdi ndi nyakù bwà kupopediibwa pa nkùruse. Ndi nya bwà nkafwè. Ndi nyakù bwà nkafwilè bwalu bwà Mukalenge.” Ncintu kampànda, dinanga ndidì dikwenzejà adi, didì dikusàka. Ncyà bushùwà menemene.

<sup>107</sup> Bu mèmè muiyishe Èvànjeeliyò bwà mfranga, bu ne bìvwa mbwà nàнку, nùнку ncyèna ne dibànzà dyà ndola binunu makumi àbìdì dilòòlò edì to, nùнку ncyèna mubwele dibànzà bu nàнку nànsha. To, mukalenge. Bwalu nùнку’s ndikù mulame yimwè yà ku—yimwè yà ku miliyò yikaadibo bampèèshèpèèshe ayi. Muntu kampànda, muntu umwèpelè wàkatùma beena FBI ne kabeji kamfùndila kàà mfranga ndola mùliyò mujimà ne binunu nkàmà yìtaanu yà mèmè kwangata. Kì mèmè kwamba ne: “Alùkilaayi naaku.” Kì mbwà mfranga to! Kì mmfranga to. Ncyèna nyiisha Èvànjeeliyò bwà mfranga nànsha. Kì mbwà aci to!

<sup>108</sup> Mbwà dinanga. Cintu cìndì muswè kwenza, ncyà ne, pàngààyà dyàmwàmwà dyà mweyelu wà ndekeelu awu, ciine aci cìdì mwà kwenzeka mu tusunsa tutaanu emu kuumukila ku mpindyewu, cìdì mwà kwenzeka mu mèbà àbìdì kuumukila ku mpindyewu, cìdì mwà kwenzeka mu bidimu makumi ataanu kuumukila ku mpindyewu, ncyèna mumanye dìbà dyènzekàci to. Kàdi pènzekàci, mèmè kufikakù bulelèlè, ndi muswè bwà ngàànùmònakù mu bulenga bwà munonga, nulwa lubilu, nutuuta mukòbolo ne: “Mwanèètù munanga! Mwanèètù!” Kì cìdì mu wànyì mwoyi ncyòci aci. Mbwà nàнку awu. Ncyèna nteeta bwà kwikala mbengangana neenù ku mèyi bwà kwikala—kwikala kupanganangana to, kàdi ndi nteeta bwà kunutèèka mu njila udi mujaalàme. Kì njila wa dibwelela nyèyè awu. Kaciyi èkèleeziyà wenù to, kaciyi dingumba dyènù to, kàdi ndilediibwa dyèbè mu Kilistò. Kaa, ekelekèlè! Yoyòyò!

*Mu yèyè...tudi bapetè...bumpyànyì, bìikàle badyànjila kulongolola bilondèshile kiipàcìlà kàà ewu udi wenzeja bintu byònsò bilondèshile mubelu wà diswa dyèndè yèyè mwine,*

109 Tèèlejàayi. Netùjikije mu tusunsa tukesè emu. Tèèlejàayaaku ne ntèmà mpindyewu kumpàla kwà twètù kujikija.

*Bwa twètù kwikala bwà disaamuna dyà butùmbi bwèndè, twètù bàakadyànjlà kweyemena. . . Kilistò.*

*Mu yèyè kàbidì nwàkeeyemena, . . .*

110 Tàngilàayi eci mpindyewu, ne ntèmà yònsò. Vwàlaayi nkòletè yènù, nkòletè yà Èvànjeeliyò. Bàwulàayi macì ènù, tèèlejàayi ne ntèmà. Ndi ku mvensa wa dikumi ne mwisàtù.

*Mu yèyè kàbidì nwènù nwàkeeyemena, paanyimà pàà bamane kutèeleja. . .*

“Diitabuuja didi difùmina ku. . .” [Disangisha didi dyamba ne: “Ditèeleja.”—Muf.] “ditèeleja dyà. . .” [“Diyi.”] “Diyi dyà. . .” [“Nzambi.”]

*. . . paanyimà pàà nwènù bamane kutèeleja diyi dyà bulelèlè, . . .*

111 Bulelèlè ncinyi? Dìyi dyà Nzambi. Ncyà bushùwà anyi? Yone 17.17, nwènù bàdì munkacì mwà kufùnda Mifùndù abu, Yesù mmwambe ne: “Ùbàjidilè, Taatù, ku Bulelèlè. Dìyi Dyèbè m’Bulelèlè.”

*. . . paanyimà . . . nwènù bamane kutèeleja . . . bulelèlè, èvànjeeliyò wa lupàndù lwènù, . . .*

112 Lupàndù lùvwàye ùteeta kubàmbila alu lùvwa ndupàndù kaayi? Badyànjlà kulongolola kumpàla kwà difùka dyà buloba (Ncyà bushùwà anyi?), ku ditèekiibwa dyà bânà, badyànjlà kulongolola ku Mwoyi wà Cyendèlèlè. Mpindyewu, paanyimà pàà nwènù bamane kubwela mu Mwoyi wà Cyendèlèlè, paanyimà pàà nwènù bamane kusungidiibwa, kujiidiibwa, kuujiibwa ntèntè ne Nyumà Mwímpè, nudi bânà. Mpindyewu Nzambi mmuswè bwà kunùshikika bilondèshìle myaba, kaa, bwà nwamòna mwà kukwàta mudimu bwà Bukalenge Bwèndè ne butùmbi Bwèndè.

113 Ki Èvànjeeliyò nyèyè awu’s. Bamane, dyàmbedi, kutèeleja Dìyi ne: “Nyingàlalaayi, nubàtijiibwe mu Dìnà dyà Yesù Kilistò bwà dilekelediibwa dyà mpèkaatù.” Dyumusha dyà mpèkaatù yènù yònsò, nusòka Dìnà dyà Mukalenge Yesù Kilistò, bwà Buloba bulaya. Mulayi wùdi kùdi kmbena lwendu yònsò udi mu njila webè. Pawikalà muumuke kumbèlu kwèbè dilòòlò edi, ngènzàmpèkaatù, wamba ne: “Ndi nya ku Branham Tabernacle kwàka,” Nzambi ùdi ùkupèèsha mpùngà dilòòlò edi. Kùdi cintu cimwèpelè cidì cisanganyiibwà pankacì pèèbè ne Buloba bulaya. Buloba bulaya ncinyi? Nyumà Mwímpè. Cìvwà cìsanganyiibwà pankacì pàà Yoshùwà ne buloba bulaya n’Yadènè. Cyà bushùwà menemene.

114 Mòsà, mwikàle cifwànyikijilu cyà Kilistò, wàkalombola bânà too ne ku buloba bulaya, pashiishe Mòsà kàakabweja bânà mu buloba bulaya to. Yoshùwà ngwàkabweja cisàmbà ne

kwabanya buloba. Yesù wàkafuta mushinga, wàkabàlombola too ne ku Nyumà Mwímpè. Nzambi wàkapwekesha Nyumà Mwímpè ne Wàkatèèka èkèleeziyà mu bulongame bilondèshile myaba, muntu yònsò, ùmuuja tètè ne Bwikadi Bwèndè Yèyè mwine. Nudi numòna cìndi njinga kwamba aci anyi? Bònsò mu Kilistò Yesù, mùshindù wùvwà Nzambi mudyànjlile kulongolola cyòci eci ku dibìikila dyà Èvànjeeliyò ewu!

115 Pòlò, Galàtiyà 1.8, mmwambe ne: “Mwanjèlò yèyè mulwè mwikàle ùyiisha ní ncinyi ní ncinyi cikwàbò, èdiibwè mulawu.” Bulelèlà, Èvànjeeliyò. Mpindyewu tèelejàayi ne ntèmà patùdi tutùngùnuka ne kubala apa, twenda tujikija mvensa ewu.

*. . . èvànjeeliyò wa lupàndù lwènù, mu yèyè kàbìdì . . .  
(Tèelejàayi ne ntèmà.) . . . paanyimà pàà nwènù bamane  
kwitabuujà, nwàkatwibwa citàmpi cyà Nyumà Mwímpè  
mwine wa mulayi,*

116 Mu matùkù à ndekeelu, Bible mmwambe, mpindyewu tàngilàayi, mu matùkù à ndekeelu nekwikalè bitùpà bibìdì byà bantu. Cìmwè cyà ku bóbò nebiikalè mwà kupeta Cítampì cyà Nzambi, cikwàbò aci cimanyinu cyà nyama wa lwonji. Ncyà bushùwà anyi? Mbanganyi bàdi bamanye nànkù? Èè, piikalàbi ne Cítampì cyà Nzambi n’Cítampì cyà . . . Piikalàbi ne Cítampì cyà Nzambi n’Nyumà Mwímpè, díbà adi’s kakùyì Nyumà Mwímpè to ncimanyinu cyà nyama wa lwonji. Ne Bible mmwambe ne nyumà yìbìdì ayi neyikalè mitàmbe kufwànàngana mu mùshindù wa bifwànyine kuseeswisha ne Basungula mene bu ne bivwa mwà kwenzeka. Kacyàkucyènzaku to, bwalu bóbò bàkaavwa basungùdiibwe bwà Mwoyi wà Cyendèlèlè. Nwamònu anyi?

117 Diya dyà mu èkèleeziyà, ànu mùdì kumanya kwà ne kùvwa baavirgo dikumi bààkapàtukà bwà kuya katuutakeena ne Mukalenge, bònsò bajidiibwe, bònsò bàà cijila, yònsò wa kùdìbo mujidiibwe. Bataanu bàvwa bènza maalù fwèfwèfwè ne bààkalekela myèndù yàbò yijima. Bataanu bàvwa ne maanyi mu myèndù yàbò. “Nènkù, mònaayi Mubàki nyawu wiya!” Ki bataanu bàvwà ne maanyi mu myèndù yàbò abu kubwelabo mu Didyà dyà Dibanji. Kàdi bakwàbò abu bààkabàshiya pambèlu pàvwà myadi ne ditwà dyà mikemu ne disumakaja dyà mènù. Ikàlaayi badìlongòlòle, bwalu kanwèna bamanye ne mmu kasunsa kaayi mùdì Mukalenge ùlwa to. Ikàlaayi ne . . . Maanyi àdi àleeja cinyi mu Bible? Nyumà Mwímpè.

118 Mpindyewu bwènù nwènù leelù ewu, nwènù bàna bèètù ba-Adventistes du Septième Jour bàdi bambe ne ditùkù dyà mwandamutekète ki Cítampì cyà Nzambi, twàlaayi Mufùndu wùmwè cyanààna bwà kucijaadika. Bible mmwambe ne Cítampì cyà Nzambi n’Nyumà Mwímpè. Tàngilàayi eci. “Udi . . .” Tàngilàayi mvensa wa 13 mpindyewu.

*. . . paanyimà pàà nwênù bamane kwitabuujà, nwênù nwàkatwibwa citampì cyà—cyà Nyumà Mwîmpè wa mulayi.*

119 Buululaayi mu Efèsò 4.30, ngeela meeji ne nyêyè. Mònaayi ní katwena tupeta 4.30, mònaayi eci ní kî ncintu cimwècimwè aci. Efèsò, nshapità mwi4 ku mvensa wa 30. Èyowà, nyêyè ewu, 4.30.

*Nènku kanubungamiji Nyumà Mwîmpè wa Nzambi to, unwàkatwibwa nendè citampì too ne ku ditùkù dya bupikudi.*

120 Too ne ku dîbà kaayi? Paùdi bulelèlè, bulelèlè upeta Nyumà Mwîmpè, Yêyè ùdi ne cyà kushààla neebè too ne ku dîbà kaayi? Too ne ku ditàbuluja didi dilondà anyi, too ne pàakucyàmakanà kakwèbè mukàji kumpàla anyi, too ne pààkutàndishà mfumwèbè wa mudimu ne mēyì makolè anyi? Too ne ku ditùkù dya bupikudi bwèbè! Àlèluuyàh!

121 Paanyimà pàà wèwè mumane kufwà, paanyimà pàà wèwè mumane kusabuka mubwele mu Buloba abu, muwikalà ukàadi mwimanemu ne bananga bèèbè, wèwè newikalè ànu mule tèntè ne Nyumà Mwîmpè. Mifùndu's! Wèwè udi ànu mùdi mpindyewu emu, cibì mwikàle ne. . . udi mubwele mu mubidi mukwàbò. Udi mushintulule ànu nzùbu cyanààna. Ewu nùnkù ùkaadi mulwe mukulakaji, kùciyì kàbìdi mwà kumwasa biteetela to, bipàndà bikaadi bimane kubola. Ncyà bushùwà. Pa nànkù udi ànu muumushe cintàkanyi cyà kale aci ne mucishiye cidibolela panshì, ne mubwele mu wà mupyamùpyà. Ncyà bushùwà anyi? “Bwalu bu ntenta wa buloba ewu mwà kunyanguka, tudi ne mukwàbò mwindile.”

122 Nudikù nuvùluka ne, ditùkù adi tuvwa bakenkète cyôci aci anyi? Pàdi mwànà mukesè munkaci mwà kufwimbiibwa mu difù dya mamwèndè, ne misunya mikesè eyi yidi yidìsuba ne yitùpika ne yitùngùnuka. Kàdi pàdi ànu maamù awu ùpàtula mwànà wa mu dibòko awu ne yêyè mwànà awu ùlwa pa buloba, cintu cyà kumpàla, kùdi mubidi wa nyumà bwà kubakulawu mubidi mukesè wà mu bufùki awu. Pàmwàpa ngàngàbukà ùdi ùmwela. . . [Mwanèètù Branham ùdi ùtuutakaja byanza—Muf.] mùshindù ewu, anyi cintu kampànda bwà kumunyùkushakù, pèndè ne “wà, wà, wà!” Ki dyàkàmwè ùmba ùya ku dibèèlè dya mamwèndè aku ne, “mm, mm, mm,” ùbàndisha ne ùpwekesha mutù wèndè mukesè awu pa dibèèlè dya mamwèndè apu, bwà kufikisha mijilu yà mabèèlè ayi ku dipatula mabèèlè.

123 Kànà kakesè kàà ngombe, pàdiku ànu kàpàtuka munda mwà mamwàkù, nekàjuukile ku tuubinù twàkù tukesè atu paanyimà pàà tusunsa tukesè cyanààna. Nekènzè cinyi? Kàdi kààlukila buludi, kàlamata mamwàkù awu, ne kàbanga kunyùkusha mutù wàkù mukesè awu kàwùbàndisha kàwùpwekesha mùshindù ewu, ne kàpeta mabèèlè àkù. Àlèluuyàh! Èyowà's, mukalenge.



124 Pàdì mubidi wà mu bufùki ewu wùbwela munda mwà maamù awu, kùdi mubidi wà nyumà muwindile.

125 Ne pàdì mubidi wà mu bufùki ewu wèdiibwa panshì, àlèluuyàh, kùdi mukwàbò mwindile dyàmwàmwa! Tudi tuumuka ànu cyanàànà mu ewu tubwela mu mukwàbò, tudi tushintulula bisòmbedi byètù. Cyà cifwàkà eci cìdi ne cyà kuvwala dibènga-kufwà, cyà nyumà eci; dibola edi dìdi divwàla dibènga-kubola. Mubidi wà kale wùdì mwele minyengu, mudikoke, mukòbàme ewu, kàdi kawàkushintululakù mmwènkelu wawù to nànsha kakesè, ndi njinga kwamba ne pàdiwu wùya dyàmwàmwa nàka, wèwè neutungunuke ne kwikala ne nyumà ànu yèyè umwèumwè awu.

126 Lekelaayi nnpupèshèku kaacintu kakesè kàdi kàmwèka kunùdi bu ne nkakonyangale, kàdi's m'Bible, pashìishe nènnupèshè kiikalà mwà kunwolwelaku. Tàngilàayi eci nùku. Musangu wà Shawùlà wa kale, mfù—mfùmù awu, wa—wa kale awu, muiyishi munène wa kale wa cyena màngumba kwine kuntwaku musangu awu, nudi bamanye's, mwine uvwa ne mutù ne makaaya kumutù kwàbò bònso awu, kàdi mwikàle ne bwòwà, kabàvwakù bamanye kantu nànsha kàmwè pa bìdi bitàngilà Citàmbe-mfùkilu to. Byàkakèngela bwà Davidì kulwayè bwà kusungidila mwànà wa mùkòòkò mukana mwà nyama wa ntambwe, kushebeya Goliyààtà. Mutàngilaayi numòne. Yèyè ùkaavwa mushiye Nzambi muye kule, mu mùshindù wà ne wàkafika too ne ku dikina muiyishi mubunguluki wa mu malaba ewu. Ne pamutù pàa kwikalaye mutwè ku cyèndè, bwà kuteetaku kumwambulwisha, yèyè kàdi kumukudimukilaye. Aci cyòci kaciyi cimfwànyì ànu menemene, cimfwànyì ànu menemene! Kumukùdimukilaye buludi!

127 Mbanganyi bàvwàku mwab'ewu pàngàakayà mu lwendu lwànyì lwà kumpàla, ne mèmè kuyiisha pa: “Davidì ùshebeya Goliyààtà,” pàngàakayà apu? Bààbùngi, ndambù, bakesè menemene bàà ku bàà kale. Nkàadi pa kuya cyàkàbìdi mu elu nùku. Nudi bavùlùke cìvwà, nudi numòna cìdi cìfùme ku dyenzeka mu dyàlumingu dyàshàadi edi aci anyi? Cìdi munkaci mwà kubwela buludi mu citùpà cikwàbò. Kampanye kiibìdi kàa Davidì, citùpà ciibìdi cyà mudimu wèndè wà bwambi. Aci's ncyà bushùwà menemene. Ne, pashìishe kulwaye mfùmù kumutù kwà Izàlèlèlè. Mònaayi mùdi mudimu wà bwambi awu mpindyewu wènda wùbwela mu citùpà citàmbe bunène, wènda wùshàala mutàmbe bunène. Ki mwàkadìbi kàbìdi bwà Davidì. Mèmè ndi mmòna eci pàakakùfikàye, Davidì awu, kaa, pàakafikishà Nzambi Davidì kwòkù aku bwà kushebeyaye nyama wa ntambwe awu, mònaayi, ne bwà kushebeyaye nyama wa ours, ne pashìishe kushebeya mwena Pelèshètè awu. Mpindyewu, kulwakù cikondo cyàkafilà Nzambi nyumà mubì bwà kulwaye pambidi pàa mulumyana wa kale ewu. Ne wa . . . Bwà kwenzaye cinyi? Bwà kukinaye Davidì. Ne ndi ngeela meei ne . . .

<sup>128</sup> Mpindyewu, mikàbà yà mèyì eyi. Mpindyewu tèèlejàayi, nwènú bânà bèètù, nwènú bàdì bàtèèlejà mikàbà yà mèyì eyi, nwènú nubenga kupetangana naanyì ku mèyì, nwamfwilaayiku luse. Nwamònu's, mémè ndi mununange. Nénkatwilàngàne neenù dyàmwàmwa nànsha byà munyì, nwamònu's, bwalu pawikalà mulùme wa Nzambì mémè nénkatwilàngàne neebè nànsha byà munyì. Kàdi, ndi njinga kwamba nùnkù ewu, kabingilà nkòkò aka: Ànu bwalu Shawùlà wàkamòna ne Davidì ùvwa ne cintu kampànda civwàye kàyì yèyè naaci to. Dìbà adi cyàkenzekà ncinyì?

<sup>129</sup> Kalùmyànà kàà kale kàà mubidi “mukùnzubile,” mudikoke, Bible mmwambe ne yèyè ùvwa ne mubidi “mukùnzubile.” Kàvwa mwànà mulenga kumòna menemene to, “mukùnzubile” mbwena kwamba ne kàdi ànu kalùmyànà kàà mùshindù wà mubidi mudikoke. Kuyaye kwàka, ki Shawùlà, mòna's, kumuvwàdikayè byà mvità byà Shawùlà pambidi pèndè, ne mémè ndi ndifwànyikijila ne ngabu ùvwa mupweke mukafike too ne ku makàsà. Ki yèyè kwamba ne: “Nguumùshè bintàkanyì ebi pambidi. Mémè—mémè ndi ne . . .” Pàmwàpa ní wàkamupèèsha dipòlome dyà bu-docteur, dyà Ph.D. anyi dyà L.L.D., anyi cintu kampànda, nudi bamanye's. Mùshindù wàkambàye ne: “Mémè ncyèna ne cìndì mumanye pa bidì bitàngilà bintàkanyì abi to, bwalu ncìtu mubìjaadike to. Lekela ngàngate eci, cìndì mumanye mwà kukwàta naaci mudìmu.” Èyowà's, mukalenge. Kwangataye yèyè ndundu wa nyuunyì.

<sup>130</sup> Ki kufiikishabo Davidì munda bwalu bânà bàà bakàjì, maèkèleeziyà, maèkèleeziyà àvwa ìmba ne: “Shawùlà, yèyè mmufwànyìne kwikala mushebeye byèndè binunu, kàdi Davidì yèyè mmushebeye byèndè binunu makumi.”

<sup>131</sup> Dìbà adi kukwacikaye mukawu ne: “S'ncintàkanyì cyà kale cyà Dìnà dyà Yesù aci, kaCyenà ne bwà nsongo bwine to.” Ncyà bushùwà. Kàdi Nzambì wàkamwenzela cinyì? Nzambì wàkatùma nyumà mubì pambidi pèndè, bwà kukìnayè Davidì, ki kukìnayè Davidì kakùyì bwalu to.

<sup>132</sup> Davidì's ùvwa mufwànyìne kwikala mumunyenguvule nshingù misangu bùngiyì. Yèyè's ùvwa ànu mufwànyìne kwikala mucyènzè, kàdi kubìlekelaye pèndè nànkù. Kàvwa ànu wàmba bwalu to. Ncyà bushùwà ne yèyè ùvwa ànu mufwànyìne kwikala mucyènzè. Wàkaya ne wàkakosa luzemba lwà cinkutu cyèndè, bufùku kampànda, kwalukilaye, e kwamba ne: “Tàngilà kuneeku, s'udi mumòne's!” Èyowà's, mukalenge, yèyè ùvwa ànu mwà kwikala mucyènzè, kàdi wàkamulekela cyanàànà. Nùnkù's mmutapulule ànu disangisha dyèndè adi ne mubàtangàlaje, ne mubange bwèndè bulongolodi budyènzela bu yèyè muswè kwenza nànkù. Kàdi kàakacyènzà to, wàkalekela ànu Shawùlà ùtùngunuka. Shiila Nzambì àlwanganè Yèyè mvità ayi. Èyowà's, mukalenge.

133 Pa nàнку yéyè pàvwàye ùtùngunuka ne kupatuka ne kampanye katàngile ku ndekeelu wakù, ne yéyè wènda ùya, nyumà mubi awu wàkafika too ne mu mùshindù wà Shawùlà kàciyikù mwà kupeta dyandamuna nànsha òmwè dyà kùdi Nzambi to. Paanyimà pàà mutancì yéyè...Nyumà wa Mukalenge ùkaavwa mumuumùke. Ki mukulumpe Samwèlè, mwine uvwabò babèngè awu, mwine uvwa mu bulelèlè Dìyì dyà Nzambi kùdìbo awu, mwine uvwa mubàmbìle kumpàla mene kwà kuswabo bwà kwenza maalu bu bàà pa buloba awu... .

134 Mmunyì mùdi èkèleeziyà ùswa bwà kwenza maalu bu bàà pa buloba? Bwà cinyì Beena Mpenta, babàtùjìbwe, ba-Méthodistes bàdi benzè dilabula dyà Nyumà Mwimpè, ne ba-Baptistes, ne ba-Presbytériens, mbaswè kwenza maalu bu bàà pa buloba? Bàdi benzà nàнку bwà cinyì? Mémè ncyèna mumanye to. Mémè—mémè ncyèna ànu mwà kucyùmva to. Wèwè udi wamba ne: “Èè, kunaya kwà karta kàà ambula mfùmù udye mbonga s’kùdi kùùmushakù luteetùkù, ànu kakesè nàka bwà kuumushaku luteetùkù, ànu ndambù wa manayi àdi kaayi nànsha ne musinga to,” mwònsò mùdi ucibiikila amu. S’mpèkaatù. Kabìvwa bikèngela bwà nwènù kwikala ne bintu abi mu nzùbu mwenu to. “Mòna’s, kabyèna ànu byènzà bibì to bwà kunwàku ànu kaavèrè kakesè menemene kàà maala à bière. S’tudi banwè ànu tukesè menemene. Mémè ne mukàjàanyi tutu tunwàku ànu tukesè cyanààna mu mapingaja.” Kàdi katancì aka anyì, bàna bèènù balela bànwakù pààbò ndambù’s. S’ki mùdibi cyà bushùwà.

135 Ne nwènù bakàjì, hm, dyabùlù’s mmwenze ànu...Cyòci aci’s ki cyàkenzàye ku cibangidilu, ne ncyà bushùwà ne yéyè mmunuwije cintu cyà diludikila mikete nwènù bàna bèètù bàà bakàjì. Yéyè ùdi wènza nàнку ànu bwà...bwalu’s yéyè mmumanyè cidiye mwà kwenza. Yéyè ùdi mwà kuseeswisha muntu mukàjì ne lukasa lwònsò misangu cinunu kutàmba muntu mulùme. Ndi mumanye ne aci cidì cinutapa ku mwoyi, kàdi’s m’Bulelèlè. Ki cyòci aci menemene. Ki cyòci aci cyàkenzàye mu budimi bwà Edènà. Yéyè ùdi mwà kuvwija...Mpindyewu, mukàjì ùvwa wa kweyemena, ùvwa ne meeji matòòke, kàdi’s wàkaseeswishiibwa. “Adàmà kí ngwàkaseeswishiibwa to,” mùdi Bible mwambe. Kí nyéyè mulùme wàkaseeswishiibwa to, kàdi mukàjì ngwàkaseeswishiibwa. Pa nàнку yéyè ùdi mwà kuseeswisha mukàjì. Kàdi pààbi’s bampaasàtà bàdi bàya ànu buludi bàkajidila bayiishi bakàjì, bàbàtèèka kumutù kwà masangisha mùshindù awu, pàdi Bible ewu ùcipiisha kuumukila ànu ku Genèsè too ne ku Bwàkabuulwibwà. Wèwè udi wamba ne: “Èè, s’mbimpè. S’mbimpè. Bòbò’s bàdi ne...Bòbò’s bàdi mwà kuyiisha ànu mùdi bakwàbò mwà kuyiisha amu.” Ndi mumanye ne aci ncyà bushùwà.

136 Byenzè mùvwà musangu kampànda muntu mubange kwakula mu myakulu, mémè kutùngunuka ànu ne kuyiisha,

kàdi pângààkapàtukà . . .

Mukàjì mukwàbò kwambilaye mwanàànyì wa balùme, wàmba ne: “Ndi ne mukenji wà kufila mààlaba dilòòlò,” yèyè ne, “pààfikà papa wèbè pa cibùmbà cyà ku cyambilu.”

Yèyè ne: “Èè, Màmamù, udi uswa kwamba bishi’s?”

137 Ki dilòòlò adi pààkakùmbanà díbà, pânkaavwà ndilongolola bwà kwenza dibìikila dyà ku cyoshelu, mukàjì awu kulongololaye nsuki yèndè ne kubàndishayè nshèsheetè yèndè ne bikwàbò byònsò, kudilongololaye, kwelaye cidya e kumata munkaci mwà cyendidi amu ne kubangaye kutupika ùya muulu wàlukila, wàkula mu myakulu ne wàmba cipròfètà. Mémè pàànyì kutùngùnuka ànu ne kuyiisha, ngenza dibìikila dyànyì dyà ku cyoshelu. Apu mémè nciyikù mwà kuneemeka aci to nànsha kakesè, kacìvwa cijaalàme to. Nènku pashiishe, èè, Bible mmwambe bwà kubenga kucyènza, mmwambe ne: “Nyumà wa—wa bapròfètà ùdi ùkòòkela mupròfètà.” Nzambì ùdi pa . . . Nzambì ùdi munkaci mwà kwakula pa cibùmbà cyà ku cyambilu, Mulekèlaayi àkulè. Pòlò mmwambe ne: “Cintu kampànda cyòci cibүүлùdìbwe kùdi muntu, àpuwè to ne pàdi mukwàbò awu ùjikija.” Neyà bushùwà’s.

138 Mpindyewu, pashiishe ndi mwenze ànu mpàtuka pambèlu anyì, bantu abu kwambabò, musùmbà munène wà bantu’s, kwambabò ne: “Udi mubungàmije Nyumà Mwìmpè dilòòlò edi.”

Mémè ne: “Ku cinyi cìndi mwenze? Cìndi mwenze ncinyi?”

139 Bòbò ne: “Èè, mwanèètù wa bakàjì awu páfidiyè mukenji wèndè apu ne, àlèluuyàh,” mwàkambàbò, “nànku awu.”

“Mòna’s,” mungààkambà, “mémè mwà munkaci mwà kuyiisha. Yèyè’s ùvwa mupàtùke mu bulongame.”

140 “Kaa,” mwàkambàbò, “aci’s cìvwa cipyacipyà cìfùmina buludi ku Nkwasa wa butùmbì. S’cìvwa cipyacipyà kutàmba cyùvwà wèwè munkaci mwà kuyiisha aci.” Uh!

141 Mpindyewu, aci’s cìdi cìleeja ànu ne . . . aci cìdi cìleeja anyì eci, ne mémè ndi ncyàmba ne kaneemu kunùdi, anyì nkatombòtombò, anyì ndipanga dyà kaneemu, anyì ndilongesha dyà kùdi muntu udi kàyì mumanye mukàndà to udi kàyì mumanye Nzambì kutàmba mùdi kàlulù kamanye bilatu byà kwendela naabi mu nējè to. Mpindyewu, bwà aci, ncyèna ngàmba aci bu díyì dyà—dyà bukùtàkane nànsha, bwalu ewu kí mmwaba wà dyelela bilèlè to. Kàdi aci’s—aci’s mbulelèlè ànu bwètù bwà menemene ebu. Muntu udi mufwànyine kwikala mumanyè ne Nzambì kí mmutwàdi wa cimvundu to. Yèyè ngwa ditalala. Bible ngudibò kabàyi bamanye. Cyàbò pààbò cìvwàbò bamanye mwà kwenza cìvwa ànu kutùpika kuya muulu kwalukila, kwakula mu myakulu, kwamba ne: “Ndi ne Nyumà Mwìmpè. Àlèluuyàh!”

142 Mémè ewu's nkààdikù mwimane ne mumònemòne, mu Àfrikè, bampàkààmàngà ne bakwàbò bònsò bààkula, bantu bu binunu bitaanu nàнку awu cyàpàmwè; bàtùpika bàya muulu bààlukila, ne mashi kwísù kwònsò eku, bààkula mu myakulu, ne bànwina mashi mu kabalùbalù kàà mutù wà muntu; bàsòka dyabùlù, ne bààkula mu myakulu.

143 Kàdi pààbi dyakula dyà mu myakulu's ndipà dyà kùdi Nzambi, kàdi kí ncileeeji cyà Nyumà Mwímpè cìdi kaciyi mwà kupangila to. Anyishaayi nwāmbilè cyòci aci mpindyewu. Mémè ndi cyà bushùwà ngiitabuuja ne bansantu bònsò bàdi basonsòdiibwe bàtu bààkula mu myakulu. Mémè ndi ngiitabuuja ne muntu musangu kampànda paùdi ulwa musonsòdiibwe menemene kùdi Nzambi mu mùshindù wà wakula mu myakulu. Mémè ndi ngiitabuuja nàнку. Kàdi ncyèna ngiitabuuja ne aci ncimanyinu cyà ne udi ne Nyumà Mwímpè to. Èyowà's, mukalenge. Ndi ngiitabuuja ne kùdi misangu yà paùdi ne diitabuuja, muntu's, wèwè mufwànyine kuya buludi katentekela mwànà mukesè udi ne disaamà dyà kansèrè byanza, pààbi bayiishi makumi ataanu bamanè kumusambidila, ne yèyè mufwànyine kwondopiibwa bwalu maamù awu udi ne diitabuuja bwà mwine mwànà awu. Nzambi ngudi mumupèesheyè, maamù awu ncidimba cyà Mubidi wà Kilistò. Èyowà's, mukalenge. Ndi ngiitabuuja nàнку. Nkààdi mucimòne cyenzèke ne ndi mumanye ne ncilelèlè. Kàdi bwalu bùdiku mbwà ne, nkutèèka èkéleeziyà mu bulongame, kumutèèka mu bulongame bwà twamònakù mwà kukwàta mudimu.

144 Mpindyewu tujikijàayaaku citùpà cikwàbò cyà mvensa ewu kaaba aka kumpàla kwà twètù kuumuka.

*...paanyimà pàà nwènù bapete, nwènù  
nwàkatwibwa citampì cyà Nyumà Mwímpè wa mulayi.*

145 “Cìtampì!” Cìtampì ncinyi? Cìtampì ncinyi? Cìtampì cìdi, cintu cyà kumpàla cìdici cileeeja mmudimu wùkaadi mujikija, mudimu mujikija. Cintu cìdi cilondà cìdici cileeeja mbwena cintu. Ne cintu cìdi cilondà cìdici cyùmvwija ndikubiibwa, kucilama.

146 Twānjìbi kwamba, cileejilu, kale wàwa mvwa nkwàta mudimu ku kumpànyì wa Njila yà njanja wa Pennsylvanie, mvwa nkwàta mudimu ne tààtù mu njila wa njanja. Tuvwa tupàya bintu mu màkaadikà. Nénku tuvwa twela mu cyapù cyà dikangila byàkudyà mu makopo eci, tuvwa tutèekamù makopo makànga à byàkudyà, ne tuvwa tuatèèka àmwè lwà kuulu eku ne makwàbò lwà kwinshì eku, ne makwàbò lwà kuulu mùshindù ewu. Kàdi kumpàla kwà dikaadikà adi kukangiibwadi, mukòntononyi ùvwa ùpicila muntwamu, ne ùvwa ùsàka, ùsàkila eci, ùnyùkusha cyàcyà nàka. “Kaa! Edi to! Bintu nebìcibuluke byònsò bishaalè tupese tupese kumpàla kwà kufikabi kuntwaku. Bwà edi dikaadikà to! Pàtulàayi bintu. Byènzùlùlaayi.” Mukòntononyi ùvwa ùbènga dikaadikà adi.

147 Nyumà Mwîmpè ki Mukòntononyi. Yèyè ùdi ùkunyùkushakù ndambù, kàdi wèwè udilakana. “Udi witabuuja Dìyi dyà Nzambì dyònsò anyi?”

“Ncyèna ngiitabuuja bintàkanyi byà kale byà Dîna dyà Yesù abi to.”

“Bèngaayi aci. Wèwè nyawu udi uzèla.”

“Ncyèna ngiitabuuja dyondopa dyà kùdi Nzambì anyi cintu cyà mùshindù awu to.”

“Bicikàle bizèla. Bipàtùlaayi.”

“Udi witabuuja ne Yesù Kilistò ùdi umwèumwè awu makèèlèlè . . .?”

“Èè, mu mùshindù kampànda’s.”

“Wèwè nyawu udi uzèla. Tuutà aci musèbà ùcyèlè pambèlu, wamònu’s, kí ncyanji kwikala pabwîpi to.” Èyowà’s, mukalenge.

148 Mwanèètù, pàdìye mudìlongòlòle bwà kwamba ne: “Amen!”

“Ukàadi mupete Nyumà Mwîmpè anyi?”

“Amen!”

“Byònsò bikaadi bijikija anyi?”

“Amen.” Dîbà adi cidi Mukòntononyi wènta ncinyi? Byònsò mbikùta ne bitwàngaja bîmpè, byùle tètè ne Èvànjeeliyò. Kaa, Dìyi ne Dìyi dyònsò dyà Nzambì ndîmpè. Byònsò mbipwàngàne. “Ndi ngiitabuuja Dìyi ne Dìyi dyònsò. Amen! Amen! Amen!”

“Wèwè udi witabuuja ne Nzambì ùcitu ànu wòndopa anyi?”

“Amen.”

“Udi witabuuja ne Yesù, umwèumwè awu makèèlèlè, too ne kashidi anyi?”

“Amen.”

“Udi witabuuja ne Nyumà Mwîmpè ngwa cyà bushùwà ànu mùvwàYe kwònsò aku amu anyi?”

“Amen.”

“Udi witabuuja ne Nyumà umwèumwè wàkapwekela Pòlo awu, ùdi ùtùpwekela pèètù anyi?”

“Amen.”

“Udi witabuuja ne Yèyè ùdi utwènzela bintu bîmwèbîmwè, byàkenzàYe kùdibo abi anyi?”

“Amen.” Kaa, kaa, bikaadi byènda bishààla bitwàngaja bîmpè mpindyewu. Um-hum, byènda bishààla bitwàngaja bîmpè mpindyewu, tukàadi pabwîpi ne kukànga ciibi. Èyo.

149 Dîbà adi mukòntononyi ùdi ùkànga ciibi. Ùdi wènta cinyi? Ùdi ùtwakù cìtampì. Pashìishe ùdi ùtùluka apa ne wàngata cikwacilu cikesè cyà nkàlà eci, wòlola cianza kwàka wàmbula kaacintu kakesè aka ne ùtwa cìtampì pa cyòci aci. Kùdìdingi kùcìkòsukù to. Pìikalàbi ne, dikaadikà adi, kùyaayàdi nku

Boston, kabèèna mwà kucikosaku to. Ncifwànyine kwikala cilumbu cyà muntu wèdiibwa mu bùlokò bwà dikòsà dyà citampì aci pàdìdì kadìyì dyanjì kafika ku Boston to. Nènku muntu udi ne bukòòkeshi abu ki ùdi mwà kukòsà citampì aci, ne ànu yèyè nkààayendè. Ncyà bushùwà. Ncintu cyà bendè cyà kùmpànyì *kampànda* wa njila wa njanja. Ncitampì cyàbù bòbò. Nditwishiiibwa kùdìbo dyà ne dikaadikà adi bintu mbipàyamù bîmpè, bwà ne dikaadikà adi dikaadi dilongolola. Ndyàbò bòbò. Kì mbafwànyineku kutwà citampì cyà “B&O” ku dyà “Pennsylvanie to”. Bikèngela wèwè ùtwibwè citampì, ne pàdìci citwibwa citampì.

150 Nènku pàdì mwena Kilistò mupàyyibwe ne Èvànjeeliyò, mùle tètè ne bwîmpè bwà Nzambì, bintu bîmpè byònsò byà Nzambì bìsanganyiiibwa munda mwèndè, mwikàle ne mwoyi muunzulula, mudilongolole bwà kukwàta mudimu, mwikàle ne budiswilè bwà kushikikiibwa bilondèshile mwaba, wènta byònsò bìdì Nyumà Mwîmpè ùmwambila bwà kwenzaye abi, muumuke ku lufù muyè ku Mwoyi, mujidiibwe ku bintu byònsò byà pa buloba, wèndela mu Bukènkè pàdì Bukènkè bùlwa kùdiye, mutungunuke wènda ùya, awu mmudilongòlole. Dìbà adi Nzambì ùdi ùkànga ciibi cyà maalù à pa buloba paanyimà pèndè, ne ùtuuta cyà eku ne cyà eku musangu wùmwe mùshindù ewu, ne ùmutwa citampì cyà Nyumà Mwîmpè wa mulayi. Àlèluuyàh! Too ne dîbà kaayi? Too ne kùyaayàye. Kumupatwidi apa mu njila wa njanja emu bwà kucikangula bwà kumòna cyàkàbìdì bintu byònsò ní bìdì bîmpè to. Bìdì bîmpè, wèwè bìlekèlè ànu nànkù. Mukòntononyi mmumanè kubikòntonona. Wèwè udi mutwibwe citampì too ne ku dîbà kaayi? Too ne ku ditùkù dyà bupikudi bwèbè. Ntoo ne ku dîbà adi kùdì mutwibwe citampì.

151 “Èè, paùdì ufwà, dîbà adi, Mwanèètù Branham, bwalu bùdì cinyi paanyimà pàà wèwè mumanè kufwà, muwàmbi ne udi ànu naaCi?” Wèwè udi naaCi bwà kashidi. Mwoyi wùdì wùbangila mwaba kaayi? Ku cyoshelu. Ànu kwòkù aku mene nkùdì umòna kaamundidimbì kakesè menemene. Kì mundidimbì ngwòwò awu, Citampì cyà Nyumà Mwîmpè. Pashùshe cidi mundidimbì wà mindidimbì wà mindidimbì, mùmvwà mwambe ditùkù adi amu. Kàdì paùdì ufwà, udi utùngùnuka ànu ne kwenda kupicila mu mindidimbì ayi too ne paùdì ukafika ku mutaleela, umuka ku mutaleela ukafika ku kaamushimì kakesè kàà kàpweka bitekète bitekète, umuka ku kaamushimì aku ukafika ku kasùlù, umuka ku kasùlù ukafika ku musùlù, umuka ku musùlù ukafika ku mbù, nwamònu’s, wa dinanga dyà Nzambì. Wèwè udi muntu ànu umwèumwè awu.

152 Tàngilàayi kuneeku. Mukulumpe Shawùlà, muntu wa kale uvwa mutwè cìmpìngà awu, kàvwakù mwà kupetangana ne Nzambì to, kàdì pèndè kàvwa mujìmine to. Ncyà bushùwà ne kàvwa mujìmine to. Yèyè ùvwa mupròfetà, kàdì ùvwa ànu muye

kule ne Nzambi cyanààna. Ki bwà cinyi, bânà bèètù, ngàm̀bì ne: “Kanwèna bajimine to.” Pa nà̀nku d̀bà̀ adi v̀l̀ukà̀ayi ne, yèyè ùvwa ànu mupà̀tùke mu diswa dyà Nzambi cyanààna, ki katancì aka, yèyè—yèyè kàciyì ùpetangana ku mèyì to. Mpindyewu, pàm̀wàpa kabivwa bikèngela mèmè kwikala mwambe nà̀nku to. Èyo, c̀ndi ndi ànu ntung̀unuka cyanààna bwà disangisha dyà disànka dilòòlò edi. Nà̀nku d̀bà̀ adi, nudi bamanyè’s, kàdi katanci aka anyi, kaa, ekèlekèle, d̀bà̀ adi . . . Kuyaye ka—kakonka Ulimà Tuumimà.

153 Nudi bamanyè cìvwa Ulimà Tuumimà’s, cìvwa ncibwikilu cyà pa cyàdi, efò̀dà uvwa—uvwa Aalònà ùvwàla. Ne bìvwa misangu yò̀nsò, Nzambi ùtu misangu yò̀nsò ànu Nzambi mutàmbe-mf̀ukilu mwikàle wà̀damuna ànu mu m̀shindù mitàmbe-mf̀ukilu. Ne pàvwà mupròfeta wàm̀ba cipròfeta, kàdi makènkè àdi kaàyi ùmvwika awu òwò kaàyi mapenye mu Ulimà Tuumimà amu to, cìvwa cyà mafi. Pàvwà mulò̀ci wa cilòòta wàwula cilòòta cyèndè kàdi kaciyì cìpenyisha bukènkè pa Ulimà Tuumimà apu to, nànsha cyòci cyùmvwika cìmpè cyà bishi, cìvwa cyà mafi. Ncyà bushùwà’s.

154 Ne bwànyì mèmè nànsha wèwè ne mapòlome à bu-docteur búngi munyì ne bulongolodi bwènù bwikàle bunène bishi, paùdi wamba cipròfeta anyi uyiisha, cyòci kaciyì cìkùmbanangana ne Dìyì edi to, udi mu ntùpàkànyì, mwanèètù. Udi . . . Ewu ki Ulimà Tuumimà wa Nzambi. Wèwè wamba ne kùvwa mudyànjila kulongolola kumpàla kwà difùka dyà dyulu ne buloba to, bukènkè abu kabwàkupyenya nànsha, bwalu Bible mmwambe ne wèwè uvwa mudyànjila kulongolola. Paùdi wamba ne bìvwa bikèngela bwà wèwè kubatijiibwa mu dìnà dyà “Taatu, Mwàna, Nyumà Mwimpè,” kabwèna bùpenya to, bwalu muntu nànsha umwe mu Bible kà̀akabàtijiibwakù m̀shindù awu to. Ànu mu Dìnà dyà Mukalenge Yesù. Kabwàkupyenya to, pa nà̀nku kùdì cintu cidì kaciyì cyènda bìmpè mwaba kampànda.

155 Pa nà̀nku Ulimà Tuumimà kà̀akandamunakù mukulumpe Shawùla to, ne yèyè kàvwa mwà kupetakù nànsha mene cilòòta to. Ùkaavwa muye kule bikolè mu m̀shindù wà kàyikù mene nànsha mwà kupeta cilòòta to. Pa nà̀nku nudi bamanyè cyàkenzàye anyi? Wàkapweka e kuya kwà mwamùlopò, ne mwamùlopò wa kale ewu, mpàkààmàngà wa kale wa dyabùlù awu kuntwaku, mpàkààmàngà. Ki kwambaye ne: “Udikù mwà kutempa lubùkù anyi?”

156 Mukàji awu kwamba ne: “Èyowà, kàdi Shawùla mmwambe ne neàshebeye muntu yò̀nsò udi utempa mbùkù.”

157 Yèyè kwamba ne: “Mèmè nènukùbè,” muvwale bilàm̀ba bu mwoweshanganyì wa màyì ku makàsà. Kwambaye ne: “Ntempèlèku lubùkù ùmpàtwilè ku bafwè bàkaadi baye dyàm̀wamwa abu.” Mpindyewu tèelejàayi eci. “Mpàtwilè nyumà wa Samwèlè mupròfeta.”



158 Ki mukàjì awu kubwelaye bwà—bwà kutempa lubùkù. Nènku, mmwenze ànu ùtempa lubùkù, kuponaye mutwè mpàla panshì, kwambaye ne: “Ndi mmòna nzambì yènda yìbànda.” Nwamònu’s, yèyè ùvwa mumpàngaanù, “nzambì yàbùngì,” yìbìdì anyì yìsàtù mijima, bu mùdì Taatù, Mwànà, Nyumà Mwîmpè, anyì cintu cyà mùshindù awu, nudi bamanyè’s. Yèyè kwamba—yèyè kwamba ne: “Ndi mmòna nzambì yènda yìbànda.”

159 Awu ne: “Anjì umvwijàbi mùdiye tǔng. Mmwenekelu wendè ùdì bìshi? Yèyè ùdì ne mmwènekelu kaayi?”

160 Yèyè ne: “Ngwa kanyikanyì ne mwikalè ne cinkutu cyela pa makaaya èndè.” Yèyè kàvwa mushintulukeku to nànsha kakesè.

161 Awu ne: “N’Samwèlè. Mufikishèbi mu cibambalu emu, mufikishèbi kumpàla kwànyì eku.”

162 Kàdi tàngilàayi numòne pàakafikà Samwèlè kumpàla kwà Shawùlà, wàkamba ne: “Ciwàmbiikididi ncinyì, pèèbè mumane kulwa mwena lukuna wa Nzambì?” Kàdi tàngilàayi numòne. Kabiyì ànu ne yèyè ùcìvwa ànu Samwèlè to, ùcìvwa ànu mulame nyumà wa cipròfetà. Ambàayaaku ne ncyà mafi, muntu àmbè ne ncyà mafi’s. M’Bulelèlà! Yèyè ùcìvwa ànu mupròfetà. Bwalu wàkamba, wàkamba cipròfetà e kwambaye ne: “Mvità neyikukùdimùkilè mààlabà, ne wèwè ne bânà bèèbè bàà balùme abu nenùfwe mu mvità amu mààlabà, ne patwàmbà kufika dîbà ditùdì edì mààlabà dilòòlò nenwikalè naanyi.” Ncyà bushùwà anyì? Yèyè ùcìvwa ànu mupròfetà!

Mpindyewu wèwè udi wamba ne: “Kya, kàdi aci’s mwamùlopò awu’s ngwákacyènza.”

163 Èyo, kàdi nènkwambile Kampànda uvwa kàyì mwamùlopò to. Yesù wàkangata Peetèlo, Yakòbò, ne Yone, ne bàkabànda musangu kampànda ku Mukùnà wà Dikudimuka dyà mpàla, ne bàvwa biimàne ku lusongo lwà mwine mukùnà awu. Nènku, Yesù, Nzambì ùvwa munkaci mwà kushikika Mwan’Èndè; mündi nteeta eci...mùmvwà muleeje dilòòlò adi, kushikika kwà mwànà wa balùme. Ne pààkenzàbo nàнку, bààkakènzakana e kusanganabo ne Mòsà ne Eliyà bàvwa biimàne mwaba awu. Bàvwa munkaci mwà kuyiikila, bènza muyiiki. Kaciyi tuumabèndelà tukesè tutòòke tùpitakana eku ne eku to, anyì, tuumavuba tukesè tutòòke’s wè, munkaci mwà kupitakana eku ne eku to. Kàdi, bàvwa mbantu ànu bèètù aba, biikàle bàyiikilangana. Mòsà ùkaavwa mumana kujiika mu lukita lùvwàbo kabàyi bafùndèepù dînà to kùkaavwa bidimu nkàmà mwandamukùlù. Ne Eliyà ùkaavwa mwalukile Kumbèlu mubànde mu dikalù dyà mvità, kùkaavwa bidimu nkàmà yitaanu. Kàdi’s ki bòbò aba bùbìdì bwàbò, bacikàle ne mwoyi ànu mwàbò ne kale, biimàne mwaba awu munkaci mwà kuyiikilangana Nendè kumpàla kwà Yèyè kuya ku Kàlvaryò.

Àlèluuyàh! “Batwibwe citampì too ne ku ditùkù dyà bupikudi bwètù!”

164 Nèndwìjakajè, ne pashìishe nènjikijè bwalu díbà dikaadi dipite, nènku netùsambidile babèèdi, mu tusunsa tukwàbò tutwè ku tutaanu. Mvensa wa 14, kubala, ngànji mbalulule wa 13, mmwangàtè, pàà dishìndamijila.

*Mu yèyè nwènù. . .nwâkeeyemena, paanyimà pàà  
nwènù bamane kutèeleja díyì dyà bulelèlè, èvànjeelìyò  
wa lupàndù lwènù. . .*

165 Mpindyewu vùlukàayi, ndupàndù kaayi lùdìbò naalu? Aba bàvwa—aba bàvwa mbeena Kilistò bàà beena Efèsò. Bòbò, mpindyewu tàngilàayi, nuvwa bamòne beena Kolintò anyi? Bìvwa bikèngela misangu yònsò ànu bwà kwikalaye ùbàmbila ne: “Pàndì ndwa munkacì mwènù, ewu ùdi ne dyakula dya mu myakulu, ewu ùdi ne dyakula dya mu myakulu, ewu ùdi ne musambu, ewu ùdi ne díyì dyà cipròfètà, ewu ùdi ne. . .” Nwamònu’s, kàvwakù mwà kubalongesha cintu nànsha cìmwè to, bwalu bòbò bàvwa misangu yònsò ànu bàjinga cikampànda, cikansanga, anyi cikankènga. Aba bòbò bàvwa ne cintu cìmwècìmwè aci, kàdi bàvwa naaci mu bulongame. Kacya yèyè kàvwakù mulongeshe beena Kolintò cintu nànsha cìmwè cyà mùshindù ewu to, kàvwa ne mùshindù to, èkèleeziyà kàvwa mu bulongame bwà yèyè kucilongesha to. Mpindyewu, yèyè ùvwa mufwànyìne kulongesha aba cintu cyà bushùwà.

*. . .cìdì, lupàndù lwènù, mu yèyè kàbìdì  
paanyimà pàà. . .nwènù bamane kwitabuujà, nwènù  
nwâkatwibwa citampì cyà Nyumà Mwîmpè wa mulayi,*

*Udi cyeyà. . .(Kaa, ncìpicikù aci to). . .cyeyà cyà  
bumpyànyì bwètù too ne. . .bupikudi bwà bìdì bu byètù  
bitùsumbila, ku disaamuna dyà butùmbì bwèndè.*

Yoyòyò!

166 Nyumà Mwîmpè ncinyì? Mpindyewu, pashìishe nêmbalè cìdì cishààle aci lukasalukasa bu nwènù mwà kuntwàlaku too ne piine apu. Tuvwa penyì dilòòlò adi, Mwanèètù Mike? Mwaba wùvwàbò bònsò ne disànka awu, kaa, wùvwà byònsò ànu ditalala awu, cìvwa ndinanga dipwàngàne. Mpindyewu, musangu wònsò wùdì ulwa mu *nùnkù* udi ubipwekesha ndambù, ubipwekesha. Musangu wònsò wùdì wela cidya, udi utàmba kuseemenaku ne ndambù wa centimètres. Pàdìbì bìkafika pànshì pa buloba, udi ne mundidìmbì wà mundidìmbì wà mundidìmbì wà mindidìmbì. Mpindyewu, ki búngì bwà Nyumà Mwîmpè ùdi nendè munda mwèbè amu abu. Ki dinanga ndyòdì adi. Kàdi, kaa, wèwè’s udi ne nyòòtà yà cintu kampànda.

167 Kaa, bantu bakulakaji bu mùdì bakulakaji, bantu bakulakaji kî mbafwànyìnekù. . .Mùshindù mwine wùndìku mufwànyìne kunanga bwà kwalukila cyàkàbìdì ne kwikala ne bidimu dikumi ne bitaanu, makumi àbìdì’s wè! Kaa, s’ndi

mufwànyine kufila cintu kanà cyònsò's. Ciine aci ncifwànyine kunkwàcisha ku cinyi? S'ndi mufwànyine kwikala ne bidimu dikumi ne bitaanu kàdi kufwà dilòòlò edi. Kí mbimanya to. Kàdi bu wèwè mwà kwikala ne bidimu dikumi ne bitaanu dilòòlò edi, wàmanyi munyi ne mamwèbè neikalè ne mwoyi, pawàmbà kafika kwènù kumbèlu, anyi kààkwikala ne mwoyi? Wàmanyi munyi muwàya kafika kumbèlu? Wàmanyi munyi muwikalà ne mwoyi mààlabà bu wèwè ne bidimu dikumi ne bibìdi, ne mubidi tumatuma? Wèwè's udi mufwànyine kupeta njiwu kufwà, mufwè cikàdi, cintu kanà cyònsò's ncifwànyine kukwenzekela. Mbya kabìyikù bimanya to, nwamònu's. Kakwèna cintu nànsha cimwè panwapa cyà cimanyike to. Kàdi cyòci aci ki cyùdi ujinga wamba kufwa's. Ncinyi ciine aci? N'Cyòci aci Muulu mwàmwa cìdi cyènza bwà wèwè kwikala ucjinga.

<sup>168</sup> Mpindyewu, udi ubwela mu Eci, dîbà adi udi ne Mwoyi wà Cyendèlèlè. Mpindyewu ncinyi cìdi cyènzekà aci? Ki “cyeya ncyòci aci”.

<sup>169</sup> Mfranga ya cyeya mifila bwà cintu kampànda ncinyi? Mèmè mulwe kùdi bwà kusumba kàshinyi, ngamba ne: “Kàshinyi aku kàdi mushinga kaayi?”

<sup>170</sup> Wèwè udi wamba ne: “Kàshinyi aka, Mwanèètù Branham, mushinga wàkù bwèbè wèwè kàdi ndola binunu bisàtù.”

“Citùpà cyà kumpàla cyà mushinga ncyà yingà?”

“Èè, nènкупèèshèku wèwè ku ndola nkàmà yitaanu.”

<sup>171</sup> “Èyo, ki ndola nkàmà yitaanu nyòyi eyi. Nè—nènkutwàdìlè mikwàbò yidi mishààle ayi musangu kumpàla, pàndi ànu mpetà mùshindù. Shààla wèwè mulame kàshinyi aku.” Ndi nkupèèsha ndola nkàmà yitaanu ayi, ki cyeya ncyòci aci. Mmwòmò anyi?

<sup>172</sup> Mpindyewu, kwàtaayi aci ne, ki “cyeya” ncyòci aci, ki “citùpà cyà kumpàla cyà mushinga ncyòci aci.”

...paanyimà pàà nwènù *bamanè kutwìbwa citampì* kùdi...*Nyumà wa mulayi*, kùdi...*Nyumà wa mulayi*,...paanyimà pàà nwènù *bamanè kutwìbwa citampì*...

Udi...

Cinyi? Cìtampì cyà mulayi, Nyumà Mwîmpè wa mulayi ncinyi?

*Udi cyeya cyà bumpyànyì bwètù too ne ku...bupikudi bwà bìdi bu byètù bitùsumbila,...*

<sup>173</sup> Ncinyi ciine aci? Ncitùpà cyà kumpàla cyà mushinga. Nènku, mwanèètù, kaa, kaa, kaa, kaa, kaa, bayiishi wa yààya! Pìikalàbi ne eci ncitùpà cyà kumpàla cyà mushinga, necìikalè cinyi patwàfikilà bònsò mwàmwa! Necìikalè cinyi? Pìikalàbi ne eci ki...Pìikalàbi ne eci citùdi tusankila mpindyewu eci, ne tupetela disànkà bùngi cyanààna mu mùshindù wà ne...Mvwa mumòne bantu bàà bidimu makumi citèema bàlwa ànu...

174 Mémè ngákamòna muyiishi mukulakaji ùjuuka dilòlò kampànda. Kupátukayè, kwambaye...Nunku ewu, ùlwa pa cibumbà cyà ku cyambilu. Ki mémè kwamba ne: “Muntu mukulakaji wàwa neàyiishe anyi?”

175 Kwambaye ne: “Èè, Mukalenge àbèneshiibwè.” Muntu mukulakaji wa bafiike’s, muvwale kazaku kàà kale kanène menemene kalepa kàà bayiishi aku.

176 Mémè kwamba ne: “Bwà cinyi kabàyikù mwà kulekela bàmwè bàà ku bayiishi batekète bàba kuyiishabo? Muntu mukulakaji wàwa, ùdikù mwà kuyiisha bishi’s mwine wàwa?”

177 Kwambaye ne: “Èè,” mwàkambàye, “bànà bèètù,” yèyè ne, “leelù ewu mvwa munkaci mwà kutèeleja bànà bèètù bàyiisha ditùkù dijimà,” yèyè ne, “pa byàkenzà Yesù pa buloba. Mémè nëndondè byàkenzàYe mu Dyulu.” Yèyè ne: “Nèngàngatè kubala kwànyi dilòlò edi mu Yobò 7.27,” yèyè ne, “pàvwàbi kale wàwa kumpàla kwà difùka dyà dyulu ne buloba,” yèyè ne, “pàkambàYe ne mitootò yà mu dindà yàkimba pàmwè ne bànà bàà Nzambi bààkeela mbila yà disànka.” Kubangaye mùshindù awu. Kwambaye ne: “Nudi bamanye eci ne, kùvwa cintu kampànda cyenzèke kuntwaku.” Yèyè ne: “Nudi bamanye...” Ki kubangaye kulonda bìvwà byenzèke mu Dyulu. Kubituulwilaye panshi ku mwanzankòngòlò wà ku ntwàngeeu wa dyulu ne buloba awu mu Dilwa dyà cyàkàbìdi. Lwà pa dîbà adi, Nyumà Mwimpè kàdi kumulengaYe. Mpindyewu, byàkakèngela bwà kulombolabo mukulampe awu bwà kulwabò nendè mwaba awu, ùvwa ne bidimu bìipacila ku makumi citèemà ne bitaanu. Ùvwa ànu bu nunku ewu, mukòbàme yèyè yònsò, ne mwikàle ànu ne nsuki kajengu kakesè, nudi bamanye’s, nunku ewu. Kupatukaye mwaba awu ne kubangaye kuyiisha, kwambaye ne: “Eyi’s wè! Àlèluuyàh! Butùmbi’s wè!” Kuditwayè mu ditùpika ùya muulu wàlukila mùshindù awu. Kwambaye ne: “Kaa, kanwènàkù ne mwaba bunène bukùmbàne kaaba aka bwà mémè kuyiishilapu to.” Ki kukùtulaye lubilu, wènda ùpweka mùshindù awu, ne mwèndè mwònsò. Nènku aci’s cidi ànu ncyeyà cyanàànà. Kaa!

178 Cidì Nyumà Mwimpè wènza ncinyi? Kaa, ki kaaba kimpè nkòkò aka, ngànji mbalebi mvensa wa kumpàla wa nshapità udi ulonda. Ndikù mwà kubala anyi? Mbilenga anyi? Ambàayi ne: “Amen.” [Disangisha dìdi dyàmba ne: “Amen!”—Muf.] Èyo, mvensa wa kumpàla wa nshapità mwi2, lukasalukasa. Tèelejàayi:

Nwènù, bàvwà...nwènù...*Ne bavwayè mufiùlùlùle, bàvwà musangu...bàvwà bafwè mu matomboka ne mpèkaatù,*

179 “Nwènù bàdiYè mufiùlùlùle.” *Bafùlùlùdìibwe* mbwena kwamba cinyi? “Bavwijiibwe ne mwoyi.” Bambè ànu kufwà, kàdi mMunufiùlùlùle ànu ku mfranga ya cyeyà cyanàànà. Nebiikalè

cinyi pawikalà—pawikalà cyà bushùwà mwà kufuciibwa mfranga yònsò yà makàsà? Kaa! Kabyèna bikèmesha to pàvwà Pòlò, mwambwibwe mu dyulu diisàtù, mwambe ne: “Bìdì dísù kadiyi dimòne; bìdì dici kadiyi dyúmvwè; anyi kabiyi bibwelè, kabiyi bibwelè mu mwoyi wà muntu, bìdì naabi Nzambi (mu cibucilu) bwà aba bàdì baMunange.” Abi nebiikale bishi’s wè! Nwènù bàdì bàmba bwà disànka didì kadiyi kwamba ne dyùle tentè ne butùmbi! Yoyòyò! Hmm! Nwènù bàvwa musangu kampànda bafwè mu mpèkaatù ne matomboka Yèyè mmunùfùlùlùlùlè pàmwè ku mundidimbì wà mundidimbì wà mindidimbì. Nebiikalè cinyi panwàfika ku mundidimbì wà mindidimbì ne kubwela mu mundidimbì, kuumuka ku mundidimbì pashiishe kuya kabwela mu kasùlu, kuumuka mu kasùlu kuya kabwela mu musùlu, kuumuka ku musùlu kuya kabwela mu mbù?

<sup>180</sup> Kàdì nebiikale cinyi pawikalà kule menemene kwàka mu bupikudi, mwikàle ne mubidi mupyamùpyà wà menemene, mumane kwandamuka mwalukile cyàkàbìdì ku bunsongàalùmè bwà menemene, anyi ku bunsongàakàjì, kùciyikù kàbìdì mwà kufwà? Ne utàngila panshì pa buloba, udjàmbidila ne: “Mvwa mwà kwikala mudyè ne disànka tumuma twà mvinyò ne munwè màyi mîmpè matalàlè’s, kàdì, nudi bamanye’s, ncyèna naabi dijinga mwaba ewu to. Kàdì dîngà ditùkù Yesù nealwe, nènkù mubidi wa banjèlò ewu, tèòfàní ùndì musòmbèlemù ewu. . .” Awu kawakupatukila kàbìdì mu difù dyà muntu mukàjì, kawakulwila kàbìdì ku dijinga dyà disangila dyà mulùme ne mukàjì to; kàdì bwalu Yèyè wàkalediibwa kakùyì dijinga dyà disangila dyà mulùme ne mukàjì to, mèmè nèmbiishiiwbè ku lufù nciyi naadi to, kàdì dîngà ditùkù Yèyè neakulè ne bafwè mu Kilistò nebàbiikè, ne mubidi wùmvwà musòmbèlemù musangu kampànda awu newubiikè ku lufù mwikàle mubidi mutùmbishiiwbwe, ne nêngèndakanè ne nényiikilè, ne nêngiikalè ne mwoyi ne nènsankè (àlèluuyàh), nêngiikalè ne mwoyi munda mwà bikondo byà Cyendèlèlè byònsò bilwalwà, ku Yesù Kilistò Mukalenge wetù. Yoyòyò! Ki bwalu mbwòbù abu’s, mwanèètù, ki Èvànjeeliyò nyàwù!

<sup>181</sup> “Ki bwà cinyi mèmè pàànyi,” Pòlò munkaci mwà kwamba mpindyewu cidiye. Nèmbalè cidì cishààle cyà ku cyòci eci ne pashiishe túsambidilè babèèdì. “Too ne ku bìdì bu byètù, eci ncyeyà too ne ku bìdì bu byètù, ku disaamuna dyà butùmbi Bwendè.”

*Ki bwà cinyi mèmè pàànyi, paanyimà pàà mèmè mumane kuumvwa bàmba bwà diitabuuya dyènù (Mvwa muumvwe bàmba ne nudi biitabuùje bintu ebi, mvwa muumvwè bàmba ne nudi biitabuùje cyà bushùwà didyànjila-kulongolola, Mwoyi wà Cyendèlèlè, ne lupandu, ne bikwàbò) mu Mukalenge Yesù, ne dinanga kudi. . . bansantu bònsò,*

*Ncyèna ndekela kunùsàkidila, mwikàle ntèèla mènà ènù mu masambila àányi;*

*Bwà ne Nzambì wa Mukalenge wetù Yesù Kilistò, Taatù wa butumbì, wàmònakù mwà kunùpèèsha nyumà wa lungenyi ne dibuulula . . . dimumanya: Àtungunukè ànu ne kuDibuulula kunùdì dībà dyònsò, bwà nwikalè nukola nuumuka ku ngàsà nuya ku ngàsà, nuumuka ku bukolè nuya ku bukolè, nuumuka ku butumbì nuya ku butumbì. Kanùyì nwalukila cyànyimà to; ne, kadi nuumuka ku butumbì nuya ku butumbì, batungùnùke ànu ne kwenda kuya. Mèmè néntungunukè ànu ne kunùsambidila.*

*Dìsù—mèsù à cyumvwilu cyènù . . .*

182 Hmm! Nudi bamanye's, mu Bible mbambe ne nuvwa mpofo kàdi kanùyì bacimanyè to. Kàdi apa Pòlò mmwambe ne: “Mèmè nénsambilè bwà mèsù à cyumvwilu cyènù . . .” Wèwè udi umvwa ne mwoyi wèbè. Ki cidìye wàmba ncyòci aci. Udi utàngila ne dísù dyèbè, kàdi udi umòna ne mwoyi wèbè. Aci kaayi nudi bamanye. Eyo. “Bwà Nzambì wa Butumbì . . .” Twǎnjìbi kumòna, mvensa wa—wa 18.

*Mèsù à cyumvwilu cyènù miikàle makenkeshila; bwà nwamòna mwà kumanya cidì ditekemena dyà dibùikila adi, ne cidì mabanji à . . .butumbì bwà bumpyànyì bwèndè mu bansantu,*

*Ne cidì bunène butàmbidìle bwà bukolè bwèndè kutùdì twètù . . . (yoyòyò! Bàmba pààbò mùkaadi bukolè bumane kuya? Bukolè kì mbwanji nànsha kufika mene to) . . . bàdì biitàbùùje, bilondèshùle bwenzeji bwà bukolè bwèndè bunène, (Nwènù bàdì biitàbùùje bwenzeji bwà bukolè Bwèndè bunène, ndi mèmè ànu ndòmba bwà Nzambì icikijèku ànu bukolè Bwèndè pambidi pènù. Nwamònu anyi?)*

*Bwàkenzejàye mu Kilistò, pàakamubiishàye ku—ku bafwè, ne kumusòmbeshayè ku cyanza cyèndè yèyè mwine cyà dyàbalùme mu . . . myaba yà mu dyulu,*

*Kumutù menemene kwà . . . mamfùmù, . . . makolè, . . . ngulu, . . . makòòkeshi, ne kwà dìnà dyònsò didì dibùikidiibwà, . . .*

183 Kaa, kaa, kaa! Pwàyì mwoy- . . . To, mbímpè bwà ncìyi aku to. Tudi bafwànyine cyà bushùwà kwangata citùpà cyà bufùku cidì cishààle pa cyòci aci.

*. . . dìnà dyònsò didì dibùikidiibwà, kì ng'ànu mu cikondo eci to, kàdi mu cikondo cilwalwà:*

184 Dìnà dyònsò—dìnà dyònsò ndìnà kaayi? Dìnà dyònsò dyà muntu yònsò nedìinyikiibwè Dìnà kaayi? [Disangisha didì dyàmba ne: “Yesù.”—Muf.] Dyulu dijimà ndiinyikiibwe

ne n'Yesù. Èkèleeziyà mujimà mmwinyikiibwe ne n'Yesù. Byònsò mbiinyikiibwe ne n'Yesù, bwalu Dyòdi adi ki Dîna dimwèpelè dikaavwàku Nzambi naadi. Yèyè ùdi ùbiikidiibwa ne Yèhowah: Yèhowah-yilè, Mulambu wùdì Mukalenge mudilongòlwele; Yèhowah-laafà, Mukalenge udi ukwondopa; Yèhowah, dibendela dyà Mukalenge, Maanàsè; ne Yèhowah, ba-Yèhowah bashiilèshiiàngàne. Ùdi ùbiikidiibwa ne Mùtootò wà mu Dìndà. Ùdi ùbiikidiibwa ne Taatù, Ùdi ùbiikidiibwa ne Mwàna, Ùdi ùbiikidiibwa ne Nyumà Mwîmpè. Ùdi ùbiikidiibwa ne Alpha, Ùdi ùbiikidiibwa ne Omega. Ùdi ùbiikidiibwa ne Cibangidilu, Ùdi ùbiikidiibwa ne Ndekeelu. Ùdi ùbiikidiibwa ne Ditàmbà. Kaa, Ùdi ùbiikidiibwa ne. . . Ùdi ùbiikidiibwa ànu mu mishindù yònsò yà myànzu, kàdi Ùvwa ne Dîna dimwèpelè.

185 Ki cìvwà Maataayi wàmba ncyòci aci, pàakambàYe ne: “Ndàayaaku nukalongeshe bàà mu matunga wònsò, nubàbàtiiza mu Dîna,” kí mmu mènà to, “mu Dîna dyà Taatù, Mwàna, ne Nyumà Mwîmpè.” Taatù kí ndîna to, Mwàna kí ndîna to, Nyumà Mwîmpè kí ndîna to. Mmwànzu wà Dîna kampànda. N'Dîna dyà byambiibwà bisàtù byà Nzambi unwèpelè. Dîna Dyèndè ùvwa Nganyi? Mwanjèlò wákamba ne: “NeùMwinyikè Dîna ne. . .” [Disangisha dìdi dyàmba ne: “Yesù.”—Muf.] “bwalu Yèyè ngwasungila cisàmbà Cyèndè ku mpèkaatù wàbò.” Ki bwà cinyi bwònsò bàakabàtiizangana mùshindù awu mu Bible. Mùshindù awu ki wùvwà Augustin Munsantu mubàtiize Mfùmù wa Angleterre, bidimu bitwè—bitwè ku lukàmà ne makumi ataanu, anyi nkàmà yìbìdi paanyimà pàà lufù lwà Kilistò, mu Dîna dyà Yesù Kilistò. Eyo.

*Kumutù menemene kwà. . . mamfùmù, . . . makolè, . . . ngulu, . . . makòkeshi, kwà—kwà dîna dyònsò dìdi ùbiikidiibwà, kí ng'anu mu cikondo eci to, kàdi kàbìdi mu cìcilwalwà:*

*Ne mmutèèke bintu byònsò mwinshi mwà makàsà èndè, ne mumuvwije bwà kwikalaye mfùmù kumutù kwà bintu byònsò too ne kwà èkèleeziyà,*

*Udi mubidi wèndè. . .*

186 Mpindyewu, mubidi wànyì wòwò ne bukòkeshi pa bintu byònsò, nanku cìdì mubidi wànyì aci's ki cìndì mèmè. Ncyà bushùwà anyi? Cyòci aci ki cìndì mèmè, ki cinùdì bamanye ne ncìndì. Ncyà bushùwà anyi? Èè, díbà adi, cyònsò cìvwà Nzambi aci, Yèyè wàkacipòngolwela mu Yesù, bwalu Yèyè ùvwa kaabujimà kàà Bunzambi mu mùshindù wà mubidi. Ncyà bushùwà anyi? Ne cyònsò cìvwà Yesù aci, Yèyè wàkacipòngolwela mu Èkèleeziyà ne: “Bintu bìndì Mèmè ngenza ebi, nenwènzè pèènu bintu byònsò. Nenwènzè too ne binène bitàmbe ebi, bwalu Ndi nya ku Taatù.”

*Udi mubidi wèndè, kaabujimà kàà yèyè udi uuja byònsò mu byònsò.*

187 Kaa, mùshindù mwine wùndi munangepu cyôci aci's wè! Mùshindù mwine wùndi munangepu cyôci aci's wè! Ditùkù adi mvwa mbala mukàndà mùvwàbo bafùnde bwà lwendu kampànda lùmvwà mwenze bwà kuya kayiisha—bwà kuya kayiisha ku Àfrikè. Ncivwakù mwanji kuwùbala kwònsò aku to. Mbanganyì bàkaadiku babalè mukàndà wà ne, *Mupròfeta Ûdi Ûkùmbula Àfrikè?* Mwômò amu mvwa munkaci mwà kutàngila mwànà mukesè wa balùme wa beena Inde. Mbanganyì bàkaadiku bamòne fòtò awu?

188 Mvwa muumvwe mutangadiki kampànda, utu usambidila babèedi kùkaadi bidimu bitwè ku dikumi ne bitaanu anyi bipite apu, wàmba ne: “Kacya bàndela ncitukù mwanji kumòna cishimà cyenzeke to.” Yéyè ne: “Nkàadikù mumòne bantu bàmba ne bàvwa bàsaama mitù, bùmvwe bìmpè. Nkàadikù mumòne bantu bàmba ne munda mùvwa mùbànyènga, bùmvwe bìmpè, ne bikwàbò byònsò. Kàdi bwà cishimà, cintu kampànda cifùkekù ne cyenzè cintu kampànda . . .”

189 Mémè kudyambidila ne bìvwa bikèngela bwà nsongàalùme awu kwikalaye mwimàne mwaba awu ne mumòne cyôci aci. Mukòlò wà mwànà wa balùme wa beena Inde awu wùvwa bunène *ebu*, wùmwè wà ku yôyi. Mukwàbò kaayi wùvwa mukòlò ànu mùdi mukòlò wa muntu yònsò wendenda ewu. Kàdi, bu nwènù mwa kumòna, mulonda wèndè wà balema, cisabaata cyèndè cìvwa cyambùlùke kuulu ntàntà wa centimètres mitwè ku makumi àsàtù ne yisambòmbò anyi makumi àsàtù ne mwandamukùlù, mùshindù ewu. Ûvwa ne citaata cyà cyamu cifiike mu ntàku mwàci amu. Cisàbaatà cyèndè aci cìvwa citèekela kumutù kwà tuumilonda túbidi tuleepa twimàne. Kubàndayè too ne mwaba wùmvwà mèmè mwimane awu, kumubàndishabò mwaba awu. Ûvwa ne mabaya à balema àbìdì. Kukopolaye cisàbaatà cyà cyamu cifiike aci ne kucibyankulaye panshì mùshindù ewu. Mémè kutàngila mukòlò wèndè awu, wùvwa wìpacila bunène *ebu*.

190 Mpindyewu, bantu abu mbaaMùzùlùmanyì, mbaaMùzùlùmanyì. Nudi bavùlùke mu dyàlumingu dishààle pàmvwà munùbadile bìvwa bifùndiibwe mu bibejibeji abi anyi? Ndi naabi mèmè mwine kaaba aka, byà ku Àfrikè, babintùmìne ne mpandanjila wetù udi mwalukile ùfùminakù, Mwanèètù Stricker. Mùdi kaabwalu kafùnda mùshindù wùvwà Billy Graham mwalàbùke pa bwalu abu. Menemene. Bòbò kulekela baaMùzùlùmanyì bàbàsàkila buludi too ne mu mbù. Mbwalu kaayi *ebu's*? Bampandanjila ki kuumukabò mu budimi bwà bwambi eku's. Kutùngùnuka ne kushààlamù kùdi ne musinga kaayi mwaba awu? Bòbò nyawu ànu bacìmùnyiiibwe.

191 Mémè ntu munange Billy Graham, ne ndi ngeela meeji ne yéyè mmulùme wa Nzambi mulenga wa dikèma. Kàdi cìvwa cikèngelà bwà Billy Graham kwikalaye mumubùndùle naaci, nkwabaye ne: “Indila kakesè . . .” bu ne bàmwè bàà



ku ba-Baptistes bàà maalu muumàkàne abu bamulekèlekù ùcyènza, ndi ngeela meeji ne nùнку mucyènzè. Mémè ndi ngeela meeji ne Billy Graham mmulùme wa Nzambi. Kàdi bu yèyè ànu mwambeku ne: “Indila kakesè! Mémè ndi mwambi wa Èvànjeeliyò. Wèwè’s udi witabuuja Dipungila Dikulukulu, ne wàmbi ne Yesù kàvwa cingà cintu to ànu muntu wetù ewu. Ndi nkwela kadyòmbò bwà kwenza neebè muiiki wà dikòkàngana.” Mémè nciitu ngiitabuuja byà dyumusha dyà tudyòmbò twà dyabùlu abi bwàlà, to mukalenge, kàdi mwva mufwànyine kwikala mumwele mémè kadyòmbò, mwambe ne: “Mémè ne wèwè tütwilanganè. Mémè ndi Docteur mu Bunzambi,” Billy Graham ùtu Docteur mu Bunzambi, “lekèlà nkwele mémè kadyòmbò pa cyòci eci, kàdi nkujaadikile ne Yesù ùvwa Kilistò. Mpindyewu, pa bìdi bìtàngilà dyondopa dyà kùdi Nzambi, mémè nciitu ne mapà awu to, kàdi tudi ne bânà bèètù kampànda bàdi naawu. Mpindyewu, wèwè muswè kubiikidisha bantu abu kuntu kwàka, lekela mbiikilè mémè anu umwe wa kùdibo, Oral Roberts anyi muntu kampànda, muntu kampànda udi ne mudimu wa bwambi munène wùdi cyà bushùwà mufwànyine kafika apu.” Bu bayè kwòkù aku, ne dībà adi bamòne civwà mwà kwikala cyenzèke, nènku kwamba ne: “Bwena Kilistò kī ncinùdi nwènu nudyelela meeji aci to.”

<sup>192</sup> Mpindyewu bantu bònsò bàdi bàdyùmvwa beediibwe mâyi ku makàsà bwalu yèyè wàkuumuka cyanààna e kumushiya. Mu bushùwà bwà bwalu, mpindyewu, mémè nciitu ngiitabuuja byà dyabùlu ùnwèla kadyòmbò abi to. Nkààdikù pàànyi mumwele matà mwísù mùshindù awu, ne mushiyangane nendè muyè. Ncyà bushùwà. Kàdi pàkaadibi bikafika ku ne . . . Billy nùнку’s—nùнку’s mmwenzeku ne Mùzùlùmanyi awu adyùmvwè bu kasoosa kàà lupèlà mùshindù ewu. Nùнку yèyè’s mmwambule Bible awu ne mwangate Yeshàayi 9.6, mwambe ne: “Uvwayè wàmba awu nganyi ne: ‘Bätùlelèdi Mwánà, bätùpèeshi Mwánà wa balùme’? Muntu ewu ùvwa Nganyi? Uvwayè wàmba Ewu ùvwa nganyi? Mupròfetà ewu ùvwa nganyi? Maasiyà uvwa ne cyà kulwa ewu ùvwa nganyi? Ndeejàaku wèwè mwaba wùdiYe muDimwènèshile mu Mahomet. ‘Wàkatàpiibwa mputa bwà dishipa dyètù dyà mikenji, muzaajiibwe bwà bubì bwètù, dinyooka bwà ditalala dyètù dyàkamata pambidi Pèndè, ku mibùndàbùnda Yèndè twètù twàkondopiibwa.’ Cindeejàaku túng mu Mahomet. Mmunyi mwàkeelàYe lubila ne: ‘Nzambi Wanyi, Nzambi Wanyi, WàNdekèdi bwà cinyi? Bätùbulu byanza Byanyi ne makàsà Àanyi,’ ne bikwàbò abi? Ndeejàaku ku dìyi dyèbè wèwè, ku dipungila dyèbè wèwè.” Mòna’s, nùнку yèyè’s mmutuute Mùzùlùmanyi awu mwendè nendè kadyàbàta byà yèyè mufwànyine kupanga too ne mwaba mwine wùvwàye. S’ncyà bushùwà.

<sup>193</sup> Kàdi pàakakèngelàbi bwà cibejibeji aci kukudimunaci ngaakwilù, aci’s kī cyàkatàpà ku mwoyi, cyàkenzà bwà mwoyi wànyi kutupikawu ne disànka. Pàakambàci mwaba

awu ne: “Nànsha mwàkàkèngelàbi bwà Billy kwalabukaye ne kwalukilaye cyànyimà amu, mmunyi mùdì baaMuzùlùmanyi abu mwà kwamba ne cìvwa cyà mafi,” cyôci ne, “pàvwàbi ne Rév. William Branham ku Durban, mu Áfrikè wa ku Sud, bishimà pa bishimà kabìyì dyela mpatà, bukòlè bwà Nzambi, pààkapònà baaMuzùlùmanyi binunu dikumi musangu wùmwe batwè mpàla panshì ne balekèlèlè myoyi yàbò kùdì Yesù Kilistò.” Kakùyi mpatà to. Mbamanye bwalu abu. Biitabi bàà maalu ànu mùdìwu mafundiibwe abu mbacimanyè. Kanùngambidiku to.

194 Musangu kampànda kwàkalwa muntu kùdì Yesù, kwambaye ne: “Laabi!” S’nudi bamanyè ne yèyè awu ùvwa Mùfaalèsà. Kwambaye ne: “Tudi bamanyè ne Wèwè udi Mulongeshi mufùmìne kùdì Nzambi. Tudi bacimanyè. Tudi bacimanyè, bwalu muntu nànsha umwe kî mmufwànyìnekù kwenza bintu byùdì Wèwè wenza ebi Nzambi kàyi nendè to. Tudi tuumvwa. Tudi bacimanyè. Kàdi katwèna ànu mwà kucijikula patòòke to, wamònu’s, bwalu twètù bacijikùle patòòke, èè, s’netwipaciibwe mu èkèleeziyà mwètù. Wamònu’s, netùjimije kaneemu kàdìbò bàtùpèsha.” Ki Yesù kwambaYè, kubangaYè kumwambila ne ùvwa ne cyà kulediibwa cyàkàbìdì.

195 Bwà mwànà wa balùme Muzùlùmanyi awu, pàvwàye mwimane mwaba awu apu, ki fòtò wendè nyèyè awu. Cyamù cyà fòtò kaciyèna mwà kukwàta mashimi nànsha. S’ki yèyè awu mwimane mwaba awu, mukòlò wùmwe mwìpìdike bikolè (ne centimètres mitwè ku makumi asatu ne yisambòmbò) kùdì mukwàbò, mwimanyine pa cìsàbaatà cyà cyamu cifiike aci. Mèmè kumwambila, kwamba ne: “Utu wakula Anglais anyi?”

196 “To, mukalenge.” Kàvwa mwà kwakula Anglais to. Mwandamunyi nguvwa mwambe ne: “Kàtu wàkula Anglais to.”

“Wèwè udi mùshindù awu kùkaadi ntàntà bule kaayi?” Mwandamunyi kumukonkayè.

“Kacya ànu ku cileledi.”

“Udikù mwà kunyungisha mukòlò awu nànsha kakesè anyi?”

“To, mukalenge.”

“Udi witabuuja Yesù Kilistò anyi?”

Yèyè kwamba ne: “Mèmè ntu Muzùlùmanyi.”

Mèmè kwamba ne: “Newitabuuje Yesù Kilistò bu Yèyè mwà kukwondopa anyi?”

197 “Nèngiitabuuje Yesù Kilistò bu Musùngidi wanyì bu Yèyè mwà kungondopa.”

198 “Bu Yèyè mwà kwondopa mukòlò awu, mukòlò awu kulwawu mùdì mukwàbò awu, nèuMwitabe anyi?”

“Èyowà.”

199 “Èè, Nzambi, ciWenzà ncinyi?” Eci ki cintu cyàkalondà; nkonko yònsò mmimana kwandamuna. Mwanèètù Mike, s’ki njiyà nyòyi ayi. Mémè kwindila ànu kakesè cyanàànà bwà kumòna cìvwàYe mwà kwamba. Dyà ntàngila kwàka ki mémè kumòna mwànà wa balùme awu wènda ùya, wènda wènda, byenze bu uvwa wenda ulonda bimanu mùshindù awu. Mémè kwamba ne: “Mbanganyi bàà kunùdi nwènu baaMùzùlùmanyi aba bààcìitabà? Mwànà wa balùme Mùzùlùmanyi nyèyè ewu, mutàngilaayi, mwimànyikaayi mwaba awu.” Mémè ne: “Nwènu bangàngabukà, nudikù baswè kumukenketa anyi? Ki yèyè awu mwimane mwaba awu.” Kaa, wèwè’s udi mumanye paùdi mwimànyine dîbà adi. Nwamònu’s, udi mumanye paùdi mwimànyine. Muntu nànsha umwe...Ki yèyè uvwa mwaba awu awu.

200 Mémè kwamba ne: “Vwila lwà eku eku, mwanàànyì wa balùme.” Ki kumwangatabo, ki yèyè ulwàlwa ewu. (“Tàmàkà-tàmàkà, tàmàkà-tàmàkà.”) Mémè kwamba ne: “Mbyenze ànu bu ne mukòlò awu mmwîpì ne bule bwà centimètres makumi àsàtù, anyi makumi anaayi. Wîpacila bule *ebu’s*.”

“Èyowà.”

201 Mémè kwamba ne: “Kàdi Yesù Kilistò Mwànà wa Nzambi ùdi mwà kumwondopa. Nwènu baaMùzùlùmanyi aba nenùcìtabùùjè ne nenùMwitabe bu Musungidi wa sungasunga anyi?”

202 Kùvwà binunu byà byanza bifilke abi bìvwà byela muulu myaba yònsò mùshindù ewu. “Èè, Mukalenge, mpindyewu ki dîbà mene edi.” Mémè kwamba ne: “Taatu wa mu Dyulu, piikalàbi ne kacya Wèwè ukàadikù mwandamune, ngandàmùnekù mpindyewu, eci mbwà butùmbi Bwèbè, ebu m’Bwèbè Wèwè. Ndi ndomba bwà Wòndopèku mwànà wa balùme ewu.” Mémè kumusambidila ànu cyanàànà mùshindù awu.

203 Mémè kwamba ne: “Kòpolà cisàbaatà cyèbè aci.” Kuntàngilaye mu mùshindù wà pabwàwù, mwandamunyi awu. Mémè kwamba ne: “Kòpolà cisàbaatà cyèbè aci.” Kusùululaye nshinga wa cisàbaatà aci. Bwalu nkààvwa mumòne cikèènà-kumòna aci, cìvwà mwà kwenzeka. Kukopolaye cilùmyana aci. Mmwenze ànu ùcyùmusha ne wàsa lwendu mwaba awu mutàngile kùndi anyi, mikòlò yònsò yibidi yìvwa ànu mùdi yà bantu bònsò emu, pàvwà yònsò yibidi ayi yènda bu mipyamipyà apu. Mémè kwamba ne: “Udi muswè bwà kwenda utwà kumpàla utwà paanyimà anyi?”

204 Kubangaye kwela mbila mùshindù awu, ùtwa kumpàla ùtwa paanyimà, kàyikù mumanye cyà kwenza to. Pàvwàye wènda wènda mùshindù awu apu, kwambaye ne: “Èyi Allah! Allah!”

Mémè ne: “Yesù! Yesù!”

Kaa, kaa, kaa! “Éyì Yesù! Yesù,” díbà adi. “Yesù! Yesù,” nànkú awu.

Mémè kwamba ne: “Kùdi nkonko anyì, kùdi nkonko anyì?”

<sup>205</sup> Julius Stadskev, mbanganyì bàdi bamumanyè? Mwanèètù Stadskev ùvwa mulwe mwaba ewu mu èkéleeziyà emu; wáfùmu—wáfùmu ku diya ku Allemagne. Kwambaye ne: “Anjì indila kakesè, Mwanèètù Branham, anjì indila kakesè.” Bwà kulwayè lukasalukasa ne mukwàci wa fòtò. “Ndikù mwà kumukwàta fòtò anyì?”

Mémè kwamba ne: “Enza mùdi mumòne.”

<sup>206</sup> “Lwàku *apa* wenda wenda, imana mwikàle mutèèke cisàbaatà cyèbè aci *apa*.” Kwimanaye mùshindù ewu, kukwàtayè mwànà wa balùme awu fòtò mwaba awu, mwikàle ne mikòlò yònsò yìbìdì myolòlòke ànu bu yà bantu bònsò eyi. Ki cisàbaatà cyèndè cyà kale ne mulonda wà balema awu bìvwà mwaba awu abi, mùshindù *awu*, mùshindù *awu*.

<sup>207</sup> Mémè kwamba ne: “Mbanganyì bàà kunùdi nwènu baaMùzùlùmanyi patùdi twakulangana apa bàdi bàbènga Mahomet bu mupròfètà, ne bìitabuuja ne Yesù m’Mwànà wa Nzambì, ne bàMwitabuuja bu Musùngidi wabò sungasunga?” Byanza binunu dikumi byàkeediibwa muulu. Àlèluuyàh! Kí mbaswè. . .

<sup>208</sup> Bàdi bàteeta kucisokoka, bwalu twètù tudi “bansantu babunguluki bàà mu malaba,” mùdìbo bàtùbùikila, nudi numòna’s. Nànsha nànkú, Nzambì Yèyè ùdi ànu ùkwàta mudimu. Ùdi munkaci mwà kushikika Èkéleeziyà Wendè. Ùdi munkaci mwà kwenza byàbùngì byà bìyìila ne panshì, bipite bùngì mene kutàmba ne byònsò bitùdiku twètù aba bafwànyine mene kwenza anyì kwelela meeji abi. Yèyè ùdi Nzambì dilòlò edi ànu mùtùYe kwònsò eku amu.

<sup>209</sup> Pa nànkú, nwènu balunda bàanyì batekète, lekelaayi nnwàmbilèku cintu kampànda mpindyewu mene. Nwènu bananga bàanyì bàà mushinga mukolè, nwènu bàdi mu ditunga edi aba, ne bakwàbò bàdi mu matunga àdìbo bàtèeleja mikàbà yà mèyi kwìkalà dyàmwàmwà dyà mbú ne myaba yònsò yinùdi nusanganyiibwa ayi, kanuciinyiku to. Maalu ónsò àdi ènda ànu bilenga. Taatù Nzambì, kumpàla kwà difùka dyà dyulu ne buloba, ùvwa mumanye byònsò bìvwà ne cyà kwenzeka abi. Byònsò bìdi bìkwàta mudimu ànu mu byòbì. Wèwè udi muMunange anyì? Lama mwoyi wèbè mululàme.

<sup>210</sup> Nènku, vùlukàayi ne, mweyelu ewu pàdiwu wùmuka mu mwoyi wà panu ewu, bwènu nwènu bakùlumpè anyì bwènu nwènu bansongà, ne nwènu baamaamù, panùdi numòna bânà bèènu bakesè bàà mu mabòko, mwànà mukèsè wa mu dibòko wa bakàji wàkafwà pàvwayè kàyì mwanjì kwìkala ne matùkù mwandamukùlu anyì matùkù ataanu awu, yèyè neikalè nsongàakàji mulenga pawàmumònà. Kaakù mulùme

ukààvwa mukòbàme yònsò, uvwa kàciyi kàbìdì mwà kumòna kùvwàye ùya awu; pawàmumònà, wèwè kaakù mukàji, s'neikalè nsongààlùmè mulenga wa dikèma, nsongààlùmè ànu mùdì wa wipacila bidimu makumi àbìdì awu, ànu pa bulenga bwine menemene bwà bunsongà apu. Ne yèyè neikalè mùshindù awu bwà kashidi. Wèwè udi mwà kumulenga ku cyanza, udi mwà kumulabula ku cyanza. Neùmwele mabòko ku nshingù, kàdi kwàkumubiikila “bàyaanyi” to, neùmubiikilè “mwanèètù wa balùme.” Kaa, ekèlekèlè! Yèyè's neikalè munène menemene mutàmbe ne “bàyaanyi” mwine awu. Wèwè udi wela meeji ne uvwa mumunange? Ncyà bushùwà ne uvwa mumunange. Kàdi adi dinanga òvwa ndyà *phileo*; indila too ne pawàpetà dyà *agapao* kàdi umòne. Indila pàakukwàtà dinanga dilelèlè dyà Nzambì adi, kàdi dîbà adi umòne ne bwalu bùdì cinyi. Edi dyà pànwàpa edi didi ànu mùdì dyala dyà kale dyà difwima mîshì, kadyèna nànsha dîmpè to, kadyèna ne bwà nsongo to. Cintu cimwèpelè cîndîku mèmè nñubela bwà nwènù kwenza mpindyewu, ncyà ne, nwènù balunda bàanyi—bàanyi—bàanyi. . .

211 Katancì kakesè ndambù pashiishe nêngiikalè mwà. . . Nudîkù mwà kuswà bwà ngàngatakù nshapitá mikwàbò yìbìdì ayi musangu kumpàla anyi? Mukalenge. . . Bidi bìkèngela bwà mèmè—mèmè kwikishaku ndambù kumpàla kwà masangisha à mu Chautauqua awu. Mpindyewu, ncyèna mwà kuyiisha bintu ebi mu masangisha awu to. Mùdì búngì cyanààna bwà bupidy-. . . miitabuuja mashilèshilàngàne búngì cyanààna. Nudi numòna anyi? Ewu yèyè ùdì ànu èkèleeziyà nkàayèndè. Nwamònu anyi? Ncyèna mwà. . . Ndi ne bukenji bwà kuyiisha mwab'ewu cyònsò cîndì muswè kuyiisha aci. Ewu n'tabernacle wanyì mèmè, nwamònu's, ne bândi ngambila nñwènù. Kàdi, ndi ngiitabuuja ne bantu abu mbasungìdîibwe. Èyowà's, mukalenge, ndi ngiitabuuja nànkù cyà bushùwà. Kàdi, kaa, mùshindù mwine wùdìbì bitàmbe bwîmpè bwà kwenda paùdì mumanye mwine mwaba wùdì wendela's wè. Mùshindù mwine, bwà kumanya, ànu kumanya cyanààna cyùdì munkaci mwà kwenza aci, nudi numòna's, pamutù pàà kutànkakana, kulenduka. Twikalààyi ànu biimane mu Bukènkè, ne twendela mu Bukènkè ne kumanya ne kùyaàya mutàngile nkwèpì. Aci's ncilelèlè. Mukalenge ikalè neenù.

212 Kàdi muntu ne muntu wa kunùdì kaaba aka mpindyewu yèyè kàyi mushikikiibwe bilondèshìle mwaba to! Wèwè udi mufwànyine kwikala ànu mukàji wa nzùbu cyanààna. Èè, wèwè udi wamba ne: “Mwanèètù Branham, mèmè ncitukù mwenze kantu nànsha kàmwè mu nsòmbelu wanyì to. Mèmè nyewu ncìyi muyiishi.” Èè, pànwàpa Nzambì mmukufikishe pànwàpa bwà kukoleshakù dîkù dyà bânà, mu dîkù dyà bânà amu's mùdì mwà kupàtuka dikwàbò dîkù dyà bânà mwikalà muyiishi watùma misùukà mùliyò mujimà kùdì Kilistò. Bìvwa bikèngela

bwà wêwè kwikala pànwápa. Udi pànwápa mmu kiipàcilà kampànda. Nuvwakù bamanyè nàнку anyi?

213 Èè, wêwè udi wamba ne: “Cyònsò cínkaadiku pàanyi mwenze, cívwa ànu, kusekuna bimòtò byà buloba ebi. Ne mvwa mpàtuka nya, kumpàla kwà díbà mu dilòlò amu, nciyikù mmanya mwà kudítambakeena bwà kudiisha bânà bàanyi to. Mvwa ntàngila bânà bakesè bàdi bakwàte ne byà luse abu kabàyikù ne bisàbaatà ku makàsà to. Nsòmba ngàasa mwadi. Ndi mupeteku kaditempu kàà kale kàà nkàta yinaayi kàà bàkòka kùdi tubalu aku, bwanyi mémè ne Maawù kwikala tuyakù mu èkèleeziyà.” Kutacishikù meeji to, mwanèètù. Túngùnuka wêwè ànu ne kuMunanga, Yèyè ùdi neebè ne kiipàcilà kampànda. Shàala wêwè ànu mùshindù wùdi awu, nda wêwè ànu kumpàla. Wamònu anyi? Udi mufwànyine kwikala kacya kùyikù muyiishe diyiisha nànsha òmwè to, kàdi udi mufwànyine kwikala kakwèndè wa tatwèndè wa kampànda wíkala mwà kucyènza.

214 Nuvwakù bamanye ne Nzambi wàkabadila (Twanjàayibi kumòna tǔng mpindyewu, dyèndè ùvwa nganyi mwine awu?) Lewi, ne wàkafuta cyàdiikumi pàvwàye mu mifungù yà Abraham, pàkatwilanganà nendè Melekisedekè apu anyi? Mbanganyi bàdi bamanyè nàнку? Nènku twànji tùmònàayibi. Abraham wàkalela Izàkà, Izàkà wàkalela Yakòbò, Yakòbò wàkalela Lewi; bivwa ntatwèndè, kakwèndè, kakwèndè wa tatwèndè; pàcívwaye mu mifungù, mu dimiinu dyà kakwèndè wa tatwèndè, Bible wàkamubadila ne yèyè wàkafùta byàdiikumi kùdi Melekisedekè. Ekèlekèlè, ekèlekèlè, ekèlekèlè, ekèlekèlè! Mwanèètù! Kaa! Mémè's ndi . . .

215 Kùvwa nsongàalùmè kampànda—kùvwa nsongàalùmè kampànda wa ba-Anglais uvwa mukùdimune mucima dilòlò kampànda mu Angleterre mwàmwa, kwambaye ne: “Ndi ne disànka dyàbwíngì! Ndi ne disànka dyàbwíngì!”

216 Èyowà's, ne disànka dyàbúngì dyà kumanya ne aci ncilelèlè! Nènku ditùkù kampànda dyà butumbi, ncyèna mumanye ne diine ditùkù adi nedùikalè díbà kaayi to, kàdi bu ne cívwa ncikèèna-kumòna, ncyèna ngàmba ne mvwa kaaba aka to. Vùlukàayi, misangu yònsò nulame bwalu ebu mu meeji, bàdi ne mikàbà yà méyi bènzè byà mwòmùmwè. Ní mvwa mu cikèèna-kumòna, anyi ní mvwa mwambwibwe mu Nyumà, ncyèna mumanyè to. Kàdi cívwa cyà bushùwà ànu múnndi mukwàte Mwanèètù Neville mùshindù ewu emu, ànu cyà bushùwà. Nènku mvwa mwà kutàngila ne kuyiikila ne bóbò bantu abu. Ki mukàjàanyi wa kumpàla uvwa mwimane wàwa, kàakeela lubila ne “bayaanyi” to, yèyè wàkamba ne, “mwanèètù munanga.”

Mwaba awu kùvwa kwimane nsongàakàji ùmvwà mpàtuka nendè kale wàwa kùkaadi bidimu.

217 Pàmwápa bamwè bàà ku beena famiye wendè mbasòmbe kaaba aka, Alice Lewis wa mu Utica, nsongààkàjì wa maalu malenga wa dikema, mwena Kilistò wa ùkèmesha. Wàkabwela mu dibàkà pashìishe ndambù pàvwàye ne mwoyi, ne wàkapeta mwanèndè wa mu dibòko wa kumpàla kàdi kufwilà pa kulela. Alice Lewis, ngàkabwela mu nzùbu wa dimwena bitalu bwà mèmè kumumòna. Ncìvwa ànu mfikilaku kumbèlu, mèmè kuumvwa bàmba ne mmufwè. Mèmè kuya kuntwaku, kakùvwa muntu nànsha umwe mu cibambalu amu to, mèmè kwamba ne: “Kùdikù muntu mukàjì mwab’ewu, Mandamu. . .” Dìna dyèndè ùvwa Emmerke. Ne wàkasèdiibwa kùdi nsongààlùmè kampànda mwena Kilistò wa maalu malenga, ne yèyè nsongààkàjì awu ùvwa mwena Kilistò wa maalu malenga. Mvwa muyààyàaye ne nsongààkàjì awu myaba yònsò, mu myaba ya mìshindù mishìilèshìilàngàne ne bikwàbò byònsò. Kàdi tucìvwa ànu bànà’s, bàà bidimu dikumi ne mwandamukùlù, dikumi ne citèemà, myaba yònsò, mwena Kilistò wa maalu malenga, ncìyiku mumanye bùngà bwalu nànsha bùmwe bwèndè yèyè to ànu bwena Kilistò bushùwashùwàlè. Kàdi mèmè mvwa ngènzàmpèkààtù. Kàdi mvwa mmuseesela. Mèmè kubwela mu. . . Ne bayende ùvwa mwena Kilistò mulediibwe cyàkàbìdì, muntu wa bushùwà. Kàdi ncìvwa mumanye to; mvwa mumanye ne ùvwa mufwè, mvwa mucìmwène mu cibejibeji. Ki mèmè kuyakù ne bóbò kungambila. Mèmè kuya kwà Coots aku e kwamba ne: “Nudikù ne Mandamu kampànda dyèndè Emmerke anyì?”

Awu ne: “Billy, yèyè awu ùdi ànu mu cibambalu mwàmwa.”

218 Mèmè kubwelamu ne kwimana ku luseke lwà mushèètè wà bafwè aku. Mèmè kudyàmbidila ne: “Alice, mèmè ewu’s nkààdikù mubwelèbwèle mu tushò twà tutàmbe kwikala twà m̀dimà twà mwinshi mwà buloba, nkààdikù mwendèlèndèle mu njila yà m̀dimà. Mèmè ne wèwè’s tukààdikù bapìcile pàmwe mu njila ayi ne bendè twenda tupweka ne musùlu, kale wàwa pàvwàbo ne bwàtù bwà kale bwà manayi, tuvwa tusòmbamù tutèeleja mìjiki yà mvunkù yìmba. Tubànda tupweka ne tujila, mùshindù mwine wùvwà wèwè ewu inàbànza’s wè! Mùshindù mwine wùndi ngeela Nzambì twasàkidila bwà nsòmbelu webè’s wè. Ikìshà, mwanèètù wa bakàjì munanga, ikìshà mu ditalala dyà Nzambì.”

219 Kàdi bufùku abu mu cikèènà-kumòna, ki yèyè ulwàlwa lubilu ewu mutàngìle kùndì. Kwambaye ne: “Mwanèètù wa balùme mubènèshìibwe,” ne kungeelaye mabòko ku nshìngù. Kaa, kaa, mwanèètù wa balùme ne mwanèètù wa bakàjì, s’ncinshintùlùlè’s. Ncyènàku mwà kwikala kàbìdì wa mwomùmwe awu to. Ncyà bushùwà ànu cyà menemene! Ncyà bushuwa ànu—ànu mùndì mèmè nnutàngìla emu, ànu cyà bushùwà cyà mùshindù awu. Pa nànkù, kakwèna bwòwà nànsha bukesè to. Ndi mwà kufwà kumpàla kwà bufùku kucyàbò.

220 Ndi muswè kukolesha mwanàanyi mukesè wa balùme udi mundekeelu mwàmwa wàwa, Joseph. Ndi muswè kumumòna mu cyambilu, pàngiikalà mwà kwangata Bible ewu... pàngaàfikà dîbà dyà mmòna Joseph mu cyambilu munkaci mwà kuyiisha bu—bu nsongaàlùmè mùle tètè ne Nyumà Mwîmpè, mulaaba kùdì Nyumà wa Nzambi pambidi pèndè. Ne ndi mwitabùuje ne yêyè neikalè mupròfetà. Ditùkù dîngàà—dîngàà—dîngààkamumòna bidimu bìsambòmbò kumpàla kwà kulediibwaye, nwènù's nudi bavùlùke ne ngàkanwàmbila ne yêyè neâlwe. Vùlukàayi cîngààkamubîikilà, mwaba awu mene ku luseke lwà cyoshelu aku, ncìyi mumanye ciine cîmvwà ngàmba aci to, mèmè munkaci mwà kulambula bânà bàà mu mabòko, mèmè kwamba ne: “Joseph, wêwè udi mupròfetà.”

221 Nènku ditùkù adi yêyè mwimane mu lubànza, kubwelaye ne kulwaye kùndì, kwambaye ne: “Papa, Yesù ewu ùtu ne cianza mùdì cyèbè aci anyi?”

Ki mèmè kwamba ne: “Èè, èyowà's, mwanàanyi wa balùme. Bwà cinyi?”

222 Kwambaye ne: “Mvwa musòmbè pa kàkalù kàanyi, mwindile Sarah” udi mwanàabò wa bakàji mutekète awu, “bwà àfumè mu kàlaasà.” Musòmbè pambèlu apu. Ncìtu muswè kumulekela ùpàtuka ùya mu njila to, ùvwa musòmbè paanyimà mùshindù ewu. Nènku kwambaye ne: “Mèmè kutàngila muulu, ne,” mwàkambàye, “ndi mwenze ànu ntàngila muulu anyi, kùvwa cianza cyenze mùdì cyèbè aci, ciikàle ne dibòkò dyà mutèèlu ditòoke diikàle kumutù kwanyi aku.” Ki kwambaye ne: “Kubàndaci muulu.” Yêyè ne: “Cìvwa ncyanza cyà Yesù cìvwa cibànda muulu aci anyi?” Mèmè kutàngila mamwèndè, mamwèndè kuntàngila. Twètù kuya kwà Mandamu Wood. Pàdiye ní mpenyi, pàdiye musòmbèle mwab'ewu apu. Twètù kumupuutakaja ne nkonko, elu lùjika lukwàbò lùpingana, ne mu mìshindù yònsò mutùvwa mwà kwela amu. Cìvwa ncikèèna—kumòna. Ùvwa mucimòne. Pàngiikalàku mwà kumòna cikondo cìikalà Joseph mwànà ewu mwimane. . . Ndi ntèkemena ne nêngiikalèku ne mwoyi too ne pàngaàmumòna ùkaadi musèlangane, bu Yesù mwà kunèngà.

223 Kàdi nyèwù nkààdi muntu mununu, mvya milembelele ku nshingù kwònsò eku. Ndi mutùme. . . Ndi muswè kutùmakù misùùkà mikwàbò mìllyò yìbìdì anyi yìsatu kùdì Kilistò bu byòbì mwà kwenzeka ne mpetè mùshindù awu. Ki dipangadika dîndì naadi bwà kuyiisha Èvànjeelìyò mu ditengu ne ditengu dyònsò dyà buloba. Èyowà's, mukalenge. Pa nànkù, ngambulwisheku's, Nzambi, nêngènzè nànkù. Pa nànkù, pàngaàmònakù cikondo aci cìlwa's, Mwanèètù Mike.

224 Ndi mwà kutàngila cikondo cìikala Maman, Meda, mùndì mmubîikila's, munanga wanyi awu, nwamònu's, yêyè ùdì. . . tukàadi twenda tukùlakaja, mmòna nsuki yèndè yènda yitòloka mvya, ne mmòna mutùdì twenda tuya, twenda tufwàtalala.



225 Rebekah, ndi ne kusàkidila kwàbúngì bwà Rebekah. Mulongeshi wendè wa mìjiki ùvwa ùngambila dilòòlò adi, wàmba ne: “Ekèkèkèlè, yéyè mutungunuke naabi nàнку, Mwanèètù Branham,” yéyè ne, “mbikolè bwà kwamba cyènzàye.” Nwamònu’s, mutungunuke mu mìjiki. Ndi muswè bwà yéyè, ne ndi muswè. . . Ndi muswè Sarah ku cisanji cyà orgue, Becky ku pyànò, ndi muswè Joseph mu cyambilu.

226 Pàngìikalà mwà kumònakù aci cyènzeka, ne mèmè ne Maman tubwela twenda tutetuka, mèmè ngendela ku dikombo dyànyì dyà kale adi, dilòòlò kampànda, ngènda mpweka ne njila, ne mwikàlekù mwà kutàngila mwàmwa ne kumòna mwanàanyi wa balùme awu mwimane kwàka mulaabiibwe ne Nyumà Mwìmpè, munkaci mwà kuyiisha Èvànjeeliyò umwèumwè ewu. Ndi muswè kwangata Mukàndà mukulakaji ewu, kwamba ne: “Mwanàanyi wa balùme, ki Wòwù ewu, Ngwèbè wèwè. Ikàla mwimane naaWu, kùdikù cibànga pa Dìyì nànsha dimwè to. Shààla wèwè ànu naaDi, munanga wanyì. Kwikadiku, kùditàcishikù mu meeji to, udi ubèngangana neebè nànsha yéyè mwikàle nganyì, nànsha yéyè nganyì ùbèngangana neebè, Nzambi neàtwe ku cyèbè. Ùyiishè wèwè Dìyì dyònsò ànu mùdìDì difùndiibweMù amu, nènku Papa neàkumòne dyàmwàmwa dyà musùlù.” Ndi muswe ngòlolakù mabòko ne ngàmwàngata mu mabòko àanyi emu, mukàjàanyi awu, ne kusabuka kuya dyàmwàmwa dyà Yadènè.

227 Patwàmbà kafikila ku diine díbà adi, Nzambi, nshaalèku mu budimi bwà bwambi, ne lulamatu lwònsò! Nshaalèmu! Nànsha bindòmbè cinyì, anyì bintu búngi kaayi, cìndi ngenza, anyì *bikampànda*, *bikansanga* anyì *bikankènga*. Nshaalèku ne lulamatu ne bulelèlèlè ku Dìyì dyà Nzambi udi ne mwoyi, bwà pàalwà ditùkù adi ne mèmè musabùke muyè dyàmwàmwa, ne mwikàlekù mwà kutàngila kwàka ne kwamba ne: “S’ki nwènu abu. Kaa, mulunda wanyì wa mushinga mukolè, mwanèètù wa balùme wa mushinga mukolè, mwanèètù wa bakàji wa mushinga mukolè.”

228 Wèwè muyiishi wa kànàkànà, bwela mu budimi bwà bwambi, shààla muswikàkane ne mudimu. Nwènu bònsò bayiishi bàà twànàtwànà ne bikwàbò, kanùshàadi kacya nwashìnga mìkòlò to. Kanwikadi ànu kacya nwasòmba kanùyì ne cinùdi nwenza to. Pàtukàayi nùye nùkapetèku musùkà kampànda. Enzàayìkù cintu kampànda! Ndàayi, ditwayi mu mudimu. Kwimanyiku to, wèwè muyiishi wa kànàkànà kuntu kwàka. Nzambi àbèneshe mwoyi wèbè.

229 Yéyè ùdi ùmvùlwija pàmvwà bukolè abu, ngeela meeji, ne pàmwàpa mushààdilekù ndambù kùdiye. Mvwa ne bidimu ànu bu makumi àbìdi ne byà mu njila nàнку awu pàngààkatèèkà dibwe dyà mu ditumba adi mwaba awu. Ndi mvùluka ne mvwa ne ciibidilu cyà kuvwàla kàzakù kàà bleu ne mùpanù mutòòke, nènku mèmè kwimana mwaba awu ne kutèeka dibwe dyà mu

ditumba adi kùkaadi bidimu bitwè ku makumi asatu ne címwè. Mònaayi ànu bukolè bwine búncìvwà abu, mèmè s'ncìvwà ànu mwàna mutekète. Mwimane ànu mwaba awu, ntèèka dibwe dyà mu ditumba adi. Ncitu mudyeku cibàngà pa Díyì nànsha dimwè to. Ntu muDilame menemene ànu bu mûngààkatèèkà dibwe dyà mu ditumba adi amu. Mwômù amu bujaadiki bwànyì bùdi bùsanganyiiwbamù, mûngààkabùfùndà pa dibeji dyà munda mutupù dyà Bible, nènku mèmè kudítuula ne kudyela mu dibwe dyà mu ditumba adi, ne dicidi ànu disanganyiiwbamù. Nènku bwikalèku bufùnda pa mabeji à Díyì dyà Cyendèlèlèlè dyà Nzambi mu Dyulu. Ngìikalèku kacya ànu ngímana ne lulamatu too ne ku ndekeelu.

Twìnyikàayi mitù yètù mpindyewu kakesè cyanààna bwà disambila.

<sup>230</sup> Mu dijikija dyà dilòlò edi, dijikija dyà yôyi eyi, nshapità umwèpelè ewu, wa bwalu kàyì mujikija mùvwàbi bikèngela to. Bìvwakù bikèngela nwènù kupeta mukwabu awu, ne mùdiye mutungùnuke wènda ùshikika Èkèleeziyà pa mwaba Wèndè. Nènnùtwàdilèbi musangu kumpàla, bu Nzambi mwà kwanyisha. Bikèngela ngàngatèku ànu ndambù wa diikisha mpindyewu kumpàla kwà mèmè kuya mu Chautauqua mwàmwa, ku masangisha makwàbò manène, pashiishe ngumuka amu nya ku Oklahoma, ngumukila aku nya ku Klamath Falls, pashiishe ngumuka ku Klamath Falls mpweka mutàngile ku Californie, nya ku Yakima, bwa mèmè kwalukila ànu too ne ku matùkù 15 à ngondo wa mwandamukùlù.

<sup>231</sup> Kàdi tàngilàayi, swàyi nnukonkeku cintu kampànda, bu cintu ne cyà kukwenzekela wèwè anyì mèmè kumpàla kwà ciine cikondo aci kulwaci, bu mèmè ne cyà kusabuka kuya dyàmwàmwa dyà musùlu ne kubwela mu Buloba abu, anyì bu wèwè ne cyà kusabuka kuya dyàmwàmwa kubwela mu Buloba abu kumpàla kwà cikondo aci, udikù umvwa ditwishiibwa dilòlò edi ne netùtwilangane mwàmwa mu wòwù Mwaba awu anyì? Wèwè naadi, ela cyanza muulu, wamba ne: “Ndi ngumvwa ditwishiibwa munda mwà mwoyi wànyì.” Nzambi àbènèshè mwoyi wèbè. Nzambi àkubènèshè. Kwòkù muntu mwaba ewu udi kàyì ùmvwa ditwishiibwa dyà ne yèyè neikalèmu, kàdi mwikàlekù muswè bwà kwamba ne: “Umvùlùkèku, Mwanèètù Branham, bwà ngâpetakù ditwishiibwa adi,” ela cyanza muulu ne: “Ndi muswe kwikalamu, mèmè pàànyì.” Nzambi àkubènèshè, inàbànza. Nzambi àkubènèshè.

<sup>232</sup> Taatù wetù wa mu Dyulu, nyèwù tuKutwàdila disangisha edi dilòlò edi, cyanza cyònsò, mu kwànyì pàànyì kumanya, cìvwà cyela muulu, bònsò pa kuumusha ànu muntu umwèpelè, musùkà wùmwe wà mushinga mukolè wùdi musòmbe paanyimà apa ewu, mwikàle ànu ndambù mucyòkàkàne mu kudìkonka kwà ne mmufwànyìnekù kusabuka kuya dyàmwàmwa mu Buloba abu anyì, ní mùdi búngì bukùmbàne



mutèèlèje mukàbà wèbè wà mèyi pa Efèsò, mùvwà Nzambì mudyànjlile kutulongolola ku Mwoyi wà Cyendèlèlèlè, ne nku wòwù mukàbà wà mèyi awu kùmvwà mupetèle Dìyi dyà Nzambì ne mutwìbwe cìtampì kùdì Nyumà Mwímpè mumbweje mu Bukalenge bwà Nzambì.” Enzaku nàнку, Taatù.

<sup>237</sup> Ondopaku bònsò bàdì ne mabèèdì ne mu ntàtu. Dyàngàcìlèku Wèwè mwine butùmbi bwalu tudi tuKulàmbula byònsò ebi ku didyenzeja dyònsò mu Dìna dyà Yesù, Mwan'Èbè. Amen.

<sup>238</sup> Kùdikù mwab'ewu muntu udi usaama ne muswè bwà kumutentekelabo byanza bwà kumusambidila anyi? Nudikù mwà kwela byanza muulu anyi? Èyo. Swàyi nulwe mu cimùmà, mpindyewu, ku cyoshelu eku mene, nènku nwimaneku katanci kakesè cyanàànà, pàdì Mwanèètù Neville ùlwa ne wendè. . .

<sup>239</sup> Kaa, eci ncmwèke bu, kusambidila kwà babèèdì, nkumwèke ànu—ànu bu kulwa ku mwaba wùdì mumanye paùdì mwimanyine, menemene. Nzambì mmùmanyè byònsò pa bwalu ebu.

<sup>240</sup> Pàndì ngùmvwà musambu awu. . .Vùlukaayi ne, nwènù biikàle ne mwoyi pàngààyà, nwàngimbilaayikù ewu ne: *Itàbuùjà Nàka*. Nwavùlukaayi ne, ncyèna mufwè to, ncyàkwikala kule menemene neenù pàngiikalà ngutèèleja apu to. Mèmè ncyèna mwà kufwà to; Yesù mmumpèèshe Mwoyi wà Cyendèlèlèlè; neàmbiishe ku lufù mu ditùkù dyà ndekeelu; nènnùmònè. Ne wèwè muye, nèngiitabuuje cintu cìmwècìmwè aci bwèbè wèwè. Ndi ngiitabuuja ne netùmòngane cyàkàbìdì.

<sup>241</sup> Ndi mutàngile, inàbànzà wa mushinga mukolè udi mwimane kaaba aka ne mvyà ewu. Udi mwena Kilistò anyi? Mùle tètè ne Nyumà Wendè, mwindile bwà kulwaYè, mwimane ànu cyanàànà kaaba aka mwindile bwà Bwàtù kulwabu. Amen. Kaa, mwanèètù wa bakàjì. . .



*DITÈÈKIIBWA* 4 LUA60-0522E  
(Adoption 4)

DILONDANGANA DYÀ MALONGESHA PA DITÈÈKIIBWA

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matuku 22 a ngondo mwitânù, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)